

EKALESIA FAAPOTOPOTOGA KERISIANO SAMOA

Matagaluega A'oa'oga Kerisiano



VASEGA MATUTUA 2017

MATAUPU VASEGA MATUTUA

FEPUARI:

- 12 (Aso Sa Tupulaga)
O le pepelo o le 'oa (*The allure of wealth*) **Timoteo 6: 1 – 10**
- 19 Ua aveesea le tofi masiofo o Vasati (*Queen Vashti deposed*)
Eseta 1: 1 – 20
- 26 Ua faatautauina Hamanu (*Haman hanged*) **Eseta 7: 1 – 10**

MATI:

- 5 O le faanoanoa o le Atua (*The disappointment of God*)
Kenese 6: 5 – 8
- 12 Ua tasi tagata uma ia Keriso Iesu (*All one in Christ Jesus*)
Kalatia 3: 23 – 29
- 19 Pese mo le siosiomaga ola lauusi (*Sing green*) **Kenese 2: 4 – 17**
- 26 E taitai e le Agaga (*Spirit led*) **Luka 4: 1 – 13**

APERILA:

- 2 O le taupulepulega faalilolilo (*The plot*) **Mataio 26: 1 – 5**
- 9 (Aso Sa o le Laupama)Ona ulufafo ai lea o ia ua tagi lotulotu
(*So he went out and wept bitterly*) **Mataio 26: 69 – 75**
- 16 (Aso Sa Toetu)Ua toetu ia Iesu (*He is risen*) **Mataio 28: 1 – 10**
- 23 O le maua – o le iloa feuluuluta'i
(*Being found out-being intimately known*) **Kenese 3: 8 – 13**
- 30 A i ai Iesu i le vaa ... E ata i le matagi
(*With Christ in the vessel...Smile at the storm*) **Mataio 8: 18 – 27**

ME:

- 7 Sau ‘ave e tusa ma lou mana’o (*Come and take as you need*)
Esoto 16: 1 – 18
- 14 (**Aso Sa o Tinā**) O le sauniga o le feagaiga
(*The Covenant Ceremony*) **Esoto 24: 1 – 21**
- 21 O le Atua e le faamalieina pe afai e numera lua o Ia i au mea sili
(*The God who won’t settle for being second best*) **Esoto 32: 1 – 14**
- 28 O le lagona le vaea o lo tatou tofi (*A sense of belonging*)
Salamo 24

IUNI:

- 4 Liligi atu le Agaga Paia (*Poured out*) **Galuega 1: 1 – 21**
- 11 O le Alofa Tunoa ma le aiga foafoa o le Tolu Tasi Paia
(*A loving and creative Community*) **Kenese 1: 1 – 5**
- 18 O le tapuaiga e leai se uiga (*Hollow whorship*)
Isaia 1: 1 – 8, 11 – 19
- 25 O le malamalama mo ou ala (*A lamp for my feet*) **Isaia 9: 2 – 7**

IULAI:

- 2 Pe afai ou te faaeteete ae leai se ola tatalo (*When I’m careful but not prayerful*) **Isaia 36: 1 – 12**
- 9 Sauni e tuvae i totonu o le Ioritana (*Setting for in the Jordan*)
Iosua 3: 9 – 17
- 16 Sauni vae, sauni le loto (*Bare feet, bare heart*) **Esoto 3: 1 – 10**
- 23 Ola i se olaga o manuia, e maua mai le Atua (*Live a life of grace which comes from God*) **Mataio 5: 1 – 5**

30 Ia tasi lou loto (*Singleness of heart*) **Mataio 5: 33 – 37**

AOKUSO:

6 Aua le popole ae fialia (*Don't worry be happy*) **Mataio 6: 25 – 34**

13 (**Aso Sa Tamā**) Amanaiaina o tagata (*Mindful of Mortals*)
Salamo 8

20 Fa'aali mai e le lagi (*The Heavens proclaim*) **Salamo 19**

27 O le apu e tasi e na te aveesea le mea atoa
(*An apple a day took wholeness away*) **Kenese 3: 1 - 7**

SETEMA:

3 Tuu pea le palapalā o ou lima (*Getting your hands dirty*)
Mareko 7: 1 – 13

10 Auina e tala'i le Tala Lelei (*Sent on a mission*)
Galuega 16: 11 – 34

17 Faitauina i Misionare (*Missionary encounters*)
Galuega 16: 11 – 34

24 Misionare faalauiloa (*Missionary model*) **Galuega 20: 19 – 32**

OKETOPA:

1 Faatumauina o mafutaga mafanafana (*Fostering friendship*)
Faataoto 17: 19 – 32

8 (**Lotu Tamaiti**) Uo ma aiga (*Friends and family*)
Faataoto 18: 24 – 19: 7

15 O le augani a le afafine o Kalepo (*Clabel's daughter makes a claim*) **Faamasino 1: 9 – 15**

22 O le oti o Apimeleko (*Death of Abimelech*)

Faamasino 9: 22–29, 50-56

29 Sa natia ae ua fa'aalia (*Hidden and revealed*) **Isaia 45: 1 – 15**

NOVEMA:

5 O lenei Alofa Tunoa ua tatou ola ai (*This Grace in which we stand*)

Roma 5: 1 – 11

12 Ia faaolaina i aso uma (*Letting go and stepping out is faith*)

Roma 10: 4 – 13

19 Tuu ese ma alu ese i le faatuatua (*You've been summonsed*)

Mataio 22: 1 – 14

26 Ua lapataia i tatou (*Saved again and again every new day*)

Mataio 24: 15 – 28

TESEMA:

3 Timu o faamanuiaga (*Blessed rain*) **Kenese 9: 8 – 17**

10 O au filifiliga (*Your choices*) **Teuterenome 28:1-6,15-19**

17 O le finau a Aperaamo i le Atua (*Abraham argues with God*)

Kenese 18: 16 - 33

ASO SA: 12 FEPUARI 2017.

**MATAUPU: O LE PEPELO O LE ‘OA.
(The allure of wealth)**

SINI: Ia a’oa’o le vasega ina ia malamalama, e tāua tupe i le soifuaga o le tagata, ae o le mana’o tele i ai, e i’u ai i puapuaga ma le faafanoga.

TUSI FAITAU: 1 Timoteo 6: 1 – 10

MATUA: 1 Timo. 6:10, “*Auā o le mana’o i tupe, o le pogai lea o mea leaga uma lava; ua manana’o tele i ai nisi, ona sesē ai lava lea o i latou i le faatuatua, ua tu’ia ai ua ati i latou e i latou i puapuaga e tele.*”

Faaliliuga Tusi Faitau Aso:

O ai e lē mana’o i tupe? Atonu o se mea mālīe le tupe i le mau’oa, ae mo le toatele o tagata matitiva, o tupe e lē o se mea ula. O tupe, oloa ma tamaoa’iga e i ai lo latou fesoota’iga ma le faatuatuaga Kerisiano. Talu mai le aso na talepe ai e Mose le tupua povi auro, e lē o toe saogalemū le tuaoi o le tupe ma le faatuatua. O loo tulaga tutusa pea le ‘oa ma le Atua i le ola mulimuli o le toatele o tagata lotu. O le a’oa’oga a le Ekalesia faasino i le ‘mana’o i tupe’, ua tele ina limata’ita’ina sesē ai tagata i le uiga moni o lea mataupu, a o faasaga Ekalesia e saili, tolo’a’i ma faaputu le faitau miliona tala(\$) ma pauni(£) - o se mea faafoliga tele! O le toatele o i tatou ua iloa le mafuli i le faaletino o aso nei, ua sili atu ona tāua oloa nai lo tagata, ma o loo avea pea le tu’inanau ma faalavelave i ala o le Alii. Peita’i tatou te lē au atamamai lava; na o se toaititi ua iloa le mea e gata ai le mana’o. O le ola i se olaga ua faamalīeina i mea ua foaiina mai e le Atua, e aumai ai le tamaoa’iga e fou ma sili atu nai lo le ‘oa o tupe. Afai e fua le lava i mea e mafai ona faitau, o lona uiga e lē toe umi se taimi ae faaumatia sosaiete ma faalapotopoto o tagata. E tele faailoga ma faailoilo o lenei tulaga, o loo si’omia ai tatou i aso nei.

FESOASOANI MO FAIA’OGA:

E tāua ma aogā le ‘oa ma tamaoa’iga, ae maise lava i tupe, i le olaga o le tagata ma ana fuafuaga. E faigofie ona faatino galuega, atina’e ma faalavelave fai pe afai e tele tupe; ae faigata ma faanoanoa le mativa e tau faasoaso ma tau auau ma’a. E finagalo le Atua ia tatou ola fiafia ma ola manuia i soo se itu, ae ‘aua ne’i o tatou ola pagatia i le matitiva, matelaina ma ūa fālōlō.

Peita’i o le **mana’o** ina ia tele tupe ma ia faula’i mai le ‘oa, ua avea lea ma faafitauli, ma ua ta’uleagaina ai fua tupe ma oloa o mea aogā. O loo manino le mataupu a le aposetolo o Paulo ma lana a’oa’oga ia Timoteo faasino i le **mana’o** i tupe. O totonu o le loto o le tagata e pogai mai ai le leaga ma le agasala, ona o le loto e tu’inanau, mana’o tele ma mana’o lasi i mea o le lalolagi. Pe afai e faasaga atu le loto o le tagata i mea faaletino, ona leai lea o se avanoa i le loto e mafuta ai ma alofa ai i le Atua. Afai foi e faalagolago i le tele o tupe, o lona uiga ua lē faalagolago i le Atua ma lona alofa.

Ua avea foi le tele o tupe ma oloa a nisi tagata, ua lē alolofa ai ma ua vaai maualalo i nisi uso. O le tala i le mau’oa ma Lasalo (Luka 16:19 – 31) o loo manino ai le va va mamao o tagata ona ua sili atu le alofa i tupe nai lo le alofa i tagata. O loo faasā i le tulafono lona sefulu (Esoto 20:17) le mana’o, ona e manu’a ai le va tapuia, ma afaina ai le va nonofo lelei o tagata. O nisi a’oa’oga a le Tusi Paia faasino i le leaga o le mana’o i tupe ma isi mea faafiafia o le olaga:

i). ‘Aua tou te tolo’a’i ‘oa mo outou i le lalolagi, o i ai le mogamoga ma le ‘ele e faaumatia ai; o i ai foi tagata gaoui e ‘eli atu ma gaoui ai. (Mata.6:19)

ii). ‘Aua tou te mana’o i le lalolagi, po o mea o i ai i le lalolagi. Pe afai e mana’o se tasi i le lalolagi, e le o ia te ia le alofa i le Tama. (1 Ioane 2:15)

O se a’oa’oga lelei mo tupulaga ma le fanau, le faamalolosi e galulue ma lūlū, ia ola ati a’e ma saili malo mo le manuia o aiga ma le Ekalesia,

pe a oo ina selesele. Ia faamasani foi e talia ma le fiafia faamanuiaga o tupe e maua mai i totogi ma tau'i o galuega e fai. Ia talisapaia ma le loto faafetai, ua selesele i mea sa lūlū ma tautigā ai. Ae peita'i, ia faautauta i le mana'o tele, ma le mana'o vave ina ia tele ni tupe, tele ni totogi ma nisi faamanuiaga. Auā o le mana'o i tupe, e sosoo ma le gaioi ina ia maua mai tupe. Ua toatele tupulaga ma fanau lalovaoa ua falepuipui, ona ua gaioi tupe a falefaigaluega ma isi tagata, e faamalie ai mana'oga i mea faafiafia o le olaga.

Ia faamasani i le ola faamoemoe ma faalagolago i le alofa o le Atua ma lana faamanuia e maua ai mea uma e tatau mo le olaga. 'Aua le ola faatusatusa i isi tagata o loo maua mea ma tele a latou tupe, auā o le isi lea pogai o le mana'o ia tele tupe. Ia gata le mana'o i mea ua maua. 'Aua foi le popole pe faapefea a taeao. O loo silafia e le Atua mea e tatau ona foai mai i lea aso ma lea aso. Tau ina talitonu ma faalagolago i le Atua, ona faasoasoa mai lea e Ia mea e tatau mo le aso i le olaga atoa.

GALUEGA FAATINO: Faasoaga ma Lufilufiga o Tupe:

- i). O a uma ni auala e te iloa, o loo maua ai tupe a le tou aiga? A o a uma ni auala o loo fa'aaoga i ai?
- ii). Afai e tuuina atu ia te oe se tupe \$100 e faasoa, o le a lau faasoaga e fai? (O se avanoa lelei e faamasani ai le fanau ina ia iloa le mea e ave i ai le faamuamua, i le fa'aaogaina o tupe).

O nisi nei vaega e tatau ona faamuamua:

- (a). Meaalofa mo le Faifeau (\$10)
- (e). Meaalofa mo Matua auā le tausiga o le aiga (\$40)
- (i). Teu se tupe i le Faletupe e faaleoleo mo le lumana'i (\$20).
- (o). Faatau meaa'oga manaomia (\$10)
- (u). Meaalofa mo tagata puapuagatia o le aulotu/nuu (\$20).
- (f). E mulimuli lava ona fa'aaoga i telefoni, tifaga ma tifiga eseese.

A'OA'OGA:

1. E tāua tupe e pei foi o isi meaalofa a le Atua, ae leaga le mana'o tele i ai.

2. Ia faamalosi e galue ina ia selesele mai tupe e tausii ai le aiga.
3. Ia lelei le faasoaga o tupe, ma iloa le mea e ave i ai le faamuamua.
4. Ia faamasani i le teu lelei ma faasao tupe i faletupe (save & invest), ae ‘aua le fiafia e maua loa ma fa’aaogā.

TATALO FAAP’U:

Faafetai le Atua mo au meaalofa o tupe, e faatino ai o matou faamoemoega. A’oa’o mai ma lavea’i i matou, mai le mana’o tele i tupe, e maua ai matou i mailei a le tiapolo.

Amene.

.....

ASO SA: 19 FEPUARI 2017

MATAUPU: UA AVEESEA LE MASIOFO O VASATI(Queen Vashti deposed)

SINI: Ia a’oa’oina le vasega ia malamalama o le lē mafai e le masiofo o Vasati ona alu ane i le feau a le tupu na o atu ai eunuka, ona matuā ita ai lea o letupu, ua tupu tele lava le tigā o lona loto.

TUSI FAITAU: Eseta 1: 1 - 20

FESOASOANI MO FAIAOGA:

I le tusi sa faitauina, lea o loo taua mai ai le vaiata tonu lea na tulai mai ai Asueru i le lona lima o tupu i le nofoaiga o le malo Peresia (486 – 465 BC), a faitau i le tala, o loo maninolelei mai ai lava le mafuaaga o le aveesea o le tofi masiofo o Vasati. O le tolu o tausaga o le nofoaiga a le tupu o Asueru lea na ia faia ai se taumafataga tele poo se fiafia e faailoa atu ai le malosi o lona malo aemaise o lona tamaoaiga na iai, ma tau fuafuaina ai se taua e osofaia ma faatoilaloina ai le malo o Eleni.

E selau valusefulu aso o lea fiafia tele. O le ala lea na manatu o ia i se auala e faailoa atili ai lona malosi ma lona tamaoaiga. O lea sa ia manatu ai e sau lana masiofo o Vasati e faafiafia i ona luma atoa ma e mautulaga i lona malo (officials) o lea sa ia auina ai loa e le tupu ana auauna poo (eunuka) e faaoo lana feau ia Vasati lana masiofo ina ia alu ane e faafiafia i luma o le tupu atoa ma alii sili o lona malo, auā e lalelei tele o ia. Peita'i, sa lē mafai ona alu ane Vasati e tusa ma le feau ale tupu na ave atu.

Sa toasa tele le tupu ma na ia fesiligia ai loa alii sili po o le a so latou manatu ina ua lē alu ane Vasati e pei ona poloa'iina ai, peita'i na faailoa e alii sili o le mea na faia e Vasati e le gata ina lē usita'i i le tupu ae o lona lē usita'i lava lea ile pulega atoa a lona malo, ma e ono tutupu mai ai ni vevesi pe afai o le a lē faalogo malē usita'i fafine i a latou tane. O le mafuaaga foi lea na faia ai loa ele tupu le poloaiga malosi ina ia taofia ai ni fevesiaiga e ono tula'i mai pe a fai o le tulaga lea o le lē usita'i o fafine ia latou tane, ma sa faasaina ai loa ele tupu o Asueru Vasati ona toe oo atu i lona maota, ae ua ia finagalo loa e toe saili seisi ana masiofo e sui ai Vasati.

GALUEGA FAATINO:

Vaelua le vasega i tama ma teine. Faatino se fetufaaiga e ala i le finauga (debate). O tama e faia manatu e tonu ai le tupu. O tamaitai e faia manatu e tonu ai Vasati.

PESE: 82 (Pese ma Viiga)

A'OA'OGA:

1. E taua le usita'i i o tatou ta'ita'i auā o tofiga uma lava e aumai i le Atua lea.
2. E faamasinoina e le Atua tagata uma ma faasaoina e ia o e fai le amiotonu.
3. E taua le malamalama lelei o le tasi i le tasi e mafanafana ai mafutaga.

.....

ASO SA: 26 FEPUARI 2017

**MATAUPU: UA FAATAUTAUINA HAMANU
(Haman hanged)**

SINI: Ia a’oa’oina le vasega ina ia aloalo ese mai le ola taulamalama ma le faufau leaga i le isi ou uso a tagata.

TUSI FAITAU: Eseta 7: 1 – 10
FESOASOANI MO FAIAOGA:

O Hamanu, e tupuga mai i le aiga o sa Akakō, o le atalii ia Hametatu. I le taimi na tupu ai Asueru i le malo o Metai ma Peresia, sa fai ai o ia ma alii sili i le maota o le tupu. O le taimi foi lea na fai ai le tamaitai mai sa Iuta, o Eseta lona igoa ma masiofo a le tupu o Asueru.

O Eseta o le afafine o Aviaila, o le uso o le tamā o Moretekai, ae na fai ma afafine o Moretekai, o le ala lea e fai mai ai isi o Eseta o lona tamā Moretekai. E le’i faigofie ia Moretekai ma Eseta faufauga a le tagata lenei o Hamanu, ina ia fasiotia uma tagata sa Iuta.

O le mataupu lenei e 7, o le aso lona lua lea na fai ai le taumafataga ua faaigoaina o le taumafataga o le uaina a le tupu. Na fesili i ai le tupu i le masiofo po o le a se mea e mana’o i ai, ua oo lava i le vaeluaina o le malo ua ofo atu e le tupu mo le masiofo o Eseta. Peita’i, o iina na maua ai loa i le tulimanu ma Hamanu le tagata taulamalama, faamaualuga ma le faufau leaga. O Hamanu o le ata o le tagata e saofai loa i tofi maualuluga galo loa le isi ona uso a tagata. Ua uma ona tapena e Hamanu le laau e faatautau ai Moretekai ma tagata sa Iuta, ae Talofa e ia Hamanu ua le taulau o lona faamoemoe.

Le tuualalo a le masiofo loto nuu, le teine loto alofa. “Le tupu e, afai ua alofaina a’u e oe,afai e lelei foi i le tupu, sei e faaola mai ia te a’u i lo’u ole atu, ia faaola foi lo’u nuu i lo’u faatoga atu...” Ua faalogo Eseta o le a faaumatia lona nuu i le sau o lenei tagata o Hamanu. Ona fai atu

lea o le tupu, o ai le tagata o loo ia faufau lenei mea leaga?. Fai mai Eseta o le tagata leaga lena o Hamanu. O loo faafesagai ma le tupu ma le masiofo Hamanu, ua te'i le tagata leaga ina ua tautino atu e le masiofo ana auala piopio o loo fafau.

Peita'i, ua alofaina e le tupu o Asueru, Eseta ma lona tamā o Moretekai, ina ua iloa e le tupu faufauga leaga a Hamanu. Ua tula'i le tupu ma ua fealualua'i i le fanua ma lona ita tele i le mea ua tupu. Peita'i, e toe foi atu le tupu i lona maota o loo faapaū faō Hamanu i le moega o loo i ai Eseta. Fā le tupu ua faamalosī e Hamanu lana masiofo, ma ua atili ai ona tiga le finagalo o le tupu. Na valaaū atu le tupu i ana auauna ina ia avatu ia Hamanu i fafo, ae valaaū atu le tasi eunuka o Harepono lona igoa, o loo i ai le laau na saunia e Hamanu mo Moretekai o loo i luma o lona fale, o le laau e limagafulu kupita lona maua. Ma o lana laau lava lenā na toe tautau ai. E le taunuu a i se taunuuga lelei le tagata na te faia se mea leaga e leaga ai le isi tagata. O le faafitauli tele lea o loo vaaia pea i nei aso i mafutaga i totonu o aiga, nuu o le atunuu, ma ua oo lava foi i le talalelei a Iesu Keriso, o le ola taulamalama, faufau leaga ae sili pe afai e pulea e le faamaualuga le loto. O ituaiga uiga ia e na o le vevesi ma le maua ai se nofo lelei. Ua oo lava foi i totonu o aoga, ua felamata'i ma o le ala lena o le tutupu o vevesi i le va o aoga. Ia tatou 'alo'alo ese mai nei uiga e le talafeagai mo lo tatou ola.

GALUEGA FAATINO:

Ia faatino e le vasega le tala o loo i le tatou Tusi Faitau, e faailoa atu ai i lau susuga i le faiaoga ua malamalama tamaiti i le tala.

O tagata autu - o le tupu o Asueru, Eseta, Moretekai, Hamanu ma Harepono (eunuka)

PESE: 219 (Pese ma Viiga)

A'OA'OGA:

1. Aua e te faia se mea leaga e te le manao e fai atu e le isi ia te oe.
2. E leaga le ola taulamalama i le isi ou uso a tagata.

3. Ia loto alofa e pei o le masiofo o Eseta.
4. Ia tatou ‘alo’alo ese mai le ola taulamalama ma le faufau leaga.

.....

ASO SA: 5 MATI 2017

**MATAUPU: O LE FAANOANOA O LE ATUA
(The disappointment of God)**

SINI: Ia malamalama le vasega, e finagalo le Atua ia tumau le feso’ota’iga ma i tatou i taimi uma, ae le o le tatou ola i le agasala e inosia e Ia.

TUSI FAITAU: Kenese 6: 5 – 8

FESOASOANI MO FAIAOGA:

O le faatoateleina o tagata i le fogaelele e tusa ma le foafoaga paia a le Atua, e le faavavau lo latou ola ai, aua ua na o tagata i latou. Ua uma ona faataoto e le Atua o latou aso e selau-luasefulu tausaga e ola ai. O se olaga ua faamanuia i ai le Atua, e le gata i vaega eseese o lana foafoaga, ae ia manatua pea e le tagata lona Atua, e feso’ota’i pea i ai ma avatu ia te Ia le viiga.

O le olaga agasala o tagata i le taimi o Noa, ua a’oa’oina ai tatou i le soifua alofa ma le tuu avanoa mai o le Atua i le tagata agasala, e suia ai ma liliu atu i le feso’ota’iga ma le Atua, mai o latou ala agasala. O le 120 tausaga o le soifua, ua fa’aalia ai le onosa’i o le Atua ia i tatou, e taofia ai o tatou ala leaga o ola ai, ae ia liliu atu mo le faamagaloga o a tatou agasala.

Na silafia e le Atua i le taimi o Noa, ua matua faatuputeleina le leaga i tagata o le lalolagi. O se olaga e ui ina malolosi i le tino, ae ua aafia ma pulea o latou ola faa-le-Agaga e le faama’i o le agasala. O mafauauga i o latou loto ua na o mea leaga ma le agasala, ma ua matua momotu lava

e amioga mataga ma le faalumaina, lo latou feso'ota'iga ma le Atua. O lona uiga, ua fa'aalia ia latou amioga inosia le afuaga o le natura agasala o le tagata, lea ua pouliuli ai i lana vaai le Atua. O le agasala o faapogai mai i manaoga ma mafaufauga leaga ua nofo i totonu o le tagata, ina ua faaososoina o ia e le tiapolo. Pe afai e tosina ma maileia le loto e ia tuinanauga leaga, ona fanau mai ai lea o le agasala. O le mea moni lava, e faaososoina tagata uma e le tiapolo, peita'i o le tagata e faatuatua ma faalagolago ia Iesu, e mafai lava ona tete'e atu i faaososoga e agasala ai, ma ia talia le upu a le Alii i taimi uma o le ola. O le olaga lea o tagata i le taimi o Noa, ua matua maoa'e le amio leaga ma ua faaleagaina ai o latou loto, aemaise le lalolagi matagofie. "Ua matua le agasala ona fanau mai ai lea o le oti." (Iakopo 1: 13 – 15)

O le faapogai lea o le Faanoanoa o le Atua, aua e inosia i ona fofoga le agasala. O Ia o le Atua paia, ma alofa e leai sona ila. O Le na faamaufailogaina ma faamaonia i latou e fai mo Ia, e ala i lona Agaga Paia, se ia oo i le aso e faaolaina ai i latou. Peita'i ua latou faatiga i le Agaga o le Atua, o le ala lea o le leai o se faamagaloga mo i latou, ae o le a soloieseina mai le fogaeleele (Efeso 4: 30). O lo latou inu pea i le suamalie-a-niu-aati o le amio leaga, sa manatu ai ua leai se sala e oo mai ia i latou. E faapea lava le agasala ma lana taaviliga i totonu o le tagata ua nofo tumau ai, e pogisa ia te ia le Atua i taimi uma ma e faaliloina foi i lana vaai le faamasinoga tonu a le Atua o le a oo mai. Ua oo i le taimi e mou e se atu ai le onosa'i o le Atua mai le tagata amio leaga, ae faafualoaina pea aso o le tagata ola mata'u, amiotonu ma feoa'i faatasi ma le Atua pei o Noa.

O se itu matagofie lea o le tala, ua fai ma mataupu e a'oa'o mai ai tatou le fanau i lenei Aso Sa. O le faaiuga o le parakalafa na faitauina, ua fa'aalia ai e toatasi lava le tagata saunia ma faalogo i le Atua, ua na o Noa. . O le tagata mata'u i le Atua, ma na iloa atu le alofa tunoa o le Atua i ona fofoga, a'o siomia o ia e le agasala a tagata. O lona faatuatua i le Atua, na ia maua ai le amiotonu lea na soifua ai o ia ma a'oa'o ai pea lona toalua ma lana fanau. O galuega o le faatuatua, na usita'i ai i le Alii ma faia feau uma na faatonuina ai o ia e fai, pei o le fauina o le vaa. E ui i le faanoanoa o le Atua i le lalolagi agasala, ae talitonu lava o Ia, o se amataga fou i se lalolagi fou, e ao ina fausia mai i

se tagata ua faatuatua i le Atua foafoa, ma se tagata ua faasaoina ma manumalo mai tauiviga o le agasala. Na maua e Noa le alofa tunoa sili o le Atua, na mafai ai ona ola usita'i ma loto maulalo i le amiotonu a le Atua. E le gata i lea, ae o le amiotonu e le fefe ai e tete'e atu i e faamaualuluga i le malosi o le tino, aemaise o faiga agasala.

O le mea moni, e tele taimi e faaleaogaina ai se taumafaiga, e faalatalata mai i se tagata agasala, mo se olaga lelei i le Atua. Afai na tualaga Noa ma folafola i le afe o tagata le suafa o le Atua, ae latou te le liliu lava, o foliga na o loto ua matua palapala ma nofo tumau ai le agasala. E faapefea ona mafai ese tagata e toatasi, pe afai e silisili i le tagata agasala faiga sau ma faatinoga mataga, o gaua'i atu i ai o latou loto? E pei foi o lo tatou lalolagi o tatou ola ai. Ua fia ni taumafaiga e taofia taua, le fasioti tagata, eseese i le va o tapuaiga ma le tele o isi mea. Peita'i, o mafatiaga, o sauaga ma le tupu pea o le agasala, o loo i ai faatasi lava ma fofoga alofa o le tatou Atua. E ui ina faanoanoa ma tiga lona finagalo i tulaga ma foliga inosia ua aafia ai ona tagata, ae o lona finagalo, e le o o tatou manatu ia. O ona ala foi, o ala lava o le malamalama ma le ola mo le tumau ma le lē faagaetia ia te Ia.

O le faatinoga ua faia e le loto e tasi ua naunau ma faalogo i le Atua pei o Noa, e mafai ona faatonutonu ai foi lo tatou ola feso'ota'i ma le Atua, a o tatou vaavaai atu i le taifana'e o amioga ma faiga agasala i lo tatou lalolagi. Toatele aiga ua faamagalo atu i le au fasioti tagata, ua faaoo le oti ma faia gaiioiga mataga i a latou fanau pele. Toatele foi tagata ua faaumatia le ola, a o ofo atu auaunaga mo se filemu i vaega o le lalolagi o fetaua'i ma tupu ai misa. E ui ina taotaomia ia i'uleo itiiti ona o le sau ma le matuitui o faiga a le tiapolo, peita'i o loo soifua pea lo tatou Atua ma faafofoga mai i sauaga a le agasala.

O le amiotonu a le Atua, e le mafai ona tuuaia ma finauina e so o se tagata. E finagalo o Ia, ia ta'uamiotonuina tagata uma, e oo lava i le tagata agasala, e ala i le salamō ma le faatuatua. O iina e tasi ai le tagata agasala ma le Atua e ala i le taliaina o Iesu Keriso, e fai ma faaola i le olaga. O lona maliu ma lona toetu manumalo, o lona tuuina atu lea o lona soifua, ia ola ai le tagata agasala, ma ulufale atu e mau faatasi ma le Atua. Aua sa vavamamao le tagata agasala ma le Atua, ae

o le Taulaga o le Faaolataga na faia e Keriso, ua tino e tasi ai le tagata ma le Atua.

GALUEGA FAATINO: (Sailiiliga)

1. Ia lisi mai ni amioga le tatau, e lagona ai le faanoanoa o le Atua, pe afai tatou te faia.
2. O a ni amioga e fiafia i ai le Atua e ao ina tatou fai.

PESE: 134 (Pese ma Viiga)

A’OA’OGA:

1. Ia fai amioga e fiafia mai ai le Atua.
2. Alo ese mai le agasala.
3. Fesoasoani i le ua leaga.

.....

ASO SA: 12 MATI 2017

MATAUPU: **UA TASI TAGATA UMA IA KERISO
KERISO (All one in Christ Jesus)**

SINI: Ia malamalama le vasega, o le faaolataga na saunia e le alofa tunoa o le Atua, ua mafai ona maua e tagata uma, pe afai e faatuatua ia Iesu Keriso.

TUSI FAITAU: Kalatia 3: 23 – 29

FESOASOANI MO FAIAOGA:

O le tusi a Paulo i Kalatia, o se faavae tusitusia lea e faailoa ma faamanatu ai i so o se Kerisiano le saolotoga moni faa-Kerisiano. O le saolotoga moni e afua mai i le galuega o le faaolataga, na saunia e Iesu Keriso, i lona maliu ma lona toetu. E le mai le tausia o le tulafono po o

se isi lava mea. Peitai o le Talalelei mo tagata uma, Iutaia po o nuu ese, mo so o se tasi e faatuatua ia Iesu Keriso.

O Ekalesia e tolu i sauté o Kalatia e pei o Ikonio, Lusa ma Teipe, sa faavaeina e Paulo i lana malaga faamisionare muamua. Na ia a'oa'o ma folafola atu, e faasaoina tagata uma i le faatuatua ia Iesu Keriso, ae le o le tulafono. O le saolotoga foi, auā ua saoloto e alofa ma auauna le tasi i le tasi ae le o le faaleaga e le isi o le isi tagata. Ia tausoa faatasi le avega ma ia feagaleleia'i i so o se mea ma mafaufauga.

Peita'i, ua iloa e le Aposetolo, ua lualuagia le Talalelei a Keriso na ia a'oa'o atu i nei Ekalesia fou e tolu, ma isi talaiga sese. Ma o le ala lea o lona tusi atu i le au-Kerisiano o i Kalatia. O le T.A.49 i totonu o Anetioka, na tusia ai loa e Paulo lenei tusi, ma ia taumafai ai e faasa'o a'oa'oga sese ma talitonuga faa-Iutaia, ma toe valaauina tagata e toe foi i le Talalelei mama. O le faamamafaina e nei a'oa'oga sese o le tulafono faapea e ola ai, ua lē o lena le ala e maua ai e le Kerisiano moni lona faolaina. O le Talalelei i le Faaolataga na faia e le Atua i lona alofa tunoa, e le mai se tulafono po o se isi lava sailiga a le tagata. Ua na o le faatuatua lava ia Keriso Iesu. O le faatuatua ia te Ia i lona maliu ma lona toetu manumalo, o le sa'olotoga lena mo tagata uma.

Ua faamanatu atu e Paulo i tagata Kalatia, a'o lei faailoa atu ia i latou le faatuatua ia Iesu Keriso, sa saisaitia ma taofia i latou i le pule a le tulafono, na agasala ai. Sa faapologaina i latou i amioga sese na fai. E ui lava ina latou iloa e sese, ae sa fiafia e faataunuu, aua o o latou manaoga ia na faanaunau i ai o latou loto. O le tulafono, ua faapei o se taitaitama (tutor). E faatatau i se a'oa'oga e tuuina atu i se tamaitiiti laitiiti. E ao ina vaavaaia ma mataituina i taimi uma. E saisaitia ai o ia i taimi uma ma le maua ai sona saolotoga. E a'oa'o mai ai o ia i taimi uma ma le maua ai sona saolotoga. E a'oa'o mai foi e le tulafono ia i tatou le manao o le faaolataga, aemaise le taitaiga mo le ola. Peita'i e le mafai ona lavea'iina ai i tatou e ala i le tausii i ai, sei vagana ua tatou faatuatua ia Keriso. Ua silafia e le Atua, ua tatou pologa ona o le tulafono, ma ua ia saunia le ala e tasi tatou te sosola ese ai, o lo tatou faatuatua lea ia Iesu Keriso. A aunoa le tagata ma Keriso, o le a tumau pea ona taofia ma uu-mauina e le agasala. O le mea lea e moomia ai le tuuina atu o lo tatou faatuatua i le Alii, aua o Ia lava e toatasi na

faasa'olotoina oe ma a'u, ina ua Ia manumalo i le oti ma le tuugamau. O le manumalo ua le toe pule ai le agasala ona o le tulafono, ae o le alofa tunoa o lo tatou Atua.

O le tauologologo a le Aposetolo mo Kalatia, e ao ina manatua lelei e i latou, ua uma ona papatisoina i latou ia Keriso, ma avea ai o tagata ua faafouina faa-le-Agaga le ola, e sauni e tauave tiute ma matafaioi faa-tagata talitonu i le Alii. Ia manatua foi, ua tuueseina o latou ofu tuai o le tulafono, ae ua faaofuina ia Keriso, i ofu fou o le amiotonu ina ia tasi ai tagata uma ia Keriso Iesu. Ua faamamafa atu e Paulo, o le taunuuga manuia e oo i ai le ola o so o se tagata talitonu i le Alii, pe a tumau le ola faa-le-Agaga soso'o atu ia Keriso. O le faaolataga lea ua ia saunia i lona maliu ma lona toetu, e mo tagata uma ua faatuatua ia te Ia.

Sa esee ma va le tagata ma le Atua ona o le agasala, ae ua faia e le Atua le togiola (atonement at one) e ala i le maliu ma le toetu manumalo o Iesu Keriso. O se galuega ua togisala ai le Atua e ala i lona Alo pele ia tatou agasala, ina ia tasi ma toe soso'o faatasi i tatou ma le Alii. Ua avea ai Iesu, o se feso'ota'iga o itu e lua, i le tagata ma le Atua, ina ia toe atia'e se leleiga tumau e agavaa ai le tagata faatuatua ona maua le faaolataga ua Ia saunia. O le tasi ia Keriso, ua lē na o oe ma Keriso, ae o oe i le isi ou uso ia maua faatasi le fealofani e iloa ai ona ola i le amiotonu ua finagalo i ai le Alii.

Ua a'oa'o mai lenei mataupu ia i tatou le fanau, ina ia tatou iloa lelei ai, e finagalo le Atua ia tatou ola i le fealofani ma fai lana amiotonu i taimi uma o le ola. A tatou vaai atu foi i lo tatou lotoifale, ua vevesi tamaiti aoga, ua fetauai ma va aiga, i le sailiga o le pule o le suafa matai ma fanua. Toatele ua lē fiafia i lotu i aiga ma le Aso Sa. Ua lē amanaia e le au maumea le tagata mativa. I le lalolagi foi latou, ua matua leai lava se tasi i tagata, auā ua malosi le faailoga lanu, ua oo a i lotu ua feainai tagata Kerisiano ma le au Musalemi.

Manatua le fanau, ua na o Iesu lava e mafai ai ona tatou tasi, pe afa'i tatou te talitonu ma faatuatua. O Iesu Keriso na tauave a tatou agasala i lona lava tino i luga o le satauro. O ona manu'a lea ua maloloina ai i tatou. Ua tasi ai tatou uma ma le Atua ona o le togiola na faia e Keriso Iesu.

GALUEGA FAATINO: Taliga Fesili

Tali mai i Fesili nei:

1. O le a le pule na taitai ai tagata ao lei oo mai le faatuatua?

Tali: O le pule a le tulafono.

2. O le a le taitaitama na ola ai tagata, a o lei maliu Keriso?

Tali: O le tulafono.

3. O le a ua na suia le taitaitama i le ola fou o so o se Kerisiano talitonu?

Tali: O le faatuatua ia Iesu Keriso.

4. Afai ua tatou faatuatua ia Keriso Iesu, o le a ua ta'ua ai i tatou e le Atua?

Tali: O atalii/afafine o le Atua.

5. Afai ua tatou oofu ia Keriso, o le a lona uiga?

Tali: O lona uiga ua tatou ola i le amiotonu a Keriso.

6. O ai na faia lenei tasi?

Tali: O Iesu Keriso i lona maliu ma lona toetu.

7. Po ua tasi tagata Samoa uma i lau vaai?

(a) (Afai ua tasi, ta'u mai ni vaega ua e iloa ai.)

(e) (Afai e leai, ta'u mai ni mafuaaga na e iloa ai)

(Silasila toto'a le faiaoga i tali o fesili 7)

PESE: Ua tasi le faavae

A'OA'OGA FOU:

1. Talia Iesu Keriso i lou olaga.

2. E finagalo le Alii ia tatou tasi ma Ia.

3. Faatuatua ia Iesu Keriso.

.....

ASO SA: 19 MATI 2017

MATAUPU: PESE MO LE SIOSIOMAGA OLA LAUUSIUSI (Sing Green)

SINI: Ia malamalama le vasega, e ao i le tagata soifua ona viia le Atua, ona o le matagofie o lana foafoaga ua tatou ola fialia ai.

TUSI FAITAU: Kenese 2: 4 - 17

FESOASOANI MO FAIAOGA:

O le vaiaso leni ua faamanatuina ai le taua o le siosiomaga, i mea uma na faia e le Atua, ua faalagolago i ai le tagata ola. O se toe fafagu i o tatou tagata ma le lalolagi atoa, le feso’otaiga taua i le va o tagata ma mea uma o le foafoaga, aemaise lava i matafaioi ua tuuina mai e le Atua i le tagata, e avea ai ma tausi mea a le Atua mo lana foafoaga. O loo vaaia i le lalolagi le tumau pea o le matagofie o nisi mea, ae o nisi foi mea, ua i ai suiga mai le matagofie ma le ola lausiusi, na i ai, i vaaiga faaletonu ua i ai i le taimi nei.

O le tala o le foafoaga i le Kenese muamua (1), o loo agai le faamamafa i le **pule** tuuina atu i le tagata i mea ola uma na faia e le Atua. Peita’i, o le tala o le foafoaga sa tatou faitauina i le Kenese 2, o loo agai lona taua ile tulimataia o le **tausiga** a le tagata i meaola uma o le foafoaga i le lalolagi. O meaola uma i le lalolagi na faia e le Alii le Atua e ala i lana upu foafoa, aua o Ia lava o le ola. O se siosiomaga ua le na ona faataoto ma tuuina atu i ai le ola. Peita’i o le foafoaga a le Atua, ua ia finagalo i ai, ia i ai ni tagata ola, o e ia soso’o faatasi ma Ia i lana galuega foafoa. E manao o Ia ia au i tatou ma Ia i le tausiga ma le faatumauina o le siosiomaga ola lausiusi.

Ona faia lea e le Alii le Atua o le tagata i le efuefu ma le eleele, ma manava i ona pogaiisu le manava ola ma avea ai ma tagata ola. O le efuefu (dust), ua na o semea e itiiti sona aoga, e feso'otai ma le leai sona taua po o le maualalo foi sona tulaga (Kenese 8: 27; 1 Samuelu 2: 8). O le faia o le tagata i le efuefu e leai se ola, ua na o se atigimea i le vaai. Ae ina ua manava i ai e le Atua le manava-ola, ona ola lea. O lona uiga o lo tatou ola ma lo tatou aoga, e mai le agaga o le Atua. O taumafaiga, le malosi ma le poto ua gaioi ai le tagata, e lē mai ia te ia lava, ae o le Atua foafoa ua foa'i mai meaalofa o le ola, aemaise lo tatou ola ia aoga e tausia ai ma saga galueaina ai le laueleele ia tumau lona matagofie.

I le tala o le foafoaga paia a le Atua, ina ua uma ona faia le tagata ma tuuina atu ia te ia le agaga ola o le Atua, ona Ia tuuina lea o ia i le faatoaga i Etena. E lē o se aai o se tupu ua na ona saofai ma auuina mai tagata ia te ia i mea uma. Peita'i o le faatoaga e moomia le faato'aina ma tausia lelei. Ua i ai iina le faamoemoe o le Atua i se feso'otaiga o le tagata ma le foafoaga, o lana auuina i le tausia lelei o le foafoaga, aemaise lona vava lalata pea ma le Atua i le puna o le ola. Ia lē fiafia ma loto atu le tagata i mea faigofie ma mea e faamalie ai manaoga, auu o iina e latalata ai i le solia o le tulafono.

O Etena, o le faatusa o le fiafia ma le faamalieina o loto. Ua i ai iina manaoga talafeagai mo le ola ma e le ma faatusalia i ai se faatoaga i le lalolagi. O se faatoaga ua teuteuina i laau ua matagofie i le vaai, ua tamaoaiga foi i laau taitasi ua i ai o latou fua mo meaai mo le ola. Ua le na o faamanuiaga ma le fiafia e maua ai e Atamu, ae i ai foi i iina le saolotoga. Ua faapena foi tatou ile saolotoga ua tatou ola ai i le siosiomaga mama ma le lelei na faia e le Atua. O le foafoaga ua faamalieina ai o tatou loto e le Atua, ma e ao foi ona tatou tausii ma galueaina, ma ia tatou auuina ai foi ma le fiafia lana foa'i ua i lana siosiomaga ua tatou nonofo ai. O le mea lea e tatau ai ona tatou pepese fiafia ma viia le Alii, pe a tatou vaavaai atu i le ola lausiusi o le foafoaga, auā ua na ona tatou toto ma tausii i ai, ae o le Atua nate faaola ma faafuaina mai. Na te faasusu i lana meaalofa o le timu mai vaitafe e tele, ma le ea i vasega eseese.

Pe afai e tulimataia pea le faatoaga matagofie a le Atua i Etena, ua mafai ona tatou iloa ai iina le finagalo paia o le Atua i lo tatou faiva faatausi mea i lana foafoaga. O laau e lua – **laau o le ola** ma le **laau e iloa ai le lelei ma le leaga**, sa i ai faatasi lava ma isi laau i le faatoaga o Etena. O le **“laau o le ola,”** o le laau e aoina maua mai ai le ola. O le faailoga o Iesu Keriso ua ia i tatou, o le laau o le ola (Fa’aaliga 2: 7; 22: 2) ma o Ia lava o le meaai o le ola (Ioane 6: 48, 51) o i le lagi. O le **laau e iloa ai le lelei ma le leaga**, ua ta’ua foi o le laau o le faaososoga. Ua fa’aalia ai le finagalo moni o le Atua i le tagata ina ia mafai ona iloa amioga lelei ma le agasala. Pe afai e usita’i ma lelei le va ma le Atua, ona maua lea o faamanuiaga, ae afai e agasala ma leaga e malaia le olaga. O le saolotoga ua i ai le filifiliga ina ia le avea le tagata ma pologa, ae o le filifiliga i le manuia ma le faafanoina.

O le tuu atu e le Atua o Atamu i le faatoaga i Etena, ina ia galue ma tausii faalelei i ai, e manuia ai i le tino, ae ua i ai foi ma le faasinoga i le ola faa-le-Agaga e tumau ai i le mafutaga ma le Atua. O le galue ma atiae le foafoaga i mea lelei, o se tiute tauave lea e finagalo ai le Atua mo le tagata, ina ia faatumauina le ola lausiusi pei ona Ia mua’i foafoa ai le lalolagi. Afai ua fiafia ulua’i tagata i le ola lausiusi o Etena, e faapena foi tatou, pe a tatou galulue e tusa ma le mana’o o le Atua. O lo tatou paie foi ma le augatata e fai galuega o le faatuatua, o lo tatou vava mamao foi lena ma le Atua. O lo tatou tausii lelei o le foafoaga e tusa ma le finagalo o le Atua, e tatau foi ona faapena lo tatou soso’o atu ia te Ia i le ola faalē-Agaga pe afai tatou te iloa o Ia ma galulue.

Ua tatou vaaia i nei aso i le tele o mea o le foafoaga ua faaleagaina ma faatamaia, ona o faiga lē lelei a tagata. Ua punitia punavai o vaitafe ona o le soona ta i lalo o laau i auvae-mauga, ma tatou lē toaaga e toto le vaomatua. Ua faaleagaina le ea mamā nai le amataga, i kasa leaga ua puaina ai le manogi leaga e tupu ai faama’i ma faatamaia ai meaola o le foafoaga. Ma o suiga leaga ua tatou feagai ai i nei ona po, e manatu lava o tiga ia ma mala o lo tatou lē tausii ma vaaia lelei o le ola lausiusi o mea uma, pei ona aumai e le Atua tatou te ola ai. Pe afai e sese la tatou filifiliga i le saolotoga ua aumai e le Atua, o le a faapea foi ona feagai pea ma faigata. E finagalo le Atua, ia tumau pea ona pepese

fiafia i le lalolagi matagofie na Ia aumai i laau, vaitafe, o le sami, vanimonimo, o le malamalama ma le ea, aemaise lana tausiga i lo tatou ola. Tatou te leo tetele ma ola a tatou pesega pe afai e ola lausiusi le siosiomaga. Ae silisili lava ona fiafia le Atua, pe afai tatou te ola aoga e tausi le siosiomaga ma faatuatua ia te Ia.

Na puapuagatia lo tatou Alii o Iesu, ina ia tatou maua le faaolataga mai le Atua. O lona maliu ma lona toetu manumalo, e ui na faia toatasi e Ia i lona lava loto, ae o le alofa tunoa ua tasi ai tatou tagata agasala ma le Atua. Pe afai tatou te salamō moni ia tatou agasala ma faatuatua i lona maliu ona fai leamo i tatou lona Etena fou i le lagi, o le faatoaga faa-le-Agaga a le Atua, o loo pepese fiafia ai le au-faaolaina i le ola lausiusi o faamanuiaga a le Atua.

PESE: 1 (Pese ma Viiga)

A’OA’OGA:

1. O Iesule laau o le ola.
2. Ia tausi i le foafoaga.
3. Vivii i le Atua i mea na Ia faia.

.....

ASO SA: 26 MATI 2017

MATAUPU: E TAITAI E LE AGAGA (Spirit led)

SINI: Ia malamalama le vasega, o le Agaga Paia lo tatou fesoasoani sili i taimi tatou te fetai ai ma faigata.

TUSI FAITAU: Luka 4: 1 - 3

FESOASOANI MO FAIAOGA:

Ua uma ona papatisoina Iesu e Ioane i le Ioritana, ona tatalo lea o Ia i lona Tamā. O lea lava taimi na afio ifo ai le Agaga Paia ia te Ia. O le Agaga na te taitai o Ia i lana galuega tala'i i le lalolagi, ma fa'aatoatoa lona malosi, se ia faataunuu e le Atua lana faaolataga mo le lalolagi, e ala ia te Ia. Mo le faauuina o Iesu e le mana o le Agaga Paia, o le Atua lava lea ua auai ia te Ia, e le gata ia fai ma tupu ia Israelu ae mo le lalolagi atoa.

Ua molimau le Tusi Paia, i le galuega faaola a Iesu i le lalolagi. O se tala'iga e tumu i mea mataga, o mea tiga, mea inosia na faia e tagata ia te Ia. Na silafia lelei lava e Iesu ia mea i lana galuega, ma ua saunia foi o Ia e tali atu i ai, aua ua tumu o Ia i le Agaga Paia. O le amataga lava i le olioli atu o Iesu e tauave ona faiva na faafetoai mai ai o Ia, e le tiapolo i faaosoosoga.

Na ave Iesu e le agaga i le vao tuufua, e faaosoosoina ai i aso e fagafulu, o le nofoaga e feso'ota'i ma mea faigata ma puapuaga. E pa'ū ma taaligoligoa, e tupu ai le fefe pe a mau toatasi ai se tagata. O lona uiga, o le i ai o Iesu i le vao tuufua na o Ia, o le siomia foi lea e faigata, e oo lava foi i le fia maua o se meaai ma se vai inu.

O le ulua'i faaosoosoga, ua osofaia ai e le tiapolo Iesu, i le manaoga e moomia ma e tatau lava ona saili ma maua e le tagata i aso uma o lona ola. *“Afai o oe o le Alo o le Atua, ina fetalai ane ia i lenei maa ia liu areto.”* E manao le tiapolo ia fa'aaoga e Iesu le pule ma le malosi ua te Ia e faatino ai lona manao. Peita'i na tali atu Iesu – *“Ua tusia, E lē na o mea e 'ai e ola ai le tagata.”* Ua ta'u atu e Iesu i le tiapolo, le fetalaiga a le Atua na ta'u atu e Mose ia Israelu, faamauina i le Teuterenome 8: 3. Ua a'oa'o atu e le Alii i le tiapolo, o lana pule e le mai manaoga faa-le-tagata, ae mai le usita'i e faalogo tasi i le Upu a le Atua ma ola i mea uma ua tulei mai lona fofoga. O ana galuega foi e faatonutonu le Agaga Paia, ma e le mo se manaoga mo le tagata toatasi, ae mo tagata uma e talia o Ia i le faatuatua.

O le fa'aali atu e le tiapolo ia Iesu o malo uma o le lalolagi, ma ofo atu ia te Ia le pule, le mamalu pe afai e ifo atu le Alii ia te ia, o se faaupuga ua iloa ai o malo uma o le lalolagi o loo i lima o le tiapolo. Ua mafai ona tatou iloa i mea tutupu i totonu o faigamalo i nei ona po. O taitaiga

piopio ma le ola faatautava, ua avea ai taitai o malo ma atua e tapua'i i ai tagata, ona o le paoa ma le pule saua mai a le tiapolo. Ua ta'u atu e Iesu i le tiapolo, "*E te ifo i le Alii lou Atua, ua na o Ia lava e te auauna i ai.*" (Teuterenome 6: 13) O se faamanatu mo i tatou, e toatasi lava le Atua ia tapua'i ma ifo i ai tagata uma. Ua na o le Atua Soifua. O le pule aoao i mea uma i le lalolagi e oo lava ia Satani ma ana 'au. Sa tapua'i tagata o le Feagaiga Tuai i atua mamate ma faatusa pepelo, ma fano ai le ola. Peita'i le Alii, e tau mai lava i lana fanau, o e ua usita'i ma faia lona finagalo paia.

O le toe sailiga lava a le tiapolo ia Iesu, na ia ave ai i le Alii ma faatu i le tumutumu o le malumalu i Ierusalem. Na faailoa atu foi e le tiapolo ia Iesu, afai o Ia o le Alo o le Atua, ina oso ia i lalo auā e poloai i ana agelu e tausi ia te Ia. O le ave o Iesu e le tiapolo i le tumutumu o le malumalu, o lona lē iloa lea o uiga o tusi e pei ona ia tautala i ai (Salamo 27: 11-12). O Ierusalem, o le totonugalemu lea o le tapua'iga a Isaraelu i lo latou Atua moni e toatasi, ma o le malumalu ma le laueleele e toe foi mai i ai o Ia mo le tualugaina o lana galuega tala'i, e ala i ona puapuaga, lona maliu ma lona toetu manumalo. O le a iloa ai e tagata uma, o Iesu o le Alo o le Atua, ua ia te Ia le mana o le Agaga Paia, e taitai ai tagata uma i le pule a le Atua. Aemaise foi le faatoilaloina o ala eseese o faiga a le tiapolo. Ua alu ese Satani, auā ua manumalo le Agaga Paia o le Alii.

O taimi o faaososoga o le Alii e le tiapolo, e lei tiga ai lona loto, pe na popolevale ma atuatuva ai lona finagalo. E le'i fefe foi ma tau tomanatu, pe se ā e tali atu ai. Na to'amalie pea lona finagalo, auā ua ta'ita'iina lona tuua toatasi e le Agaga Paia. O lana faasinoga lava lea mo i tatou o e ua talitonu ma mulimuli ia te Ia. O le lē malolo o le fili e faafetoai mai lo tatou ola, o vaega masani lava ia e aafia ai lo tatou ola faatuatua. Peita'i e manao le Alii ia aveese ia i tatou le ita, le popolevale ma le fefe, ae ia tatou tali atu o i tatou ua tutumu i le Agaga Paia o le Alii, ua faatuatua i lo tatou Alii o Iesu Keriso, ma ua alofaina i tatou e lo tatou Atua.

O le faaososoga, o le faaosofia lea o le tagata ina ia tosina atu e fai le agasala. O le mea moni foi, e faaososoina tagata uma e le tiapolo, faapei ona faia ia Iesu. E mafai ona tatou manumalo ma faatoilalo i

faaososoga, pe afai tatou te faatuatua i le mana o le Agaga Paia e taitai o tatou lagona i taimi o faigata. O iina e mafai ai ona tatou teena lona taumafai mai e faasese lo tatou ola. Pe a faaososoina le tagata, e le faapea ona ua lē faia le finagalo o le Atua. Peita'i ua o se faailoga o le fiu o Satani e taitai lo tatou ola i feteenaiga eseese o tatou feagai ai i le ola. Pe a valaauina oe e faataunuu ou tiute taua e tusa ma fuafuaga a le Atua, o iina tonu i ou faiva o le a tulimataia e le tiapolo. Pe a tatou malamalama i faaososoga o Iesu, ona tatou iloa ai lea, sa toe foi atu lava Iesu i le mana o le Agaga i Kalilaia, ma o le mana lava foi lea mo tagata uma pe a manumalo i faaososoga.

O le faaososoga, e mafai ona ulufale i le tagata i faitotoa e tolu. E ofi mai i le tagata i tuinanauga o le tino, o tuinanauga o mata ma le faalialia o lenei olaga. Sa faapena ona ulufale atu le faaososoga i le faatoaga i Etena. Ina ua vaai atu le fafine i le laau e lelei lava pe a ai, (tuinanauga o le tino) ma ua matagofie mai (tuinanauga o mata) o le laau foi e maua ai le poto (faalialia o le olaga) ona ia tago ai lea i lona fua, ma 'ai ai (Kenese 3: 6).

O tuinanauga o le tino, o se mea e matuā taita'iina ai le tagata i le loloto ma le mata'utia e faaleagaina ai lona tagata atoa. O tuinanauga o mata, o se ata i le mafaufau ua aumai e mata i le mea ua vaai atu i ai. Pe a uma ona vaai manino i se mea, o le a motusia le feso'ota'iga ma ua leai se avanoa e toe vaai ai i tua, ma iu lava ina faapea ane ai – 'O a'u ua valea!' O le faalialia o le olaga, e faigata ona maitauina, o le pogai lea e matua mata'utia ai lona leaga. O le taimi e oo mai ai i le tagata le faalialia, pe afai e siitia le tulaga ma ua maua le paoa i se galuega. Aemaise foi pe afai e galo i le tagata le Atua, ona ua manatu, o faamanuiaga ua ia maua, e mai ana lava taumafaiga. E aliali foi le faalialiavale, pe afai e faigata i le tagata ona talitonu ia te ia lava, o ia o le tagata sese ma le agasala.

O ala lava ia ma isi e tele na finau atu ai Satani ina ia manumalo ia Iesu. Peita'i ua le liliuina lava le Alii auā sa ia te Ia le malosi moni e ala i le Agaga Paia. O se faasinoga foi lea mo i tatou le fanau, ao siomia le ola e le anoano o faaososoga. Sa a'oa'o foi Paulo i Kerisiano i Efeso – "*Ia oofu outou i ofutau atoatoa mai le Atua, ina ia outou mafaia ona tetee atu i togafiti a le tiapolo.*" (Efeso 6: 11)

E toatele tagata ua pa'u'u'ū atu i faaosoosoga ma ua toilalo ai. Peita'i, e lē toasa le Alii ona ua tatou faiaina i le fili ma ana mailei. E finagalo o Ia ia tatou lagona le loto salamō ma faafouina le ola. Ia loto maualalo ma faanoanoa loloto ona o le agasala. E lē mafai ona faamalieina le Atua i so o se faatinoga a le tagata, tusa lava po o le a se lelei o i ai i le vaaiga a tagata. Sei vagana lava na faia i le loto sa'o ma le agaga maualalo, auā o fua na o le Agaga e fiafia i ai o Ia mo i tatou i taimi uma o le ola. E moomia lo tatou 'au ma le Agaga Paia o le Alii e manuia ai o tatou olaga.

GALUEGA FAATINO: Taliga Fesili

Tali mai i fesili nei:-

1. Po o le a le faaosoosoga?
2. Pe aisea na manumalo ai Iesu i faaosoosoga?
3. O ai tagata e faaosoosoina?
4. Afai e pa'u le tagata i faaosoosoga, pe o le a le mea e tatau ona toe faia e le tagata?
5. Po o le a le Agaga Paia?

Tuu atu i le susuga a le faiaoga, e faamalamalama lelei tali o fesili i le fanau.

PESE: 112 (Pese ma Viiga)

A'OA'OGA:

1. Tete'e atu i faaosoosoga.
2. Ola i le taitaiga a le Agaga o le Alii
3. Tatalo i le Alii i taimi o faigata.

.....

ASO SA: 2 APERILA 2017

**MATAUPU: O LE TAUPULEPULEGA FAALILOLILO
(The plot)**

SINI: Ia a’oa’o tamaiti ia latou iloa, so o se taupulepulegaefai faalilolilo, e masalomia o i ai ma se faamoemoe e le lelei. O le vaivaiga lea o lapataia tatou, ia taumamao mai ia ituaiga taupulepulega.

TUSI FAITAU: Mataio 26: 1 – 5

FESOASOANI MO FAIAOGA:

O tala faamaumauina o le galuega a Iesu i le lalolagi o loo iloa i tusitusiga ia a Mataio, o lea ua tu lalata i toe aso o lana galuega. O aso tumutumu o le aai o Ieruselema, ona o aso faailogaina faa-le-tapuiga, e pei o le Paseka, lea toe lua aso ona taunuu lea i ai. O le vaitau tonu foi lea o le tumutumu, ua fuafua e Ositaulaga ma toeaia e faisotia ai Iesu; auā o le autū tonu lea o la latou fono sa faia i le maota o Kaiafa le Ositaulaga sili.

Sa faatelegese laitiiti la latou fuafuaga, ona o le popolega, ina nei vesia le tumutumu o le Paseka, ma iloa ai le mea leaga o latou manatu i ai. Peitai, e leai se mea e lilo i le Alii, e pei ona sa ia muai ta’u atu lona puapuaga i ona so’o. E le taofia foi e se isi malosi le Atua, pe afai o le oti, o le ala lea ua finagalo ai le Atua, e auala mai ai lana Faaolataga. E ui a la ina fefefe toeaia ma Ositaulaga ina nei nunu tagata, ae ua saunia foi e le Atua le isi auala, sa ia muai tau atu foi, e ala i le faalataina o Ia, e se tasi o ona so’o na ofo i ai e Ositaulaga ma toeaia tupe. O leni mea e le gata ina matautia, ae le o se mea sa’o foi i la tatou vaai faa-Kerisiano, e ui o lea tatou te le iloa, o loo faia foi e tagata o lo tatou lalolagi o aso nei, ia foi gaoioiga faapea.

O le vaitafe tele o le Amasone i Amerika, ua aveesea uma lava tagata, sa nonofo ma ola a’e ai mai anamua i lea auvai. O le pule a le malo, ua

latou taupule ai se fuafuaga mo se poloketi tau eletise i le vai lea. E moni o i le malo le puleaina o eleele ae le tatau ona faia faamalosi, e aunoa ma le felogonai muamua. Ua leiloloa uma so’otaga tau le eleele sa faafailele mai e augātamā ua mavae. Ua lusi foi so’otaga masani i le olaga o aso uma, auā ua leai se vai, leai ni i’a, ua leai foi ni laau. O le ola foi ua falōlō ma taumate, auā o tatali pea ni fale ma ni mea e tua i ai, sa folafola mai mo latou.

Ua tele tagata ua a’afia i taupulepulega fai faamalosi. O Kerisiano sauaina ma fasiotia tagata ua taotaomia ona o le pule a isi; E oo lava i le natura o mea na faia e le Atua, ua i lalo uma lava ma a’afia i taupulepulega le faautauta a tagata. O le fea malosi ua puleesea ai ma taotaomia ai lo tatou ola? Taumafai ia maua i o tatou tala-faasolopito, o tatou lagonaina le lagona a’afia o nei tagata ona taupulepulega faamalosi, e le gata tatou te iloatino iinā le finagalo o Iesu, ma mafai ai foi ona tatou faia le mea moni o finagalo ai le Alii. O le tala i le soifua ma le galuega a Iesu, o faasino mai ai se ala taua mo tatou; “E auai i filifiliga a le lalolagi, ae le avea i tatou o se vaega o so o se taupulepulega faalilolilo lava, e tete’e atu i fanau a le Atua, po o lana foafoaga paia na fai.

O le a sou manatu i fuafuaga a le malo i nisi o eleele ua leva ona soifua ma ola ai isi tagata; ma nisi manaoga e a’afia ai eleele, i le vaitaimi tonu o a’afiaga o suiga o le tau? O le a sou finagalo i a’afiaga o le pule a matai i nisi aiga, ma nisi afioaga? Ae a le Ekalesia? Taupule faatasi ma Keriso e faavae i le alofa moni, a e le matau tele i tupe ma nisi mea! O le pule alofa faamaoni o le Atua, sa fa’aautu lava i tagata ina ia soifua manuia; Lea na maliu ai lava Iesu lona Alo pele, e ui ina leai sana agasala.

Uiga o Upu ma Fuaitau:

- i) Paseka (f.2) - O le aiga e faamanatu ai le lavea’iina po o le faasaoina o Isaraelu e le Atua, i le po na fasiotia uma ai ulumatua a Aikupito. Ua oo mai i le Feagaiga Fou, o Iesu o le Paseka o le Ola, e ala i le Taulaga o le Faaolataga sa Ia faia, ua ola ai le lalolagi pe a faatuatua.

- ii) Kaiafa (f.3) - O le Ositaulaga Sili. O tofiga faa-le-lotu, ae tofia lava e le Malo o Roma, ona o Roma o ia pulea le lalolagi ma mea uma i ia ona po. O Kaiafa o le tane a le tama teine, (son in law) a le Ositaulaga fafine o Ana. E faapea le tala, o Kaiafa, o le Ositaulaga sili aupito umi lea, e 18 tausaga i le tofi. O lona faufau i lenei mea leaga mo le Alii, ona e au i le malo o Roma, le pule o faatumauina ia i le tofi.

GALUEGA FAATINO: Taliga Fesili:

Saunia pea e lau susuga i le faiaoga ni fesili tou te fetufaai ai ma lau vasega, e te silafia ai foi lo latou malamalama ua i ai i le mataupu.

PESE: 359 (Pese ma Viiga)

A’OA’OGA:

1. O taupulepulega leaga, po o le fai-faamalosi, e le o se amio tatau mo le Kerisiano.
2. ‘Aua nei a’afia tagata i sau taupulepulega.
3. Taupule ma Iesu, e ola fiafia ai.

.....

ASO SA: 9 APERILA 2017 (Aso Sa o le Laupama)

MATAUPU: ONA ULUFAFO AI LEA O IA, UA TAGI LOTULOTU (So he went out and wept bitterly)

SINI: Ia a’oa’o tamaiti ia latou iloa, o le tagi lotulotu, o le tino vaaia lea o se lagona o matuā mafatia ai le lotu. [O le fefe tele ma le palaai o Peteru, sa ia

faafitia ai lona Matai o Iesu, lea e tagi ai ua
matuā mafatia lava]

TUSI FAITAU: Mataio 26: 69 – 75

FESOASOANI MO FAIAOGA:

Tele ia o tagata ua latou folafola a latou mea lelei ua fai mo Iesu. O nisi ua tautino lava o le a le taimi e manao ai le Alii, o le tuai ā o le lei sau o se mea o finagalo ai o Ia. (Come what may) Ae sau le mea o finagalo ai le Alii, ae ua sui foi le tala; Auā foi, e faigofie lava ona fai folafolaga, pe afaī e le o tū i le āāsa o le faamasinoga i le taimi lea.

O le māea o le taumafataga, ua toe lava o Peteru ma le motu o tagata, o latou fia iloa le sa’o, pe na faatasi ia nei ma Iesu. E faatolu lava ona fesiligia Peteru, pe na te iloa Iesu, ae sa tumau lava lona faafitia o Ia, ona o lona fefe tele. O le taimi tonu lea, na vivini ai loa moa, ma ua tuia ai lona fātu, auā ua ia manatuaina nei upu a Iesu sa fetalai atu ia te ia, ua te’i ai, ina ua faalogo i le vivini o moa. Ua tu nei i le laolao, ma ua matuā tagi lotulotu.

E tolu avanoa na tu’u i ai e le Atua ia Peteru, ina ia loto tele ma tautala i le sa’o, ae na te le’i mafai. E ofo auā o le mea sa tupu, sa tatau ona vave tau e Peteru le mea moni. E faapena foi le soifuaga o tatou i ai nei, e ofo pe faapefea ona tatau mo tatou le ola, pe afaī tatou te vavae ioe, ae le sei taofiofi pea, faamoemoe o le a mavae malie atu. E le o iinei Iesu ma tatou i le tino, a’o ana fetalaiga o loo fetalai mai pea ia tatou, i taimi tatou te le o manatunatu ai i ai.

O i ai se mea o e faafitia? O le alu ese mai tigā o le tagi-lotulotu; E sili a lo tatou tautino sao, a’o le’i maua tatou, ma avea loa ma ala tatou te tautino ai e ala i nisi ala tatou te le o mafaufauina.

*(Tamā, e faigata lava ona tautino le mea moni i le amataga. O le tau atu o le pepelo, o le faaiuga faigofie lea, ae matuitui lona taunuuga. Fesoasoani mai ina ia ou ta’u le sa’o ona ou ola saoloto ai lea faatasi ma oe).

Uiga o Upu ma Fuaitau:

i) f. (72) augani - lagona faatauanau/matuā faafiti lava

GALUEGA FAATINO: Taliga Fesili

Saunia lava e lau susuga ni fesili tou te fetufaai ai ma tamaiti, e te silafia ai le iloa ua i ai i le mataupu.

PESE: 165 (Pese ma Viiga)

A’OA’OGA:

1. E lelei le tautala sa’o.
2. O le faafitia o le mea sa’o, e tuliloaina ai e faigata.
3. Ia au ma le Agaga o le Alii i taimi o le palaai.

.....

ASO SA: 16 APERILA 2017 (Aso Sa o le Toetu)

**MATAUPU: UA TOETU O IA (IESU)
(He is risen)**

SINI: Ia a’oa’o tamaiti ia latou iloa ma talitonu, ua toe soifua mai Iesu, mai le oti ma le tuugamau.

TUSI FAITAU: Mataio 28: 1 – 10

FESOASOANI MO FAIAOGA:

“Aua tou te matata’u.” o se fuaitau ta’atele i le Feagaiga Tuai ma le Feagaiga Fou. Sa gagana mai ai agelu i le fuaitau lea. Na malele mai ai foi le Atua! Na fetalai mai ai foi Iesu. O le fefe i le mea e le o iloa; po o mea i le lumana’i; po o ni suiga; po o ni mea foi e le o mafaufauina; e mafai ona vaoia ai tagata, mai lo latou faalogo ma lagona le siufofoga o le Atua. E mafai foi ona vaoia ai tagata, mai lo latou suia o i latou lava, po o lo latou agai atu i nisi laasaga fou o le olaga.

O le faamautinoa mai la, “ ‘Aua tou te matatau’” o se fuaitau taua tele, e amata ai le fesagaiga a le Atua ma tagata soifua. O lenei vaiaso, e pei ona tatou faitau atu, i fuaiupu mulimuli e uiga i le Eseta, e tusa ma le Tala Lelei sa tusia e Mataio; Ua tatou vaavaai ai i le fa’aaogaina e le Atua o agelu e fai ma ana avefeau; O le asō ma le tala sili i mea uma lava; “Ua toe faatuina mai o Ia.” Auā e ui lava na o tinā i le tuugamau ma vaai; ae latou te lei iloa tino; O le fa’aali mai o le agelu i a latou; O le fa’aatoatoaina lea o le mautinoa; ae omai faatasi ma lagona o le fefe ma le fiafia tele! O iinā na latou tamomoe ai loa, e ta’u atu i au so’o. Sa latou manaomia se isi faamautinoa faaopoopo o le toe soifua mai o Iesu lava ia, le na fetalai atu ia te i latou. ‘Aua tou te matatau.

Tupulaga talavou; vaai-lelei ma faalogo lelei, po o ai o faatonu mai ia te oe, po o outou foi. O le fuaitau o le mautinoa, e pei ona faamamafa mai e le mataupu nei; ona o le Atua lea e fetalai mai, e ala i lana agelu. E mafai foi ona ui mai le Atua i se isi auala ese e te le o mafaufauina. Po o lou tinā, po o lou tamā, po o se isi foi ala! O le tāua lenā o le matua faautauta, ma saili i le Atua se fesoasoani mo lo tatou le auga.

Uiga o Upu ma Fuaitau:

- | | | | |
|-----|---------------|---|---|
| i) | f (3): uila | - | malamalama/susulu |
| | : sinasina | - | pa’epa’e (kiona, faatusa foi i le paepae) |
| ii) | f (4): tetemu | - | lagona fefefe/faaletonu |
| | liua | - | suia lagona |

GALUEGA FAATINO: Taliga Fesili

Fai e lau susuga ni fesili e tali mai i ai le vasega. Ona latou faia mai lea nisi fesili e te talia faatasi ma latou.

PESE: **Pese ma Viiga 51.**

A’OA’OGA:

1. Talitonu ua Toetu Iesu.
 2. O le Toetu, o le atoatoaga lea o le faaolataga.
-

ASO SA: **23 APERILA 2017**

MATAUPU: **O LE MAUA - O LE ILOA FEULUULUTA’I(Being found out - being intimately known)**

SINI: Ia a’oa’o tamaiti ina ia latou iloa, o le taimi na silafia ai e le Atua Atamu ma Eva, o le taimi tonu foi lena na iloa ai le isi e le isi.

TUSI FAITAU: Kenese 3: 8 – 13

FESOASOANI MO FAIAOGA:

Sa ou nofonofu lava i le fale-mafutaga o le aoga, ae talanoa mai loa le taitai e uiga ia a’u ma fai mai, “Afai e iloa e se isi le tagata na ia amataina le mea lenei, ta’u mai iate a’u, ma lima i luga.” Ae sa ou piilima lava, ua leva ona ou fia sola ese.

Sa ou ta’alo foi, e leai ni faaletonu, a’e ma iloa ai ma Kilitofa, e i ai se vaega o le malae taalo e malosi ai tele le savili.. Ua siitia i luga e le matagi mea, ua felelei solo luga i le lagi. Ona ma o lea faataitai le lau laau, o le fulufulu o le manu, ma fasi pepa i le matagi. Ua ma tau atu iā

ma uō, ona faapena foi lea a mā uō iā latou uō. O le taimi ua ili le faaili ua uma le taimi taalo, sa matuā manino lelei mai le malae ma tamaiti o saei (itulau) pepa o api, ma matamata i ai ao felelei solo i le matagi. Matou te le iloa tele, pe faapefea ona faapotopoto uma lenei otaota i fafo ane o le potu o le taitai.

O iuga uma lava o a matou gaoioiga, e mafai ona se'e ese atu ma o matou lima i tala atu o se isi mea matou te manatu e ono tupu. E sa'o le mea lea mo Eva ma Atamu. O tāiga o le aiina o le apu, sa le manino tele mai i le amataga, peita'i, ina ua ulufale le Atua i le faatoaga, ona toe tau atu lava lea e ō la loto iā lāua, ua suia mea ma sa la lagona le fefefe ina ua iloa i lāua.

O le nofoaga tonu ma toafilemu, le mea e amata ai le sailiga o le Atua i le va feagai ai ma tala o le fefe, ma le auai tumau o le Atua i totonu o ia mea. Tupulaga talavou, ia loto tetele e tautino le sa'o i le Atua pe afai ua tatou soli le poloaiga.

GALUEGA FAATINO:

Saunia e lau susuga ni lesona e ala i ni fesili, e tuliloa ai la outou mataupu.

PESE: 231 (Pese ma Viiga)

A'OA'OGA:

1. Aua le fefe i le Atua pe a sesē, ae salamō.
2. E le olegia e se tagata le Atua.
3. 'Aua e te lafi i le Alii.

.....

ASO SA: 30 APERILA 2017

**MATAUPU: A I AI IESU I LE VAA E ATA I LE
MATAGI (With Christ in the vessel... smile
at the storm)**

SINI: Ia a’oa’o tamaiti ina ia latou talitonu, o Iesu e malū ai le sami, ma to’a ai mea uma lava.

TUSI FAITAU: Mataio 8: 18 – 27

FESOASOANI MO FAIAOGA:

O le fefe, o le lagona masani tatou te iloa ma oo uma lava i ai, e na te tu’u tatou i le le mautonu i nisi taimi. A o lenei vaiaso – o loo fetalai mai pea le Alii o Iesu – “‘Aua tou te matatau.’”

Sa ou folau i le vasa Anetatika i nai tausaga e lua ua mavae. Sa malū ma to’amalie mea uma, seia matou taunuu i le faga o Pisikei (Biscay). O le agai atu ina souā le sami, na mama’i ai nisi o le auvaa i ma’i o le sami, (ma’i vasa) ma sa le mafai ai ona faataunuu o latou tiute. Na vave ona ou manatua le tasi aso, ua amata ona lagona, ma ua tupu tele a’e lou fefe, a o felafoa’iina le vaa e le au. A o ou tau manavanava loloa, sa ou faapea ane ia te au lava, ‘aua nei lofia au e le fefe!

O nisi taimi e faapea o tatou olaga, o nisi taimi ua toamalie mea uma, ae tei ua afā faafuasei mai. E mafai ona lofituina tatou e le fefe, ma le mafai ai ona tatou lagona le siufofoga o Iesu o fetalai mai, “‘aua e te fefe.’”

A o faatonu ma tautala atu Iesu i lona au so’o ona o lo latou fefefe, o loo faatonu ai foi i le taimi lava lea, ma le mea o mafua ai ona fefefe – “O le afā lea.” Ua faalogo le afa i le siufofoga o Iesu. E mafai foi ona tatou faalogo i le Alii, a o tatou fefefe foi tatou.

E i ai le pese ua leva lava, e masani ona pepese ai o’u matua, pe a feagai le ola ma mea malolosi. E faapea le pese – “A i ai Iesu (Keriso) i lo’u vaa, ou te ata i le matagi.” E leai a la se mea e ala ai fua ona tatou fefefe!

Tama ma Teine talavou, a afio tumau Iesu i lou loto talitonu, ma le faatuatua ia te Ia, e leai a se mea tatou te fefefe ai, tusa lava pe fetaia’i tatou ma matagi malolosi i le ola nei.

Uiga o Upu ma Fuaitau:

- i) f. (18): vagavagai - mumu mai./tau pati mai e fia faalogo ma fia vaai ia Iesu.
- ii) f. (24): peau - o le suasami

GALUEGA FAATINO:

Pule lau susuga i le faiaoga i le galuega e fai.

PESE: “A i ai Iesu i lo’u vaa, ou te ata i le afa”

A’OA’OGA:

1. Faatuatua i le manao Iesu.
2. Folau ma le Alii i aso matagi o le ola
3. E usiusita’i mea uma o le foafoaga i le Alii.

.....

ASO SA: 7 ME 2017

**MATA'UPU SAU MA 'AVE E TUSA MA LOU MANA'O
(Come and take as you need)**

SINI Ia malamalama le vasega, tatou te ola mo le Ali'i ma le mata'u i leAtua e tatau ona fa'aalia i mea uma lava, ia tausi i ana tulafono ma poloa'iga.

TUSI FAITAU: Esoto 16: 1 - 18.

FESOASOANI MO FAIAOGA:

O le i ai o Isaraelu i le vao ina ua o ese mai Aikupito, na fememea’i ai loto o le to’atele o le nuu, ina ua feagai ma le fili lea o le fia ai, ma ua

fa'avaivaia ai loto o le nu'u ina ua lagona le fia 'a'ai. Ma ua avea ma ala ua galo ai le malosi o le mana o le Atua sa latou iloa, a ua toe manatu i le nu'u sa pologa ai ona o mea 'ai. Sa latou muimui ai ia Mose, ma o le ala lea lea o le tatalo o Mose ma fa'atoga i le Atua ina ia magalo le sesē o le nu'u. Sa talia e le Atua le tatalo a lana 'au'auna ona foa'i ifo ai lea o mea sa latou a'ai ai.

Ina ua latou maua mea e 'ai sa foa'i mai le lagi, sa fa'atonuina le nu'u ina ia latou o ma ave e tusa mo lo latou mana'o. Sa tu'uina ifo le tulafono poo le poloa'iga ina ia latou tausi iai pe a latou o e ave a latou mea e 'ai. O le mea ua tupu, ua usita'i isi, ae na lē usita'i isi. O latou uma sa lē usita'i, sa leaga uma a latou mea fa'asili.

Sa lē iloa e le nu'u uma, o lo latou muimui ia Mose, o lo latou muimui lava lea i le Atua, aua o le Atua sa auina Mose e aumai lona nu'u mai Aikupito. E le o lo latou muimui sa mafua ai ona foa'i mai e le Atua mea latou te 'a'ai ai. O le tatalo a Mose ma lana fa'atoga sa talia e le Atua, na mafua ai ona latou maua mea 'ai. O le mata'u i le Atua, e fa'aalia i mea uma, e o'o lava ile 'ai.

E le gata ia lea, ae o le mea e ao ona iloa e le nuu o Isaraelu, o le fa'atonuga poo le vala'au mai o le Atua pe a o e 'aumai mea e a'ai ai, o le tulafono lava lea. E tataua ona fa'aputu tau o mea e te mana'omia mo le aso.

GALUEGA FAATINO: TUSIGA SOLO

Ia vaevae le vasega ini vaega, ia fatu sa latou solo e fa'atatau ile mata'upu. Ia tofia fo'i se e ta'ita'i i vaega ta'itasi latou te lau la latou solo sa tusia. Ia tu'u taimi le galuega lea, ia le silia i le LIMA minute mo le vaega.

Ia fesoasoani faia'oga ile galuega leneni. O se faiga lea e mautinoa ai ua manino lelei le vasega ile mata'upu sa tau 'a'aoina.

Ia sauni le faia'oga na te faia le aotelega o manatu. Ia fai ni nai fesili e mafai ona fetufaa'i ai.

E.g. Pe fa'apefea ona iloa e te alofa i lou tua'oi ona o lau 'ai? [Ia manatua, o lē lua te tua'oi, o le tagata na te mana'omia le fesoasoani e mafai ona maua atu ia te oe]

Ia manatua fo'i nai tamaiti o loo fia maua ni mea'ai, e le gata i lo tatou nu'u, ae fa'apea fo'i isi atunu'u o le lalolagi. O le muā gagana a le atunu'u o Filipaina, "A lava loa le 'ai, tu'u loa". (When you've eaten enough, stop it) Ia manatua, tatou te 'a'ai ina ia tatou ola; ae lē o le ola e 'ai.

PESE: Lo'u Atua e ua ou fia ai ia e fafaga ia te a'u

A'OA'OGA:

1. Aua le na'o meaai.
2. E leaga le mana'otele.
3. Usita'i ona manuia lea, ae le o le maua loa manuia, ona soona fai ai lea.

.....

ASO SA: 14 ME 2017

MATAUPU: O LE SAUNIGA O LE FEAGAIGA
(The Covenant Ceremony)

SINI: Ia a'oa'oina le vasega ina ia malamalama, o le sauniga o le feagaiga ile va o le Atua ma Isara'elu, ma le tāua o vaega sa fa'atonuina ina ia fai, o le feagaiga lava lea i le va o le Atua ma tatou.

TUSI FAITAU: Esoto 24: 1 - 21.

FESOASOANI MO FAIAOGA:

O le feagaiga, o le maliega i le va o itu e lua (2), e tausia mea uma ua malilieiai. E le tutusa feagaiga ile va o tagata ma tagata, ma le feagaiga ile va o le Atua ma tagata. O feagaiga ile va o tagata, e i ai le taimi e tālā ai; e pei o le feagaiga o le fa'aipoipoga, e maliu loa le isi ona uma loa lea o le aoga o le feagaiga. A o le feagaiga ile va o le Atua ma tagata, e o'o ile fa'avavau lona aoga.

E fa'amaoni le Atua na te tausia lana itu o le feagaiga; e tatau fo'i ona fa'amaoni tagata ile tausiga o lana itu. O le feagaiga ua faia i le va o Isaraelu ma le Atua, sa vala'auina ai Mose ina ia o a'e ile mauga, o ia fa'atasi ma lona uso o Arona, o atali'i matutua o Arona o Natapu ma Aviu, atoa ma toea'ina e to'a fitusefulu mai ituaiga uma o Isara'elu.

Sa fa'atonuina Mose ina ia fai se fata faitaulaga, ma ia fa'atutū ai ni ma'a se sefulu ma le lua. O le fata faitaulaga, o le fa'ailoga o le Atua; a o ma'a e 12, e fai ma sui o le nu'u (itua'iga e 12). O lona uiga, ua malilie itu e lua (2), o le Atua ma Isara'elu, ile feagaiga o le a osia i lo latou va.

E tatau ona osi le taulaga ma ia tapua'i tagata ina ia fa'amamāina i latou, a o le'i fa'alatalata atu i le Ali'i. O Mose foi e fai ma so'otaga/so'o'upu (mediator) mo itu e lua.

O nisi o vaega taua o le Sauniga o le Feagaiga, o le toe faitauina ai lea o le tulafono ina ia toe fa'amautū le ta'utinoga a tagata, ma ua latou talia vaega uma o le tulafono ua latou fa'alogu iai. E le gata i lea, ae o le sausuina i le toto; o le afa (1/2) mo le fata faitaulaga [lea ua fai ma fa'ailoga o le Atua], a o le isi afa (1/2) mo tagata. [E lē o tagata na sausuina ile toto, a o ma'a e 12 sa fa'atutū i luma o le fata faitaulaga].

O le tāua o vaega ia, ona o le fa'amauina lea o le feagaiga ina ua sausuina ile toto. O le taliaina o tagata, e maua ina ua osia se taulaga mo agasala (atonement sacrifice).

Faatasi ai ma manuia sa folafola e maua e tagata ona o le feagaiga, e mautinoa ma fa'amautuina e le Alofa tunoa.

- O Arona, o le ositaulaga
- O ona atali'i, o le lumana'i o le aigā ositaulaga
- O toea'ina e 70, o tagata e aupito fa'aaloogia mai ituaiga uma o Isara'elu. E fa'alogu le nu'u ia i latou.

O loo manino mai foi i le vaega mulimuli o le fuaiupu e 11, sa mafai ona latou va'ai mamao atu i le mamalu o le Atua. Sa latou aai ma inu aua ua fiafia ina ua mafai ona latou iloa atu i le Atua. Ua te'a lo latou fefe aua ua uma ona sausuaina i latou ile toto o le taulaga mo le leleiga (peace offering). Ua latou fiafia aua ua mafai ona mafuta mai le Atua ia i latou.

GALUEGA FAATINO: FETUFAA'I I FESILI

1. Ia saunia ni fesili e fesiligia ai le vasega, e uiga i le tala sa faamatalaina.
2. E taua foi e fesili i tamaiti poo i fea e masani ona faamauina ai nei mea o feagaiga, ae o a foi ni feagaiga na osia na latou vaai ia.

Ia toe fa'amanatu mai e tamaiti (i latou ua Ekalesia), la latou tali i fesili sa fesiligia ai latou i le lotu sa fa'aofia ai latou.

PESE: Lo'u lava Alii e (Pese ma Viiga)

A'OA'OGA:

1. Ia fa'amamafa le taua o le usita'i i aiaiga o feagaiga ua osia ma le Atua.
2. O loo faamaoni lava le Atua i le feagaiga ma i tatou o tagata.
3. A leaga loa le amio a le tagata, ua soli le feagaiga sa faia ma le Atua i le amataga.

.....

ASO SA: 21 ME 2017

MATAUPU: O LE ATUA E LĒ FAAMALIEINA PE AFAI E NUMERA LUA O IA I AU MEA SILI (The God who won't settle for being second best)

SINI: Ia a'oa'oina le vasega ina ia malamalama, e tatau ona numera muamua le Atua i mea ua pele ia te oe.

TUSI FAITAU: Esoto 32: 1 – 14

FESOASOANI MO FAIAOGA:

Ua sasi le fa'atatau a le nu'u ina ua latou fau le tama'i povi auro e tapua'i iai. O le agasala lava lenei ina ua latou tu'u lafoa'i le Atua, ae fau le tupua e ifo iai. O lo latou manatu, ua le toe fo'i mai lo latou ta'ita'i o Mose.

E tele ni masalosaloga sa manatu iai le nuu, i lo latou fiu lea e faatali lo latou ta'ita'i o Mose, talu ona alu a'e i le mauga. O nisi ua manatu, e masalo ai ua maliu ona o le mauga lea sa alu a'e iai Mose, sa pusa atoa ai le afi aua ua afio ifo iai le Atua.

A'o isi ua masalo ai ua toe fo'i Mose ile toeaina o Iestero, le tamā o lana ava o Sepora e mulimuli ile lafu manu.

E manatu foi nisi, e masalo Mose ua fesēa'i ile togavao, ma ua le maua lona ala e toe fo'i mai ai a'o nisi latou te le iloa.

O le le mautonu lea o le nuu, na loto ainisi ina ia fai ia so latou atua latou te malaga fa'atasi ile vao. E tatau ona fau se atua e leai se mea e mana'o mai iai. O lona uiga ose atua e leai ni ona manaoga. Aua o le Atua lea sa o latou savavali mai, ua matuā tele lava mea e mana'o mai iai, ma e fa'amalosia ana tulafono ma poloa'iga. Pau a lo latou mana'o, ua latou fia o'o lava ile nu'u e tafe ai le suāsusu ma le meli.

Ua malo le finau a tagata ia Arona ma ua fa'asaga atu loa e fau le tupua atua, e tusa o lo latou mana'o.

E leai se tala mai le tusi pe sa iai se taumafaiga a Arona ina ia taofi le mea ua mana'o iai tagata. Ua faigata lava ona fa'aali sona manatu, ae maise o ia sa tu'u iai le va'aiga o le nu'u a o to 'esea Mose.

O le mea ua iloa, sa iai nisi sa latou ta'ita'ia le nu'u ina ia auai uma ile faiga o le tupua. O le to'atele sa lē mautonu ona o le tuai mai o Mose, ua tōsina uma ile ta'ita'iga a tagata nei. Sa iloa e Arona ua fusia le nu'u ile

manatu e fai le tupua, ma o le vevesi le mea e tupu pe a finau atu nei e taofi. Ona malie lea o le a fai le tupua ile mea ua ia manatu iai.

1. Ia aumai mea 'auro, o mama ma tautaliga. O mea ia e pele tele i fafine.

Sa manatu Arona, 'ai lava o le a mumusu fafine e avane a latou mama ma tautaliga 'auro.

Peita'i sa manatu fafine, ia 'ave mea ia ina ia latou maua ai se atua e sili lona taua e pei o a latou mama ma tautaliga 'auro.

2. Ua fau e Arona le tama'i povi.

Sa manatu Arona, e leai se isi e fia ifo ile mea 'au leaga lea ua ia faia. Sa leiloa e Arona, o le tama'i povi, o le fa'aailoga lea o atua (deity) o Aikupito. O lona uiga, o loo o mai lava le nu'u ma o latou loto o loo fusia lava i faiga fa'apaupau a Aikupito.

3. Sa fau e Arona le fata faitaulaga.

O lona manatu, ia o mai tagata e osi taulaga i le Atua e pei ona sa fai a'o iai Mose iai latou, ina ia latou osi taulaga pea i le Atua soifua, ae le o le tupua.

O le tu foi lea sa fai i Aikupito, e osi taulaga i tupua i mea e 'ai ma manu e o'o lava i tagata, e ave mo atua fa'apaupau.

4. Sa fa'aailoa e le Atua ia Mose le mea ua tupu i le nu'u.

Ua leaga le nu'u sa e aumaia mai le nu'u o Aikupito. Ua latou fai le tama'i povi ma ua fai taulaga iai ma alalaga, "Fa'auta i lo outou atua, o le na aveina a'e i latou mai Aikupito".

Ua to'atama'i le Atua ma ua finagalo ina ia oti le nu'u uma, aua ua tele vave ona latou liliu ese, ae o le a ave Mose ma tupu'aga o se isi nu'u latou te fa'aauuina le finagalo o le Atua. Sa fa'atoga Mose i le Atua ina ia liliu ese mai lona to'asā, a ia alofa i lona nu'u. Ona salamō ai lea o le Atua mai le leaga se manu a fa'a o'o i lona nu'u (14).

O le tula'i mai o le fa'afitauli ua tālaia ai le sologa lelei o le atina'e o le lotu ma le tapua'iga a Isara'elu. Sa manaia mai lava ile amataga se ia o'o mai ile mea lea ua tupu. Ai lava sa manatu Mose o le a manaia sa latou

feiloa'iga pe a taunu'u ifo ma papa ma'a o le tulafono. Ae paga lea, ua tapua'i i le tama'i povi. Ua nonofo lava ma fa'amuta le tafe ifo o le lagolago a le alofa o le Atua. O le fa'aipoipoga toetoe lava a fa'apa'iaina, a o lea ua malepe le tautoga. O le mea faigata, ona o le fafine talitane (Isara'elu) e tatau ona sala aua ua ia le tausisi i lana itu o le feagaiga.

GALUEGA FAATINO: FEFAASOAA'I

Ia saunia ni fesili e faasoa mai ai manatu ma lagona o le vasega e uiga i le mataupu.

PESE: O lou mamalu (Pese ma Viiga 11)

A'OA'OGA:

1. Ia faamuamua le Atua i lou ola.
2. Aua le ifo i tupua.
3. Ua na o le Atua soifua e mamalu ma silisiliese.

.....

ASO SA: 28 ME 2017

MATAUPU: O LE LAGONA LĒ VĀEA O LO TATOU TOFI (A sense of belonging)

SINI: Ia a'oa'o le vasega ina ia iloa ma malamalama, o le ele'ele lo tatou tofi; o lo tatou so'otaga lea ma tagata uma, atoa ma lo tatou Atua.

TUSI FAITAU: Salamo 24

FESOASOANI MO FAIAOGA:

Sa fai e Tavita le fale e tu'u ai le ato la'au. A o le Salamo lea sa fatu, ina ia pepese ai le nu'u pe a o'o ile taimi e aumai ai le ato la'au ile fale lea sa

ia faia. O le pese fo'i lenei sa pepese ai Isara'elu ina ua aumai le ato la'au ile malumalu lea sa faia e Solomona.

O le agaga 'autu o loo fatu iai i le Salamo lea, "Ia manatua e tagata uma o mea o loo iai, o le Atua sa ia faia. Ae maise lava ile ele'ele, afai e manatu iai, ona iloa lea o le 'ele'ele o le so'otaga lea o tagata uma o le lalolagi. O lo tatou so'otaga fo'i lea ma lo tatou Atua. E tele mea matagofie o loo ta'oto ile manava o le ele'ele, ae sili ai le matagofie o le tagata sa foafoa e le Atua mai le efuefu o le ele'ele. A o'o la ile taimi e aumai ai le ato la'au, ia va'ava'ai iai tagata e pei lava o le Atua ua afio mai.

Sa le'i mafaia e Tavita i lona malosi fa'a-tupu ona pulea le lalolagi uma ile matagofie e pei ona tautala iai le pese. O le ato la'au, sa fa'amoemoe ina ia ta'ita'i ai tagata i se olaga fai taulaga e loloto, ma maualuga atu nai lo taulaga e va'aia. O le ola fai taulaga lea o tagata, sa avea ma se tasi o auala e iloa ai le tagata maualuga ma le tagata maualalo (fa'ailoga tagata). Sa avea lava lona mea ma ala e sese ai Isara'elu.

O le fuaiupu muamua ma le lua, o loo manino mai ai, o mea uma e o'o lava ile anufe ile 'ele'ele, ma meaola nini'i e le iloa e mata, o mea oi le sami loloto, o le Atua na ia avane iai le ola, ma tausia ina ia ola pea. E o'o lava i tagata latou te lē iloa le Atua, e pule ai lava o Ia. O mea uma fo'i ua faia e tagata i lona atamai, ma ua tumu ai le lalolagi, o ā le Atua uma lava. A mafaufau loloto la i nei mea e tele ua tatou va'ai iai, e moni ai lava le tagata poto ina ua fai mai, "E fa'atauva'a mea uma, o le ai ile matagi, e le aoga". O tatou tino sa faia e le Atua, o le Atua lava lo tatou tupu. O Ia foi le Tamā o tatou agaga aua o Ia lava na foa'iina mai ai.

O le manatu sa iai ile amataga, o le Atua e afio ile lagi, o le mea pa'ia; ma e le o'o mai lana pule ile lalolagi ona e lē pa'ia. O loo aliali mai fo'i lenei lava manatu i ona po nei. ("Se o mea lava e fai i lalo nei")A o le Salamo lea ua iloa tino ai, o le lalolagi sa faia e le Atua, ma tu'u iai le tagata o le tausī mea, na te va'aia ma ola fiafia ai. Ae taofi pea lava e le Atua le pule aoao.

O le fuaiupu e 3 i le 6, o loo faailoa mai ai, e agalelei ma fiafia le Atua na te talia ai vi'iga ma taulaga mai ona tagata filifilia; e lē o sona naunau

ina ia maua ai se isi mamalu fa'aopoopo mo Ia, ae ona o Ia o le Tupu, o le Tamā o le lalolagi, na te fa'amanuia fo'i i ona tagata amio mamā.

Ua fa'alua ona ta'u mai le mea e tasi, e pei ona iai i le fuaiupu e 7 i le 10. O le poloa'iga ina ia tatala faitoto'a, aua o loo tu'itu'i mai, Lē e ola ai. E le gata ina tatala, a ia matua tatala ina ia ulufale mai o ia, Lē ua sauni e ulufale mai. Ua faia fa'alua foi le fesili ina ia iloa po o ai o loo tu'itu'i mai. O le masani lea pe a tu'itu'i se isi ile faitoto'a. "O ai lea?" Ua faia fa'alua foi le tali se 'ia o'o ina ta'utino, o le Ali'i, o Ia lava le tupu mamalu.

O le taimi sa fatu ai le Salamo lenei, sa fuafua le fesili e fa'asino ile ato la'au pe a fa'a ulufale ile mea e tu'u ai. O le fa'a'iloga va'aia lea o le Atua. Ia tali foi le nu'u ma le loto talitonu, o le Atua soifua o ia lava le tupu.

O le aotelega lava o manatu, o le manatua lea o le 'ele'ele o lo tatou so'otaga lea ma tagata uma, atoa ma le Atua. O tagata ma mea uma lava o iai, a o'o ina pala, e toe foi lava ile 'ele'ele. E silafia e le Atua mea uma lava o iai ile 'ele'ele, le sami ma le va nimonimo. Na o Ia lava na te silafia le mea e maua ai so o se mea. O le alofa foa'i o le Atua o loo tumau ai mea uma, e o'o lava ia i latou o e latou te le iloa le Atua, o loo maua fo'i e latou le ola ona o le alofa lea o le Atua (Alofa foa'i - Providence). O tagata ua matata'u ile Atua, ua foa'ina iai e le Atua lona Alofa Tunoa (Mercy).

O le Afio mai o Iesu, ua maua ai le **ola maua pea** e tagata uma ua fa'atuatua i lona maliu mai. E le fano se tasi e fa'atuatua... 'ae maua le ola fa'avavau. O lo tatou tofi lea o le 'ele'ele. O le ele'ele na fa'apupula ai e Iesu mata o le tauaso. E fa'apupula fo'i e Iesu o tatou mata ina ia iloa tino ai o le ele'ele lo tatou tofi, aua o Ia lava na fa'avaeina ai i luga o le sami ma fa'amau ai i luga o vaitafe.

GALUEGA FAATINO: TUSIGA TALA PUPUU.

1. Ia faia se tusigatala pupuu, e faamatala mai ai e le tama ma le teine lava ia, lona faasinomaga, ma le taua o le laueleele o loo nonofo ai lo latou aiga, ua fai ma tofi o i latou uma.

2. Ulutala: “O LO’U FAASINOMAGA, O LO’U TOFI”

PESE: 138 (Pese ma Viiga)

A’OA’OGA:

1. O le Atua na Ia saunia le tofi o le tagata.
2. Ia tausi lelei lo tatou tofi poo la tatou faasinomaga.
3. Aua le faaleagaina le siosiomaga.

.....

ASO SA: 04 IUNI 2017

**MATAUPU: LILIGI ATU LE AGAGA PAIA
(Poured out)**

SINI: Ia a’oa’o le vasega ia malamalama ua liligi atu e le Atua lona Agaga Paia i le au Aposetolo ma tagata uma o le faailoga, o ai lava e valaau i le suafa o le Alii e faaolaina.

TUSI FAITAU: Galuega 1: 1 – 21 (mo le Faiaoga)
Galuega 2: 1 – 4, 14 – 21

FESOASOANI MO FAIAOGA:

O le tatou mataupu i lenei Aso Sa: UA LILIGI ATU E LE ATUA LONA AGAGA PAIA. O le faailoga mautinoa, ua Afio ifo le Atua e auai tumau ma tagata, o lona Alofa Tunoa, e faamalositia loto ma agaga o tagata, ina ia tasi le lalolagi uma i lona Agaga. O le Aso Penetekoso o le aso taua i tagata Isaraelu. O le aso o le tausamiga e faamanatu ai le tuuina atu e le Atua o tulafono ia Mose i le mauga o Sinai.

O le aso foi o le tausamiga o ulua’i fua o faa’ele’eleaga. E ofo atu ai ulua’i fua o faatoaga e fai taulaga ai i le Atua. O le aso foi ua

faamanatuina ai le Afio ifo o le Agaga Paia i luga o Aposetolo, ma ulua'i faavae ai le Ekalesia a Iesu. O le Afio ifo ma liligi atu le Agaga o le Atua i le 'au Aposetolo, o le faamanatu lea i tagata uma, o le Agaga Paia lava lea o le Atua, na fegaoioia'i i le fogatai ma le pogisa, na ia foafoa ai mea uma i le lelei atoatoa (Kenese 1: 2)

O le liligi atu la o le Agaga Paia i le au so'o po o Aposetolo na a'afia ai i lona mana, na afua ai ona tautala i gagana 'ese'ese. O le feau o lo o momoli mai e le Agaga Paia i le faagagana o le auso'o i gagana 'ese'ese mo tagata uma. O le Atua ma lona Alo o Iesu Keriso ma lana Tala Lelei mo tagata uma. E faaolaina tagata uma, o e valaau i lona suafa. O le tino mai lea ma taunuuga o le valoaga a le perofeta o Ioelu (Ioelu 2: 28 – 32) e pei ona taua e le lauga a Peteru i le Aso Penetekoso e pei ona maua i le Galuega 2: 17 – 21. A o le faamaoniga foi lea o le faatonuga a Iesu i le au Aposetolo a o lei siitia ae o Ia ma Afio ae i le lagi Galuega 1: 4. Ia le tuua Ierusalema, a ia faatali le mea na folafolaina e le Tamā, ua outou faalogo i ai ia te a'u.

O le Agaga Paia lea ua sasa'a atu e le Atua i le au Aposetolo ua ulufia ai o latou loto ma agaga, ua afua ai ona tula'i atu ma folafola le Tala Lelei ia Iesu i lona maliu ma lona toetu manumalo mai le oti ma le tuugamau. Ua faalogologo i ai tagata e toatele mai isi gagana 'ese'ese ma nuu 'ese'ese, ua latou talia, ma maua le mana o le Agaga Paia, ma faaolaina ai. Ua latou finafinau malosi foi, e tala'i atu ma faasalalau atu lea lava Tala Lelei i isi tagata mai isi atunuu, ma ua faaolaina ai tagata e toatele. O le Tala Lelei lea ia Iesu Keriso na liliuina ese mai tagata i le ola pologa i le agasala, ma puapuagaina ai, ma ua ola i se olaga faamalieina, ma le ola e tumu i le olioli. Aua ua feso'ota'i tagata uma i le Alofa Tunoa o le Atua e ala i lona Alo o Iesu Keriso.

O le liligi atu o le Agaga Paia o le Atua na faaosofia ai foi Misionare o le Ekalesia a Keriso, na latou lagona ai le malosi, ma le manatu lelei e malaga mai i le vasa Pasefika. Sei aumai le tala faaolataga o le faaolaina o tagata uma na saunia e le Atua, e ala iā Iesu Keriso. O le Agaga Paia lea o le Atua na liligi atu ia Ioane Viliamu, le uluai Misionare o le Tala Lelei na tulaueleele i Samoa ma tala'i le tala fiafia i le olioli ua foa'i mai e le Atua mo lo tatou atunuu, o lea ua tatou ola manuia ai.

O le Agaga Paia lea o le Atua ua liligi atu mo tamaiti uma e aofia ai foi ma tatou le fanau. O tamaiti ma fanau uma e valaau i le suafa o Iesu le Alii e faaolaina. Auā o le Tala Lelei lava i lona fanau mai, ma lana galuega faaola na faia i le lalolagi a o soifua ai, na maliu puapuaga i le satauro peita'i, ua toetu manumalo mai le oti ma le tuugamau, ua ia aumaia le ola faavavau mo tagata uma o e valaau i lona suafa.

Uiga o Upu ma Fuaitau:

1. Penetekoso - o le aso na afio ifo ai le Agaga Paia i Aposetolo.
2. afua - mafai
3. fememea'i - le mautonu, le maumanatu
4. mauli - loto

GALUEGA FAATINO:

Faatino le tala i le taimi ua afio ifo le Agaga Paia i luga o le au so'o. O ai lava le tamaitiiti, e iloa le gagana Tonga, Fiti, Toelau, Niue, Rarotonga, Peretania, Saina, Iapani, Aferika, Maori ma Tuvalu. Tofi ni tamaiti mo atunuu nei, ona tautatala mai lea o le tamaitiiti ia le gagana a le atunuu ua tofia e fai ma sui o le atunuu.

PESE: O oe le tupu moni, Iesu ua na o oe
Po o le pese o le Agaga i Pese ma Viiga 112

A'OA'OGA:

1. Ia faalogo ma usita'i i le Agaga Paia.
2. Ia tatalo i le Agaga Paia e foa'i mai le potu.
3. Ia pulea lou mafaufau, loto, ma le agaga e le Agaga Paia.

.....

ASO SA: 11 IUNI 2017

**MATAUPU: O LE ALOFA TUNOA MA LE AIGA
FOAFOA O LE TOLU TASI PAIA
(A loving and creative community)**

SINI: Ia a’oa’o le vasega ina ia malamalama o le Alofa Tunoa o le Tolu Tasi Paia, ua foafoaina ai mea uma lava i le amataga i le atoatoa ona lelei mo le manuia o le tagata na Ia faia.

TUSI FAITAU: Kenese 1: 1 – 5 (mo le Faiaoga)
Kenese 1: 1 – 3 (mo le Vasega)

FESOASOANI MO FAIAOGA:

O le Aso Sa 4 Iuni 2017 na te’a nei, na tatou iloa le liligi atu e le Atua o lona Agaga Paia, ina ia maua e tagata uma lona mana. O le faailoga o le Atua ua Afio ifo, e auai ma galulue faatasi ma ona tagata. Ia mafai ona latou tala’i atu le tala i le faaolataga a le Atua mo le lalolagi e ala i le fanau mai o Iesu, ma lona maliu ma lona toe soifua manumalo mai le oti ma le tuugamau. O i latou uma e talitonu ma valaau i le suafa o le Alii e faaolaina.

A o lenei Aso Sa, o le tatou mataupu o le Alofa Tunoa ma aiga Fofoa o le Tolu Tasi Paia. A o fuafua ma tau faataoto e le Atua lana fofoaga, na Ia muamua ai faatulaga lona faamoemoe. Ona Ia faavasega ai lea o taiala e ausia ai lona faamoemoe. O le Tolu Tasi Paia, o le Atua, o le Atua lava lea e toatasi. E tolu suafa ua faasuafaina o Ia, o le Atua le Tamā, ma le Alo ma le Agaga Paia. Ua ta’ua o le Aiga Fofoa o le Tolu Tasi Paia.

O taiala na faavasegaina e le Atua mo lana Fofoaga aoao ina ia ausia lona faamoemoe, o lona Alofa Tunoa. O le Alofa e tumau e faavavau. O le alofa e ausia le lelei, ma le matagofie.

O lona taiala, o lana amiotonu. O lana amiotonu e le femoumoua’i, ma sua ai ni ana faaiuga fai. E paia, e leai sona ila ma e mamalu. E lē

pepelo, e lē salamō foi. Ina ua uma ona foafoa e le Atua mea uma ona silasila atu lea ua lelei. Ona fetalai ai lea o le Atua le Tamā i isi ona Peresona, o lona Atalii ma lona Agaga Paia (Kenese 1: 26) Ina tatou faia ia o le tagata i lo tatou faatusa, ia foliga ia i tatou, ia pule foi latou i i'a o le sami, ma manu felelei ma manu vaefa, ma le laueleele.

O lea la ua manino mai le faamoemoe o le Aiga Foafoa o le Tolu Tasi Paia. O le faamoemoe o le Atua mo lana foafoaga aoao, ma le manuia ma lona alofa mo le tagata na Ia faia. O le Tolu i le tasi lea foi e i le tagata e tasi na faia e le Atua. Ina ua finagalo le Atua e tatau ona i ai se fesoasoani ia Atamu, ona ia tu'ueseeseina loa lea o le unity, po o le faatasia o le tolu i le tasi. Na to 'ese e le Atua le ivi asoaso o Atamu, ma fai ai Eva le fafine. E le'i toe faia e le Atua se isi tagata i se efuefu, e pei ona faia muamua pau le mea na faia e le Atua o le tu'ueseeseina o le tagata e tasi ina ia lua, o le fafine o le fesoasoani ia Atamu. Ona tu'ufaatasia lea e le Atua le tane ma le fafine na Ia tu'ueseeseina i le sauniga o le faaipopoga, ona ta'u ai lea o le tagata e tasi i le ulugalii po o le aiga. A o le tasi lena o le tamā ma le fafine, o loo i ai ma le fanau po o tamaiti e pei o fuafuaga o le Alofa Tunoa.

O le Aiga Foafoa o le Tolu Tasi Paia. Ua maua ai foi le tafatolu o le aiga o tagata i le lalolagi. O le tamā ma tinā ma le fanau. Na ave foi le tagata ua ia tu'u ia te ia i le faatoaga i Etena e galue ai maleoleo ai. Ua fetalai atu foi le Atua, o laau uma e te ai ai, a o le laau e iloa ai le lelei ma le leaga 'aia e te ai ai, aia o le aso e te ai ai e te oti ai lava.

Ioe, na aai loa Atamu ma Eva i le fua o le laau na faasaina, oo loa le oti ia te i laua. O le amiotonu lena a le Atua ua fa'aalia, e na te lē solia lana folafolaga na fai i le tagata. A sese le tagata ona faamasino lea o lana amiotonu. O lona Alofa Tunoa ua le mafai ai ona tu'ulafoa'i ia Atamu ma Eva, e ola ai pea ma pologa i le malaia faavavau o le oti lea. Ae na ia folafolaina ai lava i lena taimi le faamoemoe e ala i le tama o le a fanau na te tuimomomo le ulu o le gata, po o Satani (Kenese 3: 15).

Ioe, o le uiga lea o le tatou mataupu i lenei Aso Sa, "Alofa Tunoa ma le Aiga Foafoa o le Tolu Tasi Paia. Na faia mea uma mai i le leai o se mea mai le pogisa ma le fenunia'i, i le matua atoatoa ona lelei ma le matagofie. O lona Alofa Tunoa mo le manuia o lana tagata. O lana

amiotonu, e faatonu ma a'oa'oina ai tagata e savavali i ala o le Atua e faaolaina.

E pei ona fa'aalia lea Alofa Tunoa ma le amiotonu a le Atua i le soifua o Iesu Keriso. O le maliu tiga o Keriso ua faamagaloina ai agasala a tagata uma ma faaolaina ai faavavau. O le Alofa Tunoa ma le Aiga Fofoa o le Tolu Tasi Paia lena.

GALUEGA FAATINO:

Ia tusi mai faasologa o galuega o le fofoaga a le Atua e amata mai le aso muamua e oo le aso lima. Faasolo lelei i lona amataga mai.

PESE: Pese ma Viiga 13

A'OA'OGA:

1. Na fofoa e le Atua mea uma.
2. O le Atua o le Atua Tolu Tasi Paia.
3. O le Atua e tolu ona Peresona, Tamā le Alo ma le Agaga Paia.

.....

ASO SA: 18 IUNI 2017

MATAUPU: OLE TAPUAIGA E LEAI SE UIGA
(Hollow worship)

SINI: Ia a'oa'o le vasega ia malamalama o le tapuaiga e leai se uiga i le Atua, o le tapuaiga e le o i ai le mafaufau ma le loto ma le agaga o tagata tapua'i. O le tapuaiga e faifua e le o silasila mai i ai le Atua.

TUSI FAITAU: Isaia 1: 1 – 8, 11 – 17 (mo le Faiaoga)
Isaia 1: 11 – 17 (mo le Vasega)

FESOASOANI MO FAIAOGA:

O le tapuaiga o le natura lea o le Atua, e siomia ai lona afioaga. O le sauniga e tuufaatasia ma fusia faatasi ai le aiga o le Atua. O le Atua le Tamā, le Atua le Alo, ma le Atua le Agaga Paia, ina ia matua tapu lava se mea leaga e oo atu i lona aiga paia. Ona o le Atua o le Agaga lava ia, e faapena foi lona faatinoga o le tapuaiga i totonu o lona aiga.

Na faia e le Atua le tagata i lona faatusa, ma ua Ia manavaina atu i ai lona manava ola, o lona Agaga lava lea, ma ua i ai faatasi i totonu o lona aiga. O lona uiga ua tapu se mea leaga ona faia e le tagata. E tasi lava le tapu na tuu i le tagata ina ia usita'i i ai. Peita'i, ua le usita'i le tagata ua fai lona lava loto, ua motusia ai lona i ai faatasi ma le Atua lona aiga.

Ua misia e le tagata le tapuaiga lea, aua o loo i totonu lona loto ma le agaga, na manavaina i ai e le Atua. O le mea lea ua ia saili ai i isi mea o le lalolagi nei e fai ma atua e tapua'i i ai. I le filifilia e le Atua o Isaraelu e fai ma ona nuu ma ona aiga, o le mea lava lea na ia matua faamamafaina, o le tapuaiga e fai atu ia te Ia. Aua foi, o le feso'otaiga vavalata, e soso'o faatasi ai ona tagata ma Ia o le Atua.

Ua Ia aumaia ai tulafono e sefulu, o tapu ia mo tagata uma o Isaraelu e ola ai i aso uma. Ua faasaina ai ona tapua'i i se isi atua. Ia tapua'i tagata uma ia te Ia, aua ua na o Ia le Atua Soifua, na faia mea uma. O le finagalo o le Atua, ia ola faapaiaina ona tagata, e pei o Ia le Paia uma lava. O le mea lava lea sa i ai i le amataga o lana foafoaga, o le tapuaiga. Ia viia ai lona suafa. O le mataupu muamua o le tusi a le Perofeta o Isaia, ua fai ma tatou mataupu sona vaega i lenei Aso Sa, ua faailoa mai ai le finagalo toatama'i o le Atua i lona nuu o Isaraelu. O le tapuaiga ia te Ia, na faatonuina ai tapu ia 'aua nei o latou solia, a ua latou soli i o latou vae tapu uma na tuuina atu. Aemaise ai lava le tapu, ia aua nei fai mo latou ni atua 'ese ma tapua'i i ai. Ua tosina o latou loto ma agaga i tapuaiga o nuu faapaupau ma o latou atua, a ua faagalo lo latou Atua, na lavea'iina i latou ai le pologa i Aikupito, ma avatu i ai le nuu na folafolaina e fai ma o matou tofi.

Ua faatusa e le Atua Isaraelu, o lana fanau na tausi faapelepele i ai. Na ia a’oa’o ma faatonu i ala e manuia ai. A o lenei ua liliu mai ma foua o Ia lo latou Tamā. Ua sili atu povi ma asini i tagata Isaraelu, auā ua usita’i nei manu ma iloa lo latou matai o fafagaina latou. A o Isaraelu ua leai ni o latou mafaufau, e pei e le’i a’oa’oina. Ua le mamao ese lava ma Sotoma ma Komoro.

Aua ua na ona faatino o le tapuaiga i le Atua, i lima e sisii i luga, ma faaloaloa. Ua latou faitaulaga i povi po’a taanoa, ma mamoe ma mea manogi, a o latou loto ma agaga ua matua mamao ese lea ma le Atua. Ua na ona faataunuu o le tapuaiga, a o latou loto ma agaga ua mamao ese lea ma le Atua. Ua tosina o latou loto i tapuaiga ma amioga a nuu faapaupau, ma pauu atu ai i le loloto o le agasala.

Ua fetalai mai le Atua, Se a le aoga ia te A’u o a outou taulaga e tele? A outou tapuaiga ma potopotoga, e inoino ai lo’u loto, ua fai lava ma mea mamafa ia te a’u, a ou lailoa e tauave. O tapuaiga nei ua taua e leai se uiga. O tapuaiga e fai fua, e ‘alo ese ai fofoga o le Atua. E ui foi ina tele a latou tatalo, e le’i faalogo i ai le Atua, aua ua tutumu o latou lima i le toto.

O le tapuaiga moni i le Atua, o le tapuaiga e faia e tagata ua latou faatea ese a latou galuega leaga. Ia o mai i luma o le Atua, ma le amio lelei uma lava, sailiili ma le loto faamaoni i faamasinoga, ma alolofa i tagata puapuagaina ia fai le amiotonu, ma ia fai i le Atua ma le loto mauualalo. E pei ona fai mai le Salamo 15: 1 – 2. Le Alii e, o ai ea e nofo i lou fale fetafa’i? O ai ea e mau i lou mauga paia? O le savali ma le amio sa’o, ma ua fai le amiotonu ma tautala ma le faamaoni i lona loto.

E pei foi ona faailoa mai e le perofeta o Mika i lana tusi mataupu e 6: 6 & 8, le ituaiga tapuaiga e finagalo ai le Atua mo le tagata tapua’i atu ia te Ia. “Ou te alu atu ma ni a i luma o le Alii, ou te ifo atu ma ni a i le Atua mauualuga? Ou te alu ea i ona luma ma taulaga mu ma tama’i povi e tasi lo latou tausaga?”

“Sole, ua fa’aali atu e ia ia te oe le mea lelei, se a foi le mea e finagalo ai le Alii ia te oe, pe a le o ia mea, ia fai le amiotonu, ia naunau i le alofa ma ia feoa’i ma lou Atua ma le loto mauualalo.”

O ituaiga tagata na e tapua’i atu i le Atua, e logo malie i lana faafofoga, ona ia liligi ifo oona manuia i luga ia i latou. Ia tatou inoino i tapuaiga

a tagata Isaraelu. Aua ua latou tauoleole le Atua ia latou faatinoga, a o loto ma agaga ua mamao ese ma le Atua. O Iesu na fetalai i le fafine Samaria i luga o le vaieli. “Ae oo mai lona aso, ua oo nei foi i ai, o e tapua’i faamaoni latou te tapua’i i le Tamā i le agaga ma le faamaoni, a ua o loo saili le Tamā i e tapua’i faapena (Ioane 4: 23 & 24). O le Atua o le Agaga lava ia, o e tapua’i atu ia te Ia, e tatau ona tapua’i atu ai i le Agaga ma le faamaoni. Ia tatou malamalama lelei lava, o le tapuaiga e leai se uiga i luma o le Atua, pe afai tatou te o ma loto ita, leaga ma le le alolofa, gaoi ma le loto faamaualuga, e faifua e le faafofoga mai i ai le Atua.

GALUEGA FAATINO:

Ta’u mai mea e lima ua faatonu mai e le Perofeta e finagalo le Atua e faia e tagata tapua’i o Isaraelu.

- 1) faamasani i le amio lelei
- 2) sailiili ia i le faamasinoga
- 3) faasaoina le ua sauaina
- 4) faamasino i le ua matuaoti
- 5) finau mo le fafine ua oti lana tane

PESE: 11 (Pese ma Viiga)

A’OA’OGA:

1. Tapua’i i le Atua i le agaga ma le faamaoni
2. Ia e amio lelei i aso uma.
3. Ia e alofa atu i lou uso a tagata, e pei na alofa mai le Atua.

.....

ASO SA: 25 IUNI 2017

MATAUPU: O LE MALAMALAMA MO O’U ALA

(A lamp for my feet)

SINI: Ia a’oa’o le vasega ina ia malamalama, o Iesu lava le malamalama mo ala o tagata uma. O le sulu i o latou vae e taunuu manuia ai i le Atua Faavavau.

TUSI FAITAU: Isaia 9: 2 – 7

FESOASOANI MO FAIAOGA:

O le mataupu e 9 ua fai ma tatou mataupu sona vaega, ua valoia ai e le perofeta o Isaia, le malamalama tele e pupula mai e malamalama ai le nuu uma.

O le fuaiupu muamua o le mataupu lenei e 9, ua toe faamanatu ai e le perofeta o Isaia ia Iuta, le pouliuli na faaleaogaina ai le nuu o Nafatali ma le nuu o Sepulona, auā ua faatafea i Asuria e le tupu o Tikila-pilesa, ona o le agasala ma le lē iloa ona toe foi mai i le Atua e ola ai.

O le faamanatu foi lea i le tupu o Iuta o Aasa. E liliu mai foi Asuria ma lepetia aai nofo ‘olo o le nuu o Iuta, ona o lo latou faalagolago i le malosi o le tupu o Asuria, a ua le faamoemoe i le Atua. O le amiotonu lena a le Atua, afai e agasala le tagata, ona a’oa’i lea e fa’aaoga ai e le Atua i isi malo e pei o Asuria latou te faatoilaloina ma faapologa Israelu.

O mea na, na ala ai ona faatafea le malo i matu o Israelu o ituaiga e sefulu ma le toe mafai ai ona toe foi mai e nofoia o latou laueleele. Auā ua latou tuua le Atua na latou osi feagaiga, ae ua tapua’i i atua faapaupau o nuu ese ma fiafia i le ola agasala. Ua faamoemoe i lo latou lava malosi e faalelei ai mea ua faatafunaina i Asuria.

O le faamanatu foi lea a le perofeta o Isaia i le tupu o Iuta o Aasa, e fa’aatuatuvaleina oe e Asuria pe afai e te le faatuatua ma le faamoemoe i le Atua, o le afi o le malamalama o Israelu. O le fouvale o Israelu i le Atua, i lo latou faia o le agasala o le mea e matua inoino ai o Ia, na oo ai i puapuaga. O le olopalaina o Israelu ma le faamata’u mai o Asuria

ia Iuta. O le pogisa lea ma le pouliuli ua ufitia ai ma ola ai le nuu o le Atua. Ua foliga mai ua leai se faamoemoe.

Peita'i, mai le pogisa ma le ola fememea'i ma le leai o se faamoemoe ua mapuna a'e ai le leo o le valoaga a le Perofeta o Isaia i le malamalama ua pupula mai e malamalama ai le nuu uma. O le nuu sa savavali i le pouliuli ma le ata o le oti ua vaaia le malamalama mai le Atua, na te aumaia le olioli tele e fiafia tele ai tagata uma.

Aua ua gausia le amo o le pologa, ma aveesea avega mamafa uma o le ola pologa i le agasala. Auā ua afiō mai le Emanuelu a le Atua, o le malamalama moni na te faamalamalamaina loto uma ua faapogisaina e le agasala. O le faailoga o le Atua ua faatasi ma tagata. O le malamalama o le Atua, na Ia faia ai le foafoaga aoao, ua Afio mai o le malamalama mo tatou ala uma. O le malamalama e ola saoloto ai tagata uma.

Auā ua fanau mai mo i tatou le tama ua foa'iina mai mo i tatou le Atalii, e i lona ua le malo, e igoa foi o Ia o le Silisili 'ese, o le Faipule, o le Atua malosi, o le Tamā o le faavavau, o le Alii o le Filemu.

O le malamalama o le Atua ua Afio ifo mai le lagi, e malamalama ai ala uma e savavali ai tagata uma, o Iesu Keriso lava lea ua valoia e le Perofeta o Isaia lona fanau mai, o le malamalama moni e faamalamalamaina le ala mo tagata uma ina ia taunuu i le malo faavavau o le Atua. Vivii i le Atua ona ua tatou lē toe savavali i le pogisa, a ua tatou feoi i ala o le malamalama e taunuu atu i le ola faavavau. O Iesu Keriso le malamalama e ola ai le lalolagi uma.

GALUEGA FAATINO:

Fesili: Tusi mai ni faalupega po o ni faalagiga se lima o le Mesia o loo tau mai e le tatou Tusi Faitau.

- Tali:
1. O le Silisili 'ese
 2. O le Faipule
 3. Atua Malosi
 4. Tama o le faavavau
 5. Alii o le filemu

PESE: 363 (Pese ma Viiga)

A’OA’OGA:

1. Savavali i le malamalama o Keriso
 2. Faatino amio o le malamalama
 3. Tagata amio lelei, ua te ia le malamalama
-

ASO SA: 2 IULAI 2017.

MATAUPU: PE AFAI OU TE FAAETEETE AE LEAI SE
OLA TATALO (When I’m careful but not
prayerful)

SINI: Ia a’oa’oina tamaiti ina ia malamalama o le ola
tatalo i le Atua ma le faamoemoe i le Atua, e
manumalo ai, ae le o le faamoemoe i se isi.

TUSI FAITAU: Isaia 36:1 – 12

FESOASOANI MO FAIAOGA:

O le avea o oe e fai ma ta’ita’i o se aiga, ose nuu, o se malo poo soo se faalapotopotoga, o le mea muamua e tatau ona e faamuamua, o le saogalemu lea o lau ta’ita’iga. E tatau ona ola fiafia ma malu puipuia tagata uma o loo i lalo o lau taitaiga. Ae sili ai, o lou faamoemoe ma faalagolago i le Atua ma tuu i le Atua lau taitaiga, aua le manuia o tagata uma o loo iai i lau ta’ita’iga.

O le sasi lea na iai ia Esekia le tupu o Iuta, a’o tulai e fai ma taitai o le nuu o Iuta i lea vaiata. Ina ua o atu Sanerivi le tupu o Asuria, ma faamanatu iai le lē fetauti o le mea na ia faia, ina ua saili fesoasoani ia Aikupito, e ala i mea e fa’aaogaina mo le taua e pei taavale solofanua

ma isi. A o Esekia ma le nuu o Iuta, o le nuu ua masani i taua, aemaise o le Atua silisili ese e na te faatoilalo soo se malosi, ma soo se fuainumera o tagata tau. E ui o Esekia na ia toe suia le ola tapua'i o le nuu o Iuta, talu le ta'ita'iga leaga a lona tamā o Aasa, a'o lea ua foliga mai, ua atuatuva le lona loto. O le atoaga o le tala lenei i le tusi a Isaia e pei ona iai le mataupu o lenei taeao, o loo faamauina e le II Tupu 18,19. Ina ua lagona e le tupu o Esekia le palaai, i le ma'ema'ea o Asuria, aemaise ua logo mai le tala, ua faoa e Asuria nisi o aai o le nuu, o lea na saili fesoasoani ai loa ia Aikupito mo se fesoasoani, ae ua le se'i manatua, o le Atua o Isaraelu ma Iuta, o le Atua na faia vavega tetele i le amataga ole tauamataina o le nuu, a'o iai i Aikupito e pei ona iai le talafaasolopito.

Ua muamua ia Esekia lona manumanu ma lona popole ina nei afaina lana ta'ita'iga e ala i le pologa ma le faatoilaloina, ona faia ai lea o le mea sese, ae le se'i tatalo ma faatoga i le Atua mo se fesoasoani mo ia. O loo manino le faamauina e le II Tupu, mataupu e 18, le tologi atu lea Esekia o auro uma sa i le malumalu mo Sanerivi le tupu o Asuria, ina ia ola ai le taua. Peita'i, ua le mafai lava Sanerivi ma Asuria, i lo latou fia maua lea ma faaleagaina olo maualuluga o Iuta.

O le ala lea o le alu ai o le savali i le perofeta o Isaia, ina se'i ta'u iai le popolega ma le atugaluga o le tupu o Esekia, ina ia aumai ai se fesoasoani a le perofeta, aua lava le saogalemua o le nuu o Iuta. E le gata i lea, ae sei ta'u i le ave feau a le Atua, e aumai se fautuaga faa-le-Agaga, e faanofofilemu ai finagalo o le nuu, talu le ma'ema'ea o Asuria ua i o latou laueleele. Ae sili ai, o upu le mafaufau a Ravesaki le ta'ita'i au a Asuria, ua soona tautala le mafaufau ai i lo latou Atua Silisili ese.

Ua faaeteete Esekia i lona nuu ma le manumanu i le faatoilaloina ma le afaina o ola o le nuu, ae ua le faaeteete ma manumanu i le sootaga ma le Atua e pei ona sau a'i i le amataga, le fai lea o le Atua ma ona faamoemoega. Ua mafua ona tupu le popole ma le atuatuva o le tupu o Esekia, ona ua leai se ola tatalo i le malosi o le Atua, ae ua tatalo i le malosi o le tagata.

GALUEGA FAATINO: TALA TOE FAAMATALA

Tuu le avanoa i le vasega latou te toe faamatala mai ai le tala sa faamatalaina. O le galuega lea e saili ai le faalogo ma teu i le loto o le tama ma le teine. Ua tele nisi o fanau e foliga o loo faalogo i le taimi e faamatala ai le tala, ae ese le lalolagi o loo iai o latou mafaufau. O le taua la lenei o le galuega faatino lea, e saili nisi o fanau o loo faapena.

PESE: O outou e fia sao (Pese ma Viiga)

A’OA’OGA:

1. Aua nei vaivai le ola tatalo i le Atua.
2. O a mea e tutupu i le ola, ia tau lava o le Atua e faalagolago iai.
3. Fesili i le Atua mo le fesoasoani, ae le o le fesili i le isi tagata.

.....

ASO SA: 9 IULAI 2017

MATAUPU: SAUNI E TUVAE I TOTONU O LE IORITANA. (Setting foot in the Jordan)

SINI: Ia a’oa’oina le vasega ina ia iloa ma malamalama i le vavega na faia i le vaitafe o Ioritana, ina ua sopoia e Isaraelu.

TUSI FAITAU: Iosua 3:9 – 17

FESOASOANI MO FAIAOGA:

O le iai o Isaraelu e faafesaga’i ma le vaitafe o Ioritana, o se faafitauli tele mo tagata uma o le nuu, aemaise ai, ua toe ose aga ona taunuu lea i le nuu folafolaina. E le gata i lea, o le taunuu i Kanana, o le sopoia lea o Ioritana. E leai lava se isi ala e taunuu ai i Kanana, ua na o le sopoia atu lea o le Ioritana.

Peita’i o le taunuu atu o Isaraelu i le auvai o le Ioritana, o loo malosi le tafe a le vai, ma ua faigata ai foi ona sopoia atu le nuu, ma ua faigata ai

i mafaufauga o tagata o le nuu, ona ua fai le Ioritana ma faafitauli, aua ua le gata o loo tafe le vai, ae fai foi sina lautele o le vai mo le sopoia atu. O le faafitauli ua fesaga'i nei ma Isaraelu, ua tutusa lelei ma le taimi na fesaga'i ai ma le sami ulaula a'o tuliloa mai e Aikupito. Pau lava le mana'o o le nuu, o le fia oo lea i le isi itu o le sami ulaula, aua pau lea o le mapusaga e to'a iai, mai le pelu a Aikupito.

E faapena foi la le feagai ai o le nuu ma le Ioritana. O le sopoia atu o Ioritana, o le tiaina lea o fili uma o le nuu sa faafeagai. Aua o le oo atu i le isi o le Ioritana, o le iai lava lea i le tuaoi o le nuu folafolaina.

Ina ua sauni Isaraelu e sopoia le sami ulaula, sa iai pea le popole ma le masalo i loto o tagata o le nuu. Talu ai, e le'i tupu muamua se mea faapea i le soifuaga. I le ma le isi, e le o iai se mautinoa ia Isaraelu, o le Atua e silisili ese ma mamalu, ma e ofoofogia mea e nate faia. E le gata i lea, ae sa vaai muamua i nisi o vavega ma mea ofoofogia na fai e le Atua mo i latou, i le nuu o Aikupito.

O le mataupu la o lenei Aso Sa, o loo faapea mai, "Sauni e tuvae i totonu o Ioritana". O le a le mea e tatau ona sauni? E tatau ona sauni loto o le nuu, e talitonu i mea ua folafola mai e le Atua mo i latou, e sopoia atu le vaitafe o Ioritana. Ia manatua nisi o vavega a le Atua na faia mo i latou, e faamausali ai le talitonu, e sopoia ai le Ioritana.

O le faamuamua o le au Ositaulaga ma le atolaau a le Atua, o le faailoga o le muamua o le Atua i luma e saunia le ala laulelei mo lana tagata. O le ata manino o le alofa o le Atua e tu mo ona tagata. O loo manino lava le tala i lona faamatalaina, o le taimi lava na tuvae ai le au Ositaulaga ma le atolaau a le Atua i le vai, o le taimi foi lena na matutu ai le vai, ma ua avanoa ai le auala matutu mo le nuu o le Atua.

O le sauni ai o le nuu o le Atua mo le tuvae i le Ioritana, o le faamanatu i tagata o le nuu, o le a tuvae i le laueleele matutu, o le faailoga o le tu ai o le Atua i le va o lona nuu ma le faafitauli.

GALUEGA FAATINO: FAATINO LE TALA

PESE: Vivii atu ia i lo tatou Alii (Pese ma Viiga 83)

A'OA'OGA:

1. Ia saunia loto ma agaga e talitonu ai i ma le faamaoni i le Atua.
2. Ia manatua le Atua i taimi ma Aso uma.
3. O le taunuu i manuia, ina ua sopoia faigata.

.....

ASO SA: 16 IULAI 2017.

**MATAUPU: SAUNI VAE, SAUNI LE LOTO
(Bare feet, bare heart)**

SINI: Ia a’oa’o le vasega ina ia malamalama, e finagalo le Atua ina ia tapena o tatou vae ma o tatou loto, i soo se feau ua Ia finagalo ai mo i tatou.

TUSI FAITAU: Esoto 3:1 – 10

FESOASOANI MO FAIAOGA:

O loo malamalama lelei lava le tala ia Mose, ma lona aumaia lea o le nuu o Israelu mai Aikupito, e tusa o le tala faasolopito. Ose tala foi e mata’utia ma ofoofogia i le amataga o le tala faasolopito, i le mafai lea ona faamatu’u ese o nisi sa fai ma pologa mai se pule sauā ma le malosi, ona oni vavega na tutupu.

Peita’i o mea na tutupu ma le faataunuuina o le o ese mai o Israelu mai Aikupito, sa mafai ona faataunuuina, ina ua faalototeleina le sa filifilia e fai ma ta’ita’i.

Na filifilia e le Atua Mose e fai ma tagata e na te faataunuuina lona finagalo, ina ua Ia alofa i lona nuu o Israelu. Ao leoleo mamoe Mose i mamoe a Ietero le tamā o lona to’alua o Sepora, na ia iloa ai se laau o loo mumu i luga o le mauga o Horepa, ina ua fa’aali iai le agelu a le Atua. O le mumu o le laau ae le faaumatia, o loo faailoa ai le mata’utia

ma le silisili ese o le Atua o loo fia ta'u atu i lana auauna o Mose. O le fetalaiga a le Atua ia Mose ina ia tatala ona seevae, o le faailoina o le mamalu silisiliese o le Atua, e paia i soo se mea e Afio ai. E le gata i lea, a o se feau mo Mose ina ia lagonaina e ona alofivae le loto alofa i le so'otaga vavalalata o le tagata i le isi, aemaise lava i ona tagata o loo nofo pologa ai i totonu o Aikupito. Ma o le feau lea o loo finagalo ai le Atua mo Mose e fia faataunuaina. O le aveesea mai lea o lona nuu mai le ola pologa o loo ola ai i totonu o Aikupito, ina ua faafogaina e le Atua le leo o lona nuu.

O le valaauina lea o Mose ua finagalo iai le Atua, ia fai ma tino e ta'ita'i maia le nuu, a'o mea uma lava, o le a faia e le silisili ese o le Atua. E ui i le faalotolotua o le mafaufau o Mose, ona o le faigata o le galuega ma le feau ua tuuina atu iate ia, aemaise o lona alu atu lea ia Farao, ae poo ai foi ia o le a alu atu ai ia Farao ma tauanauina le nuu ina ia tuuina mai. O le aano moni lea o le finagalo o le Atua ia Mose, ina ia tapena lona loto e alu ai e faataunuu le finagalo o le Atua.

O le mea moni lava ia, e iai le taimi e mana'o ai le loto i le mea o loo fia fai, pe ose mea e fia aga'i iai. Ae seiloga e iai le feso'ota'iga o le loto ma le malosi o vae. Aua e iai nisi o taimi e mana'o iai le loto, ae augata vae e faataunuaina. O lona uiga afai o le valaauina o Mose mo le faatinoina o le feau a le Atua, e tatau ona tapena le loto, faatasi ma le malosi o vae e faatinoina le feau.

GALUEGA FAATINO: TUSIGA SOLO

1. Tusi sau solo i le ulusolo lenei **“SAUNI VAE MA LOTO MO LE ATUA”**.
2. Ia tolu fuaiupu, ae ta'i ono laina i le fuaiupu.

PESE: Tatou finau atu ia (Pese ma Viiga 176)

A'OA'OGA:

1. Ia saunia lou loto mo feau a le Atua.
2. A valaau mai loa le Atua i se feau, tula'i loa ou vae ma alu loa.

3. Usita’i i le valaau mai o le Atua.

.....

ASO SA: 23 IULAI 2017.

MATAUPU: OLA I SE OLAGA O MANUIA E MAUA MAI LE ATUA.(Live a life of grace which comes from God)

SINI: Ia a’oa’oina tamaiti ina ia mlamalama ma iloa, i le taua o le lauga a Iesu, o loo faamanatu mai ai le olaga o le tagata e tatau ona ola ai.

TUSI FAITAU: Mataio 5:1 – 5

FESOASOANI MO FAIAOGA:

O le mataupu o lenei Aso Sa, o loo matua manino mai ai lava se faasinoga o le ola o le tagata, i le feagai ai ma soo se siosiomaga o le soifuaga i taimi ma aso uma. O loo faamauiina i le faasologa o le tusi a Mataio, o le mataupu e 5 i le mataupu e 7, o le lauga a Iesu i luga o le mauga. Peita’i, ua na ose vaega o lea lauga, o loo faamamafaina e le mataupu o lenei Aso Sa.

O le lauga a Iesu, o loo faaigoaina o le **“lauga fa’aamuia a Iesu i luga o le mauga”**. O le fa’aogaina o le upu **“amuia”** e faaliliu ai le upu **“blessed”** a faa-Samoaina e faapea **“manuia”**. A aveese la le upu amuia ae sui i le manuia, ona faapea lea, o le lauga a Iesu i luga o le mauga, o le lauga faamanuia.

O le fuaiupu e 3 o loo faapea mai, **“Amuia e matitiva i le agaga; aua e o latou le malo o le lagi”**. A tuu la iai le upu manuia, o lona uiga e mafai ona faapea, o le manuia o le tagata e mativa i le agaga, o le faia lea o le malo o le lagi mo ia. E mafua lea tulaga, ona o le tagata e mativa i le

agaga, o le tagata ua gaogao (empty) lona olaga i le ola faa-le-agaga, ma ua naunau ina ia faatumuina e le Alii.

O le fuaiupu e 4, “Amuia e faanoanoa; aua e faamafanafanaina i latou”. O le tagata ua maua i faanoanoaga, o le tagata lena e faamafanafanaina e le Agaga o le Alii. O lona uiga, e mafua ona faa-amuia iai le Alii, pe manuia lena, ona ua le o se faamafanafanaga mai i se isi mea poo se isi tagata, o le faamafanafanaga e tu’usa’o mai e le Agaga o le Alii i le tagata ua maua i faanoanoaga.

Ma le fuaiupu e 5 o loo faapea mai, “Amuia e agamalu; aua e fai mo latou tofi le nuu”. O le manuia o le tagata e olaina le agamalu, e fai mo latou tofi le nuu. O lona uiga, o le tagata e agamalu, e faamanuia iai le Alii, e ala lea i le tofia i tofiga taualoa poo se isi tofiga maualuga o le nuu ma isi.

O le aotelega lava o le lauga a le Alii o loo faamanatu mai ai i le tagata ua mativa i le agaga, o le tagata e maua i faanoanoaga, ma le tagata e agamalu, latou te manuia i le faamanuia a le Alii. O i latou na ua faa-amuia iai Iesu pe a ola i latou i ia vasega o le olaga, aua e tuusa’o mai e le alofa o le Alii lona Agaga, e mafutaina i latou ia ma faamanuia iai latou ia. O lona uiga, ia aua la le popole le tagata pe a afai ua gaogao lona ola faa-le-agaga, pe faanoanoa lona loto, ia pe tusa lava ona agaleagaina ma sauaina ae tumau pea i le agamalu, aua e faamanuia iai le Alii. O tagata ia o loo saili mai ai le Alii, latou te ulufale atu i le malo o le Atua e faavavau. Aua o le auga ma le faamamafa lea a Mataio i lana tusitusiga, o le Malo o le Atua (Kingdom of God).

O le tama ma le teine e olaina vaega eseese o le ola e pei ona faamanatu mai ai le Alii, ma onosa’i ma faatalitali i le Agaga o le Alii, o le tagata manuia lena.

GALUEGA FAATINO: FETUFAA’I MA LE VASEGA

Fesili i le vasega pe iai se fesili. Afai e iai, ona faasoa ai lea ma le vasega atoa. Ae afai e leai, ona saunia lea e lau susuga ni fesili e tulituliloa ai le mataupu.

PESE: “Amuia tagata uma” (Pese ma Viiga 195)

A’OA’OGA:

1. Ola i faasinoga ua tuuina mai e Iesu.
 2. E manuia le tagata e faalogo ma usita’i ia Iesu.
 3. Ua a’oa’o mai Iesu i le olaga e tataua ona tatou ola ai.
-

ASO SA: 30 IULAI 2017

MATAUPU: IA TASI LOU LOTO (Singleness of heart)

SINI: Ia a’oa’o ina le fanau ina ia maua le loto mau, aua o le loto mau, o lou tumau i lou loto ma le amio sa’o.

TUSI FAITAU: Mataio 5: 33 – 37

FESOASOANI MO FAIAOGA:

O Mataio o le tagata e agaga tele i le tu faa-Iutaia, auā o ia o le Iutaia faamaoni. O lana molimau foi la i le Tala Lelei e uiga ia Iesu, e atagia mai ai i ana faaupuga le fa’aaogaina e Iesu o aganuu faa-Iutaia e momoli ai lana feau i ona tagata. O le mataupu lenei e 5 ua logologoa i le au faitau Tusi Paia, o le lauga fa’aamuia a Iesu i luga o le mauga. Peita’i o le vaega o le lauga sa tatou faitauina o loo talanoa ai Iesu i se tasi o tulafono e pei ona sa sau ai le nuu mai le Feagaiga Tuai. O le mataupu i le tauto, o lou taumafai lea e fa’aaoga le suafa o le Atua e fai ma faamaoniga o se mea. Ae manino lava le vavao a le tulafono e 3 (Esoto 20: 7) “Aua e te ta’u fua le suafa o le Alii lou Atua, auā e lē faasaoina e le Alii o lē ta’u fua i lona suafa. Lea foi e toe taua mai i le (Levitiko 19: 12) Aua tou te tauto i lo’u igoa ma le pepelo, aua foi e te faaleaga le igoa o lou Atua, o a’u o le Alii.

O loo silafia lelei e Iesu o le suafa o lona Tamā o loo fai ma alofaga i le au Tusiupu ma le au Faresaio e ufiufi ai a latou mea leaga o loo fai. A o le uiga moni lea o saunoaga a Iesu i lana lauga lenei. O loo lauga i le motu o tagata ae o loo a'oa'oa ai ma le au Faresaio ma le au Tusiupu. Fai mai le ulutala: Ia tasi lou loto, o lona uiga o le amiotonu ma le fai o faaiuga sa'o e sau mai le loto. A e talitonu i lou loto ma e tausisi e fai le mea tonu ona e lē aafia lea i le vaivaiga lea o le tauto.

O nisi ua pei o se taaloga le tauto, ae ala ona faapea o le faalotolotolua, ua lē talitonu i lona lava loto. Fai mai Iesu aua le tauto ae tau ina faapea ioe, ioe, po o le leai leai. O le uiga lena o le loto mau, Ia tasi lou loto, tumau i le mea moni o loo talanoa mai ai lou loto nai lo le tauto ae pepelo.

O le fai o le mea sa'o, amio lelei, faamaoni, e te loto tele ai foi e te tautala i le sa'o i luma o tagata. Fai mai le tulafono e le faasaoina e le Alii o e ta'u fua i lona suafa.

GALUEGA FAATINO: TAALOGA O LE MAFAUFAU

O le taaloga lenei e fa'aaogaina ai le Numera, e uma ifo lona galueaina, e tasi le tali e tutusa uma ai tamaiti uma. Tusa lava poo le a le eseese o fuainumera e pikiina e le tamaititi, e tasi lava le tali e tutusa uma ai i latou.

Faatonuga: Ia faalilolilo ina ia aua nei iloa e le isi le numera a le tasi.

- 1. Filifili sau fuainumera.*
- 2. Faatele i le 2.*
- 3. Faaopoopo iai le(pule oe i lau numera e faaopopo)*
- 4. Vaevae i le 2.*
- 5. Toese mai ai lau fuainumera na filifili i le amataga.*

O le tali, e maua mai i le afa (1/2) o lau numera na faaopoopo.

Faata'ita'iga: afai o le numera 4 na e fai i le vasega e faaopoopo, o lona uiga o le tali e tataua ona 2.

PESE: 91(Pese ma Viiga)

A’OA’OGA:

1. Aua le tauto pepelo.
 2. Ia faamaoni ma fai mea lelei, e te maua ai le loto tele e te tautala ai i le mea moni.
 3. Ia ‘alo’alo ese i mea leaga ma mea vaivai o lenei olaga, o mea na e fano ai i tatou.
-

ASO SA: 6 AOKUSO 2017

MATAUPU: AUA LE POPOLE AE FIAFIA (Don’t worry be happy)

SINI: Ia a’oa’oina le fanau ia malamalama ia aua nei o tatou popole i mea o le ola nei, a ia muai saili le malo o le Atua.

TUSI FITAU: Mataio 6 : 25 – 34

FESOASOANI MO FAIAOGA:

O loo fa’aaauu pea le Lauga a Iesu i luga o le mauga e tusa o le mau a Mataio. O loo ua a’oa’o mai ai Iesu ina aua nei popole i mea o le ola nei. O mea e ‘ai po o mea e inu ma mea e nonofo ai. E lēo le uiga o a’oa’oga a Iesu ina aua nei manatu i mea e ‘ai po o mea e inu po o ni fale foi. Peita’i o uiga o a’oa’oga male mataupu silisili oloo aumaia e Iesu. O le ‘aua nei avea mea a le tino ma mea e tatou te popole tele ai. Leaga o mea ia e foa’iina mai lava e le Atua, ao le ola ua aumaia e le Atua o le mea lea ua sili nai lo nisi mea. E tatou te saili ai i lona malo ma lana amiotonu.

O le faitauga o lenei Aso Sa o loo sosolo mai i le fuaiupu e 24 o loo fetalai ai Iesu “*E leai se tasi e mafai ona auauna i alii e toalua.*” O alii

e toalua o loo faasino i le oa ma le Atua. E taua le oa, peita'i e sili ai ona taua Le na ia foa'i mai le 'oa.

Ua fetalai manino Iesu i le eseesega o mea ia e lua e pei ona iai le faamamafa o lenei Aso Sa, oloo aumaia ai ni upu tuu faafeagai se lua, O le *popole* ma le *fiafia*. Tatou manatunatu loloto i uiga o nei upu e lua. O le **popole** e mafai ona faapea –

1. E avea ma lagona faatupu ma'i ai iai tatou,
2. E avea le popole ma ala e taotaomia ai ou lagona,
3. Fai ma ala e faalavelaveina ai au galuega,
4. E afaina ai le va feso'ota'i ma le isi tagata,
5. Avea ma ala e tafieseaa ai le ola faatuatua i le Atua.

O se tasi o taeao, na savalivali atu ai Oti e agai i le taulaga, na fetau'i ma se tasi o tama ona fesili lea o le tama poo fea a agai iai. Na tali Oti *ou te alu atu e fasioti tagata e 10,000*. Fai mai si tama lea, *oka ta'i leaga ma lou le alofa ma lau mea o le a fai..* Na tali Oti o lo'u lea tiute o le ave o tagata ua tataua ona feoti, lea la e 10,000 tagata olenei aso. Ona alu lea o Oti, mulimuliane toe fetau'i Oti ma le tama lava lea. Ua lagona le ita i le tama, ma ia faiatu – *Na e faimai foi e te alu e ave le 10,000 ao lenei ua 70,000..* Faimai le tali a Oti – *tama, aua e te ita ia te a'u, na o le 10,000 lea ou te avea, o le isi vaega tele o la e ave e **POPOLE**....* Ioe o le popole lava ia e iai taimi e ono oo atu ai i le Oti. O itu ogaoga ia lea e a'oa'o mai ai Iesu ina ia aua le popole. Peita'i o nei uiga uma e tupu mai ai i le popole e maua lava le tali ina ua tatou maua le fiafia. Ao lea fiafia e aumaia e le Atua iai tatou. Le ala lea o le Afio mai o Iesu Keriso ina ia saga faatumauiina pea lo tatou fiafia, ae leo le popole. Aumaia e Iesu nisi o vaega e le tataua ai ona popole ae fiafia.

Fuaiupu 25 – O le Atua o le puna ma le pogai o le ola ma le malosia. Aua afai na aumai e le Atua le ola iai tatou, o Ia lava foi e na te tausia lo tatou ola. E le o le ola i le ai, ae ia ai ia ola. O lona uiga e leo faamamafa o loo i mea e ai ma nisi mea, ao le faataua o lou tausia lelei lea o le ola mai le Atua. E mafai foi ona faapea ina nei o tatou popole i

mea e ai, ona soona mafaufau lava lea i le ‘ai, ao nisi ia o ala e tutupu mai ai faama’i ma maua ai i ma’i o le tino.

Fuaiupu 26 – E aumaia e le Atua mea e manaomia. Ua aumaia le ata o le manu e nate sailia se mea e nofo ai ma ni meaai, a ua ola fiafia i le siosiomaga ua faia e le Atua. Aua faapei ona tausia e le Atua o manu felelei, ua latou ola fiafia i mea ua aumaia e le Atua. E le sili ea ona tausia e le Atua le tagata ua fai ma pule i mea uma o le foafoaga.

Fuaiupu 27 – E faasoa mai e le Atua aso ole ola. O le ola fiafia e leai se popole o se tasi lea o vailaau aoga mo le soifua faaumiumi o le tagata. Aua o le popole ua avea ma faatupu gasegase i nisi o taimi ma vaveai ona puupuu le soifua. Ae a maua le fiafia pe aua le popole a ia faamoemoe pea i le Atua e na te tausia i tatou ma faasoa mai ana faamanuiaga moi tatou. O le a mafai ona maua le ola solo lelei ma le soifua manuia.

Fuaiupu 28 – 30- E faafouina i tatou e le Atua. O le Atua lava ia e ana mea uma ua iai tatou. E faapei ona iai o le atamai ma poto silisili ese ia Solomona e le’i mafai ai lava e lona atamai ona ia faia ni mea tetele ma ni ofu mananaia mo ia. O ana mea uma o mea na afua mai i le tausiga a le Atua. O le malosi o le Atua na faafouina ai lona atamai ma lona mamalu ia Isaraelu.

Ua faamanatu mai foi moi tatou le fanau, ia ‘aia nei avea mea e ‘ai ma lavalava ma fale ma mea e tupu ai le popole iai tatou. O lona uiga aua tatou te tausili ma naunau i ia mea, a ia tatou naunau e saili le finagalo ma le amiotonu o le Atua. Ona tatou maua lava lea o le ola toafilemu male fiafia moni mai le Atua. O tatou o e ua faalupe o lumanai o aiga,ua faamoemoe mai iai tatou le manuia o aiga nuu ma le Ekalesia. O mea ia o lo o faamoemoe mai ai, ina ia maua ni galuega lelei aua le atinaeina o aiga i lona itu i fafo. O se mea e lelei tele aua o le amataga lava lea o lou ola tautua i le Atua. E taua ai lava lo tatou tausili ina ia maua meaai ma fale ma lavalava, ao le a’oa’oga o lenei aso ina nei maua le oa ma le manuia ona faatuatuanai lea o le alofa o le Atua.

GALUEGA FAATINO:

Toe faamatala mai i ni au lava upu le uiga o le upu Popole?

PESE: 73 (Pese ma Viiga)

A’OA’OGA:

1. Aua tatou te popole vale
 2. E tausia i tatou e le Atua
 3. Tatou fai mea fiafia
-

ASO: 13 AOKUSO 2017

MATAUPU: AMANAIAINA O LE TAGATA (Mindful of Mortals)

SINI: Ia a’oa’oina le fanau ia malamalama, e le faatauvaā i le Atua le tagata.

TUSI FAITAU: Salamo 8

FESOASOANI MO FAIAOGA:

Ua pese le Fai Salamo i le va o le Atua male tagata. O le Atua e silisili ese, ma le taua o le tulaga o le tagata i lana foafoaga paia. O le mamalu lea o le Atua o loo atagia foi i le tagata auā o lona faatusa paia na ia faia ai le tagata ia foliga ia te ia.

Fuaiupu 2- O loo tautala ai le Fai Salamo *i le viiga i gutu o tama meamea ma tama fesusui*. O le aumaia e le Fatupese o tamameamea, o se ata o le tamaitiiti e mama ma le pona le mafaufau i ni mea e tupu ai

le agasala. Oi latou foi latou te iloa moni ona viia le Atua i le Agaga o leai o se isi mea e ponaia ai le mafaufau. O le loto mama foi lea e mafai ai ona tete'e atu ai i e ua ita ma faasaua mai ia tei tatou. Ao le uiga lea o le mamalu o le Atua ua aumaia moi tatou, o le mamalu e tatou te iloa ai ona tete'e atu i e ita ma faasaua mai. O le faailoga e le faatauvaa tatou i le silasila mai a le Atua.

Fuaiupu 3&4 – Afai tatou te manatunatu i galuega mamana a ona aao i mea o le foafoaga, ona tatou lagona lava lea o lo tatou faatauvaa. Aua o le mea moni ua laugatasia uma i tatou i mea na faia e le Atua, peita'i ua tulagaese le tagata i le faasologa o le foafoaga a le Atua. O le fesili – Aisea ua manatu ai le Atua ina ia tulagaese le tagata i isi mea o le foafoaga????Ioe ua tatou iloa le eseesega, peita'i o le pule faitoatasi lena a le Atua e le au iai le malosi a le tagata. O le faaeaea faitoatasi a le Atua mo le tagata. Aua o ai na iloa pe tei ua muamua manu ma laau i le tagata? E matua faatauvaa lava i tatou pe a tatou manatu i le foafoaga, ae ao ona tatou lagona le Agaga faafetai, aua e leo faatauvaa i le Atua le tagata na ia faia. Le ala foi lea na ia faia ai i lona faatusa, ina ia tatou iloa lo tatou feso'otaiga ma le Atua.

Fuaiupu 5 – 8- Ua le faatauvaa lava i le Atua le tagata. Ua pese le fatu pese i le faasologa ma le faatulagaina e le Atua o lana foafoaga paia. A fua iai i manatu o le Faisalamo – E mafai ona faasolo i se faasologa faapea – O le **Atua,- Agelu,-Tagata,- manu ma laau**...Aumaia ele faisalamo le pule i isi mea uma o le foafoaga. O le amanaia lea o le tagata e le Atua.

Ioe o le faasologa manino a lea e tumau e faavavau, ona o le manatu o le Atua i lana tagata. O se a'oa'oga taua foi lea mo tatou le fanau. Ia tatou iloa mautinoa –E le faatauvaa i tatou i luma o le Atua, Leaga o le tagata na ia faia i lona faatusa paia, ua aumaia e pule i isi mea uma o le foafoaga. E leo le pule malosi ao le pule e tausimea lelei ai aua le vaaia o le foafoaga paia. Ia tatou iloa lo tatou feso'otaiga ma le Atua. Ua uma ona aumaia le faasologa, ina nei o tatou leiloa ona amanaia ma toe faafoi le viiga i le Atua, ona avea lea ma ala e suia ai le faasologa. Ina

nei muamua manu ma laau ae mulimuli ai le tagata.....O le amanaiaina e le Atua o le lalolagi na ia Afio faa-tagata mai ai e ala i lona Alo pele o Iesu Keriso...Amene.

Uiga o Upu ma Fuaitau”

- i) tama meamea, tama fesusu: tamaiti pepe
- ii) faanofosaoaina: faamagaloina

GALUEGA FAATINO: Tusiga Solo

Tusi mai sau solo e faatatau i ni ala ua le faatauvaai ai le tagata i le Atua? (3 fuaiupu tai 4 laina i le fuaiupu)

Pese Aoga Aso Sa: Na faia e le Atua o manu felelei.....

A’OA’OGA:

- 1. Ia tatou iloa lo tatou feso’ota’iga ma le Atua
- 2. E le faatauvaai i tatou i le silasila mai a le Atua
- 3. Ia tatou iloa ona toe viia le Atua ona o lana foafoaga paia ua tatou iai.

.....

ASO SA: 20 AOKUSO 2017

MATAUPU: FA’AALI MAI E LE LAGI (The Heavens proclaim)

SINI: Ia a’oa’oina le fanau ia malamalama e silisili ese lava ma mamalu le Atua, ia tatou iloa ona viia o ia.

TUSI FAITAU: Salamo 19

FESOASOANI MO FAIAOGA:

O le Salamo sa faitauina o loo tautino ai e le Fatu pese le matuā silisili ese o le Atua ua fa'a-ata mai e le fetaliaiga ma le gasologa o mea o le foafoaga paia. Ua foliga mai ai o loo iai lava le lagi i lugā, o le lagi o loo Afio ai le Atua silisili ese. Lea ua fa'aali mai ina ia iloa ai e le tagata o le Atua mamalu o lo o Afio o ia i le lagi. Ua viia foi o Ia i ana lava galuega mamana.

O Tavita na tofia mai e avea ma tupu ao iai i le lafu mamoe i lona tiute faa leoleo mamoe. O le iai la o Tavita i lona tiute faa leoleo mamoe, o se galuega e le faigofie. Aua foi e le gata i le ao, ae le moe foi i le po, masalo a maua se taimi e fai ai sina moe pe nao le tasi i le lua itula i le po. O le la foi e susulu ai i le taeao, o le ata manino o le alofa fa'aauau o le Atua.

(Fuaiupu 2 – 4) - E iai le manatu o le isi lea vaega e tupuga mai ai mafaufauga o le fatu pese. O lona iai i le po e na te vaaia ai masina ma fetu o le agi, o le vanimonimo i le ao, e mavae atu foi lea po ma lea po, a ua leai lava se fili e lamatia le soifua ma le ola, e le gata ia te ia ao ana mamoe. Lea la ua fatu e le Fatu Pese le alofa o le Atua o se tagata(personified) e le lagona lona siufofoga, a ua ta'u mai e foliga ma ana galuega lona mamalu silisili ese e le gata e viia ai o ia i le lagi ae faapea foi i le lalolagi. O le ata manino foi lea ua tatou talia lautele i nei ona po. O le fesuiaiga o le tau, o le timu ma le la, o le alu atu o lea aso ae sau leisi aso, o le iu manuia o feau ma galuega o lea aso ma lea aso. O le ao ma le po, o le la masina ma fetu. O le leo le lagona lena o loo fa'aali mai ai le Atua iai tatou. Ao le leo foi e o'oo'o i tuluiga uma o le lalolagi.

(Fuaiupu 5 – 6)- Ua talanoa le Fai Salamo i le fale ie ma le la, o le ata o le paologia e faatusa iai le fiafia o le fitafita tau ma le tagata galue e mapu ane ai i le mea paolo. Ua tautala mai le Atua e ala i lana la, peita'i e leo le manatu o le Fatu Pese e leo le la ao le paolo o le mea foi e faia e le Atua mo lana tagata. O le ata o le fale ie, ua faatusa iai teuga a le faatoa faiava ua sau mai lona afeafe le ila ila ma le matagofie, pe a taia

e le la le faleie i lona ilaila ma pei e sesega i le vaai. Ao le la o le ata alu mamao lea ma le malosi o le alofa o le Atua mo ona tagata. Ua faatusa i le tamoe a le fitafita malosi e le malolo. O le gagana mai foi a le la e leai lava se mea e lilo ai i ona ave malolosi, o le uiga foi lea o le silasila mai a le lagi iai tatou.

(Fuaiupu 7 – 11) - O loo fa'aaauu pea le gagana a le Fatu Pese o loo natia ai pea le Atua, a ua ia fa'aogaina pea ana galuega e ala i lana UPU, ma e foliga mai o lea ua iai le leo o le Atua. A silasila iai e leo fa'aogaina e le Fai Salamo le suafa o le Atua, ao le Alii. O lea ua faa-gaganaina e le Fatu Pese le upu a le Atua. O upu nei a le Atua;

1. Tulafono (*The law of the Lord is perfect.*) O tulafono lava ia mai le Alii o tulafono e atoatoa, o le atoatoa foi lea e tatau ona savavali ai Israelu e tusa o le Feagaiga Tuai ia ma nei ona po. O le tulafono foi na aumaia e le Atua mo le tagata, o le tulafono na lima taita'iina ai Israelu ina ia mafai ona latou toe faatasi ai ma lo latou Atua osi feagaiga.
2. Poloaiga faamaoni *The testimony of the Lordis sure*, Ua aumaia ele Fatu Pese le poloaiga faamaoni ina ia tatau ai ona matua atoatoa le faatuatuaga o le tagata i le poloaiga. Aua afai o le poloaiga mautinoa ma faamaoni, aisea la e le tatau ai ona mulimuli ma faia e tusa o le poloaiga? O se ala e nate aumaia foi le faamaoni iai latou ua faatinoina le poloaiga. O lona uiga o le feau mai le lagi e leo se feau e na ona tatou olegia pe tatou te le faamaoni ai. E tau le faamaoni mai o le lagi i lo tatou foi faamaoni iai.
3. Feau *The statutes of the Lordareright*, E tonu le feau a le Alii,,,,Ioe ua tautino le fatu pese i le feau mai le lagi e leo se feau e tala pepelo. O le feau mai le Atua o ia o le pule ma o Ia o le na foafoaina mea uma.
4. E mama le Mata'u *The fear of the Lordis clean*, O le ola mata'u i le Atua o le faia lava lea o lona finagalo alofa moi tatou. Afai tatou te matatau, ona mautinoa lea lo tatou iai faatasi ma lona finagalo.

5. Poloaiga e mama *The commandment of the Lord is pure*; O le upu a le Atua ua aumaia o le upu e mama ma le pona. O le upu e tafiesea ai le ola palapala ma le agasala a le tagata. O le alaga mai lea a le lagi ina sei faamamaina le tagata agasala. Afai tatou te mamai luma o le Atua, e faapena foi ona faia a tatou feau ma le loto e mama. A ua fetalai foi Iesu – “*Amuia e loto mama aua latou te iloa atu le Atua*”.
6. Faamasinoga *The judgments of the Lord are true*; O le taunuuga lea o upu a le Atua i manatu o le Fatu Pese, o le taunuuga foi lea o le tagata e ala i lana faamasinoga. O le manatu o le Fatu Pese, ina nei manatu mama iai le tagata i le Faamasinoga a le Atua, ao le Faamasinoga e sa’o ma amiotonu. O le faamsinoga e faavae mai i le faatinoina o le mea sao ma le mea sese.

O nisi ia o feau taua o lo o ua fa’aali manino mai ai le lagi e tusa o mafaufauga o le Fatu pese o Tavita. O lo o ua gagana mai ai le lagi i mea o loo iai ma le mamalu o le Atua, ae le gata i lea o lona finagalo mo ona tagata faatuatua. O se pese foi ua tatau ona tatou pepese ai e saga viia ai lona alofa iai tatou le fanau. E tatau ai foi ona tatou matua talitonu ma le atoatoa i lea mamalu ua gagana mai moi tatou. E ui ina pei e faatauvaai iai tatou le aulia o lea aso ma lea aso ma le tele o mea o le foafoaga o loo tatou ola ai, peita’i o le alofa lena o le Atua o loo auai mai pea.

O le fa’aaliga manino mai le lagi, lea na Afio mai ai lona Alo pele e toatasi, ina ia tatou iloa mautinoa ai lona alofa faamaoni moi tatou lana fanau.

Uiga o Upu:

- | | | | |
|-----|--------------|---|---------------------------|
| i) | faatoafaiava | - | tama faatoa fai le toalua |
| ii) | tuluiga | - | soo se vaega |

GALUEGA FAATINO:

Tauloto faatasi mai le fuaiupu muamua.

PESE: 3 (Pese & Viiga)

A’OA’OGA:

1. Ia tatou iloa ona viia le Atua
 2. E silisili ese ma mamalu lava le Atua foafoa
 3. O loo fa’aali manino mai le Atua i aso uma.
-

ASO SA: 27 AOKUSO 2017

MATAUPU: O LE APU E TASI E NA TE AVEESEA LE MEA ATOA (An apple a day took wholeness away)

SINI: Ia a’oa’oina le fanau ia malamalama o le mea sese e tasi e aveesea ai le tele o mea lelei.

TUSI FAITAU: Kenese 3: 1 – 7

FESOASOANI MO FAIAOGA:

O le tala sa faitauina ua masani ai la tatou faafofoga. O le faaosoosoina o le fafine o Eva e le tiapolo na tino mai i le gata. E tusa ai ma le foafoaga paia a le Atua e tusa o le molimau a Kenese, “*ua sili le atamai o le gata i manu uma o le vao na faia e le Alii le Atua*”. O lona uiga ua fa’aaogaina e le tiapolo le gata e ui mai ai lana faaosoosoga, aua ua manatu Eva o le gata o le manu atamai.

Ua manino le poloaiga a le Atua na tuuina ia Atamu ma Eva- “*O laau uma o le faatoaga lua te aai ai, ao le fua o le laau oi totonu o le faatoaga, aua ma te aai ai aua foi ma te papa’i atu ai nei ma oti*”. Ua

tatala le avanoa i laau uma o le faatoaga, peita'i ua iai le laau e tasi mai le lasi o laau ua faamaufaailogaina e le Atua. O le laau e iloa ai le lelei ma le leaga. O le laau lea o loo fai ai nei finauga a le gata ma le fafine o Eva. Peita'i, ua tatou iloamai le tala, o le apu e tasi mai le laau ua faamaufaailogaina, o le apu lena na aveesea atoa le mamalu o le Atua na tuuina mo le ulua'i tagata i le amataga.

Faimai le tala i se tasi tupu ma lana auauna, o lenei auauna e ese ma le galue faamaoni. Ua leai lava se faatonuga a le tupu e le faia e lenei auauna. O se tagata faamaoni ma galue malosi. Peita'i i se tasi aso, sa lagona le vaivai i le Auauna ona o ma'i o le tino. Sa lagona le lē fiafia o le tupu i lana auauna ona ua lē alu ae e fai ona tiute. O le ala lea na manatu ai le tupu ua tataua ona faasala lana auauna ona ua lē faamaoni. Sa tonu i le manatu o le tupu o le a ave lana auauna e lafo i le pa liona. Sa augani le auauna i le tupu e malie pe mafai ona tuu ifo ni aso se fitu ona fai lea o lona faasalaga. Na talia e le tupu le toe mana'o o le auauna. O aso e fitu ia na tuuina i si auauna, o aso ia na alu ai le auauna ma fafaga ma faalata liona a le tupu. Ua mavae aso e fitu ona faataunuu loa lea o le faasalaga a le tupu. O le mea ofoofogia na vaaia i le tupu na faasaoina lava le auauna ina ua tuuina i totonu o le pa liona. Na fesili le tupu i le auauna pe aisea ua le aia ai ia e liona, ae faimai le tali a lenei auauna...E tele aso sa ou auauna ai mo oe, ao lea ua tasi le mea sesē a ua e faasalaina a'u, ae nao le fitu aso na ou mafuta ai i liona a lea ua latou amanaiaina a'u...

Ioe tamaiti, ole vaega e fia faamamafa o le a le umi ma le tele o ni mea lelei tatou te faia, o nei mea lelei e toe tauleagaina uma lava ina ua tatou faia se mea sese matuia...O le mea moni lava e leai lava se isi i lalo o le la e atoatoa, e iai lava foi taimi e tatou te faia ai ni mea sesē. Peita'i e leo le finagalo o le Atua e tatou te faia ai ni mea le lelei. Ua iai tatou foi le Agaga o le Atua e tuu mumusu pea iai tatou i mea sesē ma ala o le tiapolo.

O le apu e tasi na taumafa ai Eva, o le apu lena na aveesea le mamalu aemaise o le manuia o le Atua sa i le tagata talu le amataga. E le faapea e leaga le apu peita'i o le apu ua uma ona faamaufaailogaina e le Atua. O le apu sa tofotofoina ai le uluai tagata pe usita'i i le Atua.

Ta'ua i le molimau a Kenese f6 – “*Ona vaai atu lea o le fafine i le laau e lelei lava pe a ai, ma ua matagofie mai...*” O loo aumaia ai se mafaufauga i le vaaiga i fafo, o le aulelei ma le matagofie mai i le vaai, ua avea ma ala e tosina iai le loto ma ua manao ai ina sei tofo iai. Ioe tasi lea o a’oa’oga tauaaua o le lasi o le vaai o le isilea ala o faaososoga iai tatou. Ona tupu ai lea o manatu sesē, ma faatino ai loa ma le mea sesē.

O se feau tauafoi lea mo tatou le fanau, o se mea sesē tatou te faia, e avea lea ma ala e tauleagaina uma ai ni mea lelei sa tatou muai fai. Aua foi tatou te vaivai i le tiapolo ma ana faiga. Ma ia tatou mautinoa ua ala eseese le ui mai o le fili iai tatou. Ma ia ‘aua nei avea le matagofie ma mea suamalie. O Iesu Keriso na aumaia lona ola e faasaoina ai i tatou mai le tele o a tatou mea sese Amene.

GALUEGA FAATINO:

Faatino le Tala....

PESE: Tulei ese, Tulei ese.....

A’OA’OGA:

1. Ia tatou mataala i ala a le fili ma le tiapolo
2. O mea sesē tatou te fai e tauleagaina ai ni mea lelei.
3. Aua le tosina gofie la tatou vaai i le matagofie aua e tupu mai ai le agasala.

.....

ASO SA: 3 SETEMA 2017

**MATAUPU: TU’U PEĀ LE PALAPALĀ O OU LIMA
(Getting your hands dirty)**

SINI: Ia a’oa’o le vasega ina ia malamalama, o le palapalā o lima, e lē afaina ia Iesu, ao le loto o le tagata ia mama i luma o le Alii.

TUSI FAITAU: Mareko 7: 1- 13

FESOASOANI MO FAIAOGA:

E le o se tulafono le taumafa pe ai foi, ae le’i fafanoina lima. Ao le talitonuga o tagata Iutaia anamua, sa fau mai i le poloaiga na fetalai ai le Atua ia Mose i le tusi o Levitiko 22, e faatatau i le au faitaulaga, poo i latou e tagofia ma aai i mea paia i luma o le Atua; Ia tatau i nei tagata ona faamamaina, ao le’i tagofia pe aai foi i nei mea paia.

Ao le talitonuga foi faa-Iutaia inā ona po; E sa ona pa’i atu i se tagata ese, se tagata ma’i, se manu ua mate, se tagata ua manu’a poo sē foi ua oti, ona e afaina ai i latou i le agasala. A uma foi ona fai se galuega poo le a lava se mea na fai, e tatau lava ona fafano lima ao lei ai. E oo foi i ipu e fa’aaoga e feinu ma aai ai, e tatau lava ona faamama ao le’i fa’aaogaina. O le manatu laualuga lava o Iutaia, o latou o tagata mama; auā o tagata o le nuu filifila o le Atua.

O le ala lea o le taofi mamau o le au Faresaio i lea talitonuga mai anamua. Ma ua latou manatu ai, e lē tatau ona solia e se tasi. Lea lava ua oo i le Afio mai o Iesu le Alii o le tulafono, ua lē taliaina lava e ta’ita’i o Iutaia. O le taooto ai la o nisi o so’o o Iesu e aai, na iloa ai e Faresaio, ua aai ae le’i fafanoina o latou lima. O ina na mafua ai ona fesiligia e Faresaio ma Tusiupu Iesu. I le manatu o nei ta’ita’i o Iutaia; ua le gata ina lē usitai ona so’o i uputuu a ē anamua, a ua aai ma o latou lima e lei fafanoina. E leo iloa e faresaio ma tusiupu, o Iesu o le Alii ia o le tulafono. Le ala lea o le fetalai manino o le Alii i upu o valoaga a Isaia, lea ua taunuu i nei tagata. O tagata faafiaamionu i latou. Na ona ta’uta’u o tagata o le nuu filifilia o le Atua, ae lē savavali ai, ao uputuu ma le talitonuga o latou tagata anamua, lea e faalala mai e fai ma o latou talipupuni.

Fai mai Iesu; “Ua vivi’i mai lenei nuu i o latou laugutu, a o latou loto ua taumamao ia te au”. Tamaiti, aisea ua taulata ai Iesu i upu o valoaga a

Isaia? Ioe, a lea ua taunuu i nei tagata upu ia a Isaia. O le ala foi lea o le toe faamanatu e le Alii o lea manatu o le perofeta; Aua o le finagalo o Iesu; E leai se afaina o le palapala o lima, aua o le tagata lava ia na faia e le Atua i le palapala, e toe foi ifo i le palapala. E lē fia silasila le Alii i fafo; ao le loto o le tagata e taua. E lē o le mea e alu i totonu e leaga ai le tagata, ao le mea e sau mai le loto.

Ioe tamaiti, ua a'oa'o mai e Iesu lea foi fuaitau mo i tatou. E le faapea ua le taua le fufulu o lima, e taua mo le soifua maloloina lelei; Ae le o mea ia e fa'aalia ai lo tatou matatau i le Atua. O le mata'u i le Atua; o le faia o lona finagalo ae le o talitonuga o aso la.

O le ala lea o le affio mai o le tatou uo o Iesu, sei ta'ita'i i tatou i le finagalo o lona Tamā, ina ia tatou savavali tonu ai, ona maua ai lea o le manuia.

Uiga o Upu ma Fuaitau:

- i) uputuu - o upu, po o se amioga ua masani ai tagata, sa tuutaliga ma tauologologo mai aso anamua.
- ii) mulumulu - o le fufuluina o lima po o vae i vai faamama ai
- iii) valoaga - o ni manatu ma ni lagona e faatatau i se mea o le a tupu i le lumana'i.
- iv) kopano - o se meaalofa ua e foa'i e fai ma au taulaga i le Atua.

GALUEGA FAATINO: Taliga Fesili.

Faailoa tagata e ana faaupuga ma mafaufauga ia:

1. E le mafai lava ona aai i latou seia uma ona fafano o latou lima.
Tali: Faresaio ma Iutaia uma
2. Se a le mea e le usiusita'i ai ou so'o i uputuu a ē anamua?

Tali: Faresaio ma Tusiupu.

3. Ua tatau lelei le valoaga a Isaia ia te outou.

Tali: O Iesu

4. Ua vivii mai lenei nuu i o latou laugutu a o latou loto ua taumamao ia te au.

Tali: O Isaia

A’OA’OGA:

1. E sili ona taua ia Iesu le loto o le tagata i lo o ona lima.

2. Ia talia Iesu i o tatou loto i taimi uma.

.....

ASO SA: 10 SETEMA 2017

**MATAUPU: AUINA E TALA’I LE TALALELEI
(Sent on a mission)**

SINI: Ia a’oa’o le vasega ina ia malamalama i le galuega faamisiona; O le valaauina e fai se galuega e tusa ma le finagalo o lē e ana le valaau, ina ia taunuu i le manuia.

TUSI FAITAU: Galuega 13: 1- 15

FESOASOANI MO FAIAOGA:

O Paulo tamaiti na valaauina e Iesu i le mataupu e iva i le ala e agai atu i Tamaseko, ao alu atu o ia e saili mai i le au-Kerisiano; ae na suia e le Alii e fai ma ave feau o le Tala Lelei i lea itu faapaupau o le lalolagi.

E eseese le valaauina o Paulo ma so’o o Iesu; auā o le sefulu ma le toalua na filifilia; sa vaava’ai, nonofo i lalo ma faalogo i a’oa’oga a Iesu

ao avea ma so'o. Mulimuli ane fai ma Aposetolo ina ua lava tapena i le feau o le faaolataga. E valaauina la Paulo i le galuega faa-Aposetolo, ua tele lava ina faasopolia lea itu o le lalolagi i le Tala Lelei.

Fai mai le vaega o le tusi lea sa faitauina tamaiti, sa iai Paulo ma nisi perofeta ma a'oa'o i le Ekalesia i Anetioka. O lona uiga, e ō atu nei tagata ua iai le Tala Lelei. O lona uiga la, o le valaauina e asiase, poo taoto lelei le Ekalesia i lona faavae, ae poo i ai foi se faafitauli e mana'omia ai se fesoasoani, ae maise ai le faaolaolaina o le fea'u o le faaolatagata a Iesu Keriso.

A sologa manuia se faatinoga, o le a faapena lava ona fa'aaogaina e le Alii le ola e fa'aaauu le galuega. O le ala lea o le fetalai ane o le Agaga Paia, ma toe tofia Paulo ma Panapa e fa'aaauua le galuega i isi nuu tuaoi. O le faailoga o le faamaoni o le tagata e faia le finagalo o Lē e ana le galuega. E le'i popole i tala ma taufaaleaga a tagata na fai ane; ao fita foi ma faigata i le lamatia ai o le soifua ma le ola, ua matuā faigofie mea uma ona o le suafa manumalo o Iesu Keriso, lea ua valaauina ai laua e le Agaga Paia, ina ia faailoa ma folafola atu i lea itu o le lalolagi.

Fai mai na anapopogi ma tatalo i latou uma na iai, ma faaee atu o latou lima, ina ia manuia le valaauina e fai ma ave feau o le Tala Lelei. O le mea ua mautinoa, o le valaauina mai le Agaga Paia, o le valaauina lava lea mai le Atua ina ia faailoa lona finagalo i le lalolagi. Fai mai le tala e ofoofogia le faatinoga a i laua ia, ina ua maua e Sekio Paulo, o le suikonesula o lea aai le faatuatua, ma ua matua talitonu i a'oa'oga a le Alii.

Ioe tamaiti, e faigofie mea uma pe a alu e fai se galuega, poo se feau; pe a fai ma le faamaoni ona o le manatu i lē na auina i tatou. E le taufesili, ma suesue i ni faafiatauli poo se tau'i foi; Ao le faalogo i le musumusuga a le Agaga Paia, tu i luga ma savali, o le a taunuu ai mea uma i le manuia.

GALUEGA FAATINO: Taliga Fesili

1. O le mataupu e fia na valaauina ai Paulo e tala'i le Tala Lelei o le faaolataga?

Tali: Mataupu e iva.

2. O le a le eseeseega o le valaauina o Paulo ma le toasefululua na fai ma so'o o Iesu?

Tali: O le sefululua na vaai tino ia Iesu o fetalai ma tusi aao ia i latou; Ao Paulo, o le malamalama na pupula ma segaia ai ona mata ma pogisa ai lana vaai.

3. O le malaga lona fia lea, ao ai foi na o ma Paulo?

Tali: O le malaga muamua na o ai ma Panapa.

4. O ai na valaauina i laua i le malaga lea?

Tali: O le Agaga Paia.

5. O ai na faamanuiaina i lea malaga?

Tali: O le Sekio Paulo, o le suikonesula o lea aai.

A'OA'OGA:

1. Ia fai i tatou ma ave feau o le Tala Lelei.

2. Ia tala'i le finagalo o Iesu, ae leo tatou loto.

.....

ASO SA: 17 SETEMA 2017

**MATAUPU: FAITAUINA I MISIONARE
(Missionary encounters)**

SINI: Ia a'oa'o le vasega ina ia malamalama; soo se tagata ua ofoina le soifua e tala'i le finagalo o le Atua, ua taua lena tagata o le misionare.

TUSI FAITAU: Galuega 16: 11 – 34

FESOASOANI MO FAIAOGA:

O lea lava ua faasolo ina salalau le Tala Lelei e ala i le fesoasoani a le Aposetolo o Paulo ma lona naunautaiga, ia tupu ma ola. O le ala lea o le lē nofo lelei o le Aposetolo, a ua fai lava ma asia Ekalesia ua talitonu i le faaolataga a Iesu, atoa ai ma nisi aai e lei oo iai le Tala Lelei, ina ia taunuu manuia le faamoemoe o lona valaauina.

O lana malaga lona tolu lea na o ai ma Sila; e asia Ekalesia na iai muamua, ma afea ai nisi o aai e lei oo iai le faaolataga. E ofoofogia foi ni galuega na faia e i laua i le malaga lea. E pei o le tinā ia Litia, ina ua matuā liliuina lona ola e faatuatua ma talitonu faamaoni i le Atua. Na o la tulia le aitu vavalo sa tigaina ai se tasi o tamaitai, ae maua ai le tamaoaiiga o isi tagata. Na molia e nei tagata faapaupau Paulo ma Sila i le faamasinoga, ma tuuina ai loa i laua i le fale puipui.

O se vaaiga mata'utia tamaiti na iloa e le leoleo o le fale puipui, ina ua matalatala faitoto'a ma filifili na saisai ai pagota o le fale puipui, ao lea e iā te ia ki uma e mafai ai ona tatala mea uma.

Fai mai tamaiti na liliu ane lenei leoleo o le a pule o ia i lona ola; Peita'i ane, o si laolao lea na maua ai le avanoa o Paulo ma Sila e momoli atu ai le fe'au o le faaolataga mo lea tagata. E tulaga tutusa le mea na oo i lea leoleo o le fale puipui ma le tinā o Litia; aua faia mai ua ia ave foi ia i laua i lona fale. Ua faalogo foi lona aiga uma ma i latou sa iai, ma ua avea ai i latou ma tagata faatuatua i le Atua. Ua ia faia foi le galuega lelei i o laua manu'a, ma ua latou talisua faatasi ma i lea aso.

Tamaiti, ua mafai ona faitauina Litia ma le leoleo o le fale puipui o misionare o le Tala Lelei; Aua ua le gata iai laua le ola faatuatua i le Atua, a ua la faailoa atu i o laua aiga, ua oo mai le faaolataga a Iesu Keriso e ola ai i latou uma. Ioe, e mafai foi ona faitauina i tatou o misionare, peafai tatou te fesoasoani atu i nisi o iai pea i le pogisa, e pei foi ona faia e Paulo ma Sila, ua maua ai isi misionare o le Tala Lelei. O le mea moni, ua leai se isi ua le iloa le Tala Lelei, ae o loo toatele pea le au faatalalē ma le lē kea; Ao se avanoa lea mo i tatou e avatu ai se fesoasoani, ma faamanatu le alofa le mavae o le Atua, e ala i le faaolataga na Ia faia mo le lalolagi agasala.

Uiga o Upu ma Fuaitau:

- i) pulunaunauina - o le naunautaiga o le loto i se mea lelei ua ia matuā mana’o iai.
- ii) manunu - ua matala loka o lima ae lei pa’u’u ese.

GALUEGA FAATINO: Taliga Fesili

Tali i Fesili o loo mulimuli mai.

- 1. O le malaga lona fia lea a’o ai foi o loo ō ma Paulo?
Tali: Malaga lona tolu na ō ao Paulo ma Sila.
- 2. O ai aiga na faamanuiaina i lea malaga?
Tali: O Litia ma lona aiga, ma le leoleo o le fale puipui ma lona aiga.
- 3. Aisea na fale puipui ai Paulo ma Sila?
Tali: O le molimau pepelo a tagata, ina ua lē toe mau lo latou tamaoaiga, ona o le tala’iga a Paulo ma Sila i le faaolataga.
- 4. Ao le a se meana tupu i le leoleo o le fale puipui?
Tali: Na tau pule o ia i lona ola.

A’OA’OGA:

- 1. Ia fai i tatou ma misionare o le Tala Lelei.
 - 2. O Iesu o le misionare na afio mai ma le finagalo o le Atua.
-

ASO SA: 24 SETEMA 2017.

MATAUPU: MISIONARE FAALAUILOA (Missionary model)

SINI:

Ia a'oa'o le vasega ina ia malamalama, e mafai e tagata uma ona faapei o misionare, pe a le fefe e tautala e faailoa le finagalo o le Atua, e ala ia Iesu Keriso.

TUSI FAITAU:

Galuega 26: 19- 32

E lei fefe Paulo e tautala atu i le tupu o Akeripa, e tusa ma le faaaliga mai le lagi na ia iloa. O le fa'aaliga na suia ai lona tagata tuai e avea ma tagata fou. Ua faafouina le malosi o le tino, le mafaufau, a ua sili le malosi o le Agaga; Ma ua matua augofie lava e folafola ma tala'i atu lea feau e tusa o lona valaauina. Ao ia faamatalatala mea uma na tutupu e tusa o lea valaauina, ae faapea ane Feso le alii sili; "Paulo e, ua e valea; o le tele o lou sue i tusi ua avea ai oe ma vale"

Tamaiti, e lē faigofie le taumafai o se tagata e tu mo ia lava; na o lē e tumau i le faatuatua ma talitonu i le faaolataga a Iesu Keriso e mafai ai ona ia lavatia nei faafitauli, tusa lava pe oti ai.

Fai mai Paulo ia Feso; "ou te le valea, a ou te tautala atu i upu moni ma le faatuatua. Aua o loo silafia e le tupu nei mea ou te tautala faamalosi atu nei iai, aua ua ou iloa lelei ua lē lilo se tasi mea o ia mea ia te ia, aua na lē faia faalilolilo lenei mea" E le o lilo i le tupu o Akeripa nei mea uma o loo tautala mai ai Paulo, aua sa ia faalogo ai i le au-Perofeta. Peita'i ane, o le mea lava lea ua liliuina ai Paulo; O le ala lea o le fesili ane o le tupu e tusa ma le faamatalaga, ma le lagona o Paulo iai latou uma sa iai i lea aso. O le manatu o le tupu e tusa ma le liliuina o Paulo; pe o le a liliuina foi o ia ma Kerisiano faapei ona faia ia Paulo. Peita'i, o le manatu o Paulo, e le o le vave poo le umi, ao le taliaina e le tagata o le Tala Lelei o le faaolataga, ia le gata i le tupu, a ia faapena ia i latou uma o loo iai i lea aso faapei ona faia e le Alii ia te ia, ae tuu pea o nei noanoaga.

Tamaiti, o le mana'o o Paulo ia ave i le Kaisara lona faamasinoga e fai mai ai se faaiuga talafeagai mo ia, na lē mafai ai ona tuuina atu o ia e Akeripa mai latou sa iai e alu. Ao le mea ua mautinoa, ua iloa e i latou upu moni ma le tonu na tautala ai o ia ma ua leai se mea e sala ai o ia i nei moliaga. Ioe tamaiti, e le i fefe Paulo e tautala atu ma le tonu e

faailoa atu le Tala Lelei. O le uiga lena o le tatou manatu autu. Ua aumai e Paulo le ata o le tagata e avea ma misionare. Ia faailoa le finagalo o le Atua ma le amiotonu. Aua nei avea faafitauli e fefe ai le tautala, ma fe'alo'alofa'i ai lagona; Ao le e tumau ia te ia e faavavau, o le misionare moni lena, ma e le tuulafoa'iina e le Atua i taimi ma aso uma o le ola, seia oo ina nofo tupu ma ia i lona malo e faavavau.

GALUEGA FAATINO: TALIGA FESILI:

1. O ai Paulo?

Tali:- O lē na valaauina e le Atua i le ala agai atu i Tamaseko e tala'i lona finagalo.

O le misionare o le Tala Lelei ia Iesu Keriso.

O le Aposetolo a Iesu Keriso e tala'i lana faaolataga i le lalolagi.

2. Aisea ua naunau ai nei tagata ina ia molia Paulo e tusa lana talaiga?

Tali: E le tusa ai ma talitonuga ma le tapuaiga ua masani ai tagata Roma.

3. Aisea na le tuua ai e Akeripa Paulo e alu ina ua iloa o le tagata sa'o o ia?

Tali: Ona ua uma ona valaau Paulo i le Kaisara e tusa ma lona faamasinoga.

A'OA'OGA:

1. Ia tatou faailoa atu le finagalo moni o Iesu Keriso.

2. O tatou o misionare faalauiloa o le Tala Lelei, pea tumau i le faatuatua.

.....

ASO SA: 1 OKETOPA 2017

**MATAUPU: FAATUMAUINA O MAFUTAGA
MAFANAFANA(Fostering friendship)**

SINI: Ia a’oa’oina le vasega ia malamalama i auala e faatumauina ai mafutaga mafanafana e tusa o le finagalo o le Atua.

TUSI FAITAU: Faataoto 17: 9-17

FESOASOANI MO FAIAOGA:

E tele lava auala e faatumauina ai le mafanafana o mafutaga/faigauo i nei aso. O le tala sa faitauina, o se vaega o apoapoaiga a le Poto o Solomona ua tu’uina mai e faufau ai le ola o le tagata ina ia maua mafutaga mafanafana ma isi.

O le natura lava o mea nei o faigauo/mafutaga ma isi, e lē sologa lelei pea i taimi uma. O le uiga o manatu, e i ai lava ituaso e feeseeseai ai manatu ma lagona ona le toe maua lea o le mafanafana ma le masaniga e pei ona masani ai. Peita’i, o ituaso ia e iloa ai le uo e alofa moni i le mafutaga. O le ituaiga uo lea e fai mai ai Solomona na te ufiufi le soliga o le tulafono (f.9). O le upu ufiufi i lona faaperetania, o le ‘forgives’, o lona uiga o le uo na te faamagalo se mea ua faaletonu i le mafutaga. O le faamagalo, e le na ona faagalo, ae faamagalo e ala i le talatalanoa ma saili se fofo o le faaletonu. E le faapea foi ua faamagalo po ua ufiufi le soliga o le tulafono ona o le manatu e maua ai sana mea aoga. Leai, ao le agaga maualuga, ia foia le faafitauli ma ia faatumauina le mafanafana o le mafutaga o loo i ai. Ao le uo e manatua pea mea sese i lona loto, ma taumafai lava e faamanatu le mea sese i se auala e tupu ai le misa, o le tagata lena ua ia faateaeeseina ana uo. A tuu mai i nei aso, e leai lava se tagata e fia uo i se tagata e lē loto faamagalo. Ae tatou te moomia ni uo e alolofa ia i tatou. O a ni faaletonu ma faafitauli e oo i ai, e talatalanoa ma faasoa i se auala e toe fa’aleleia ai. O le uo lena lea e fai mai Solomona, e pei o le uso. O le uso e feeseeseai i manatu ma lagona, ae le mafai lava ona aveesea le alofa i le mafutaga.

O loo apoapoa'i mai foi Solomona, afai e tutupu ni faafitauli ma foliga ai o le malepelepe ni mafutaga sa mafanafana, o le fautuaga **ia maua pea le filemu.** Aua le taumafai e faafetaia'i le ita i le ita aua o le faatupumisa e pei o le vai ua maua le avanoa e sao ese ai. O le taimi lava e maua ai e le suavai se avanoa e alu ese ai mai se nofoaga o loo faamaopoopo ai, o le upu moni e le mafai ona toe taofi. O le uiga lea o ana upu, ia taofi le misa nei le mafai ona toe togafiti pe a tupu.

Fai mai Solomona, o le tagata faatupu misa, tagata fouvale, tagata e tete'e i le aoaiga, tagata e tauamiotonuina le ua amio leaga, tagata na te tauitu le lelei i le leaga ma isi lava uiga mataga, o le tagata valea. O le upu valea, o loo faamatalaina i Tususiga a le Poto (Wisdom Literature), o le tagata ua manatu ifo e leai se Atua. A leai se Atua, o lona uiga e leai ma se mea lelei e mafai ona ia faia. Afai e i ai ni tagata faapea i ni mafutaga, o lona uiga, e le faia lava e i latou ni uiga e maua ai ni mafutaga mafanafana.

Tamaiti, fai mai le manatu o le Aso Sa lenei, **FAATUMAUINA O MAFUTAGA MAFANAFANA.**

E fa (4) ni auala o loo a'oa'o mai ai le tala o lenei aso e mafai ona faatumauiina ai le mafanafana o mafutaga ua faia.

1. Ia maua le loto faamagalolo. O lona uiga, ia tatou fealolofaa'i.
2. Ia tausii le filemu.
3. A tutupu faafitauli i le va o faigauo ma mafutaga, ia maua pea le onosa'i ma le faapalepale.
4. Ia e faauo i le tagata e talitonu ma faatuatua i le Atua.

GALUEGA FAATINO:

Ia faafesoai le vasega i nisi o auala e mafai ai ona faatumauiina faigauo ma mafutaga ua latou faia.

PESE: *A i ai Iesu i se aiga, o se aiga....*

A’OA’OGA:

1. Ia maua le loto faamagalō.
 2. Ia tausi le filemu. Aua le taumafai e faafetaia’i le tagata ua ita.
 3. Ia mafuta i tagata amiolelei.
-

ASO SA: 8 OKETOPA 2017

MATAUPU: UO MA AIGA (Friends and family)

SINI: Ia a’oa’oina le vasega ina ia iloa ma malamalama i le finagalo o le Atua e faatumauina ai le mafanafana o mafutaga faaleuo ma mafutaga i totonu o le aiga.

TUSI FAITAU: Faataoto 18:24-19:7

FESOASOANI MO FAIAOGA:

O loo tatou i ai pea i faitauga eseese o faataoto a le Poto o Solomona. E pei ona taua i le vaiaso na sei mavae atu, o nisi ia o apoapoaiga a Solomona mo lona nuu. Peita’i, e taua foi mo i tatou o tagata faitau. Afai e fai se feso’otaiga o le mataupu o le aso lenei ma le tusi faitau, e mafai ona tatou vaavaai i le ituaiga mafutaga faaleuo ma le ituaiga mafutaga faaleaiga e pei ona tau mai e Solomona. O le uiga o manatu, e peiseai, o le tagata e tele lona tamaoaiga, o le tagata lea e sili ona alofagia e lona aiga ma ana uo. Ao le tagata e mativa, o le tagata lea e tuulafoaina, e inoino i ai tagata. *f.6.....e uo tagata uma lava ma le tagata foa’i mea. f.7. O uso uma o le tagata mativa, latou te inoino ia te ia, a o ana uo, latou te faamamao ma ia, na te tuliloa ia te i latou i upu, a e le maua i latou.* O loo talanoa Solomona i le taaviliga masani poo mea o loo tutupu i le olaga o aso uma. A tuu mai ia i tatou, tamaiti,

e sa’o lelei a le mea lea e talanoa ai Solomona. O le mea mautinoa, e leai lava se isi e fiauo i se tagata mativa. Tatou te fiauo uma lava i le tagata e tele lona tamaoaiga ona e maua ai le faamalieina o mea tatou te loto i ai. O le mea lea e tupu, a tele lou tamaoaiga, ua tele foi au uo ma fiafia lou aiga ia te oe. Ae afai e te mativa, e leai ni au uo, e inosia foi oe e lou aiga.

Peita’i, o le aano moni o le a’oa’oga a Solomona, e le tatau ona tatou faia ni mafutaga e faavae i ia uiga leaga. O le uiga o le tala, e le tatau ona fuatia le mafanafana o ni mafutaga faaleaiga pe faaleuo i le tamaoaiga ma mea tatou te maua. Tamaiti, o le finagalo o le Atua e pei ona a’oa’o mai Solomona, ia tutusa tagata uma i le tatou vaai. O lona uiga, aua tatou te faailoga tagata ma faapea ifo: “O ia lea ua mativa, ou te ita i ai. E leai sau mea e maua mai ai. Ao le tama lea e tele ana tupe e tatau ona ou faauo i ai.” Leai, o le finagalo lava o le Atua ia tatou mafuta i soo se tagata. O le mea o loo fiafaamamafa i le tatou mataupu.

O mafutaga mafanafana e faavae i le alofa moni. O le ki lea e maua ai mafutaga lelei ma mafanafana, o le alofa. Afai e aunoa i tatou ma le alofa, o le upu moni, ua tatou le faia le finagalo o le Atua. O le tagata ua leai se alofa i lona loto, o le tagata amio mataga lea i luma o le Atua. O faatinoga uma e faia, e le lelei. E ola faailoga tagata, e molimau pepelo, e ola faafoliga. Na o le tagata e mauoa e faauo i ai. Ae a vaai atu loa ua mativa, ona te’i a lea ua aloalo ese. Ao le tagata e alofa moni i lana uo ma alofa moni i lona aiga, o le tagata lena e tutusa lava taimi uma ia te ia. Taimi o le mativa, taimi o le maua o le tamaoaiga, e le suia lava lona alofa i le mafutaga ua faia. O le faamamafa o le aso lenei, o mafutaga i totonu o aiga, o mafutaga faaleuo, ma soo se ituaiga mafutaga, ia faavae mea uma i le ALOFA. Aua i le vaavaai i se taui poo se faasiliga e maua ai. Aua i le tamaoaiga, ae ia fa’amua le alofa.

Tamaiti, o se tasi lenei o faafitauli o aso nei. O tele lava o mafutaga ua faavae i le tupe ae le o le Alofa. O le mafuaaga foi lea o le tele o mafutaga ua malepelepe gofie, ona o le sese o le faavae. A faavae mea uma tatou te faia i le ALOFA, o lona uiga ua tatou faia lava ia mea mo le viiga o le Atua.

**GALUEGA FAATINO: FINAUGA (DEBATE)
O LE ALOFA O LE FAAVAE LEA O MAFUTAGA
MAFANAFANA.**

Ia vaevae le vasega i vaega e lua. O le itu tete'e ma le itu latou te ioe e sa'o lea fuaitau ma ia fa'aailoa mafuaaga e tete'e ai ma mafuaaga e talia ai le manatu autu. (*Ia tapena lau Susuga i le Faiaoga mo ni fesili aemaise o ni mataupu e laga mai i le finauga a le fanau*)

PESE: *Le Alofa o se mea e te faasoa atu....*

A'OA'OGA:

1. Aua le faailoga tagata.
2. Ia faavae i le alofa moni mafutaga faaleuo ma mafutaga i totonu o aiga.
3. O le alofa Atua na ia auina mai ai Iesu e maliu mo i tatou.

.....

ASO SA: **15 OKETOPA 2017**

MATAUPU: **O LE AUGANI A LE AFAFINE O KALEPO
(Caleb's daughter makes a claim)**

SINI: Ia a'oa'oina le vasega ina ia malamalama, i le mafuaaga o le manao o Akesa i vaipuna.

TUSI FAITAU: Faamasino 1:9 – 15

FESOASOANI MO FAIAOGA:

O le tala sa faatauina o le tala i le ofoina atu o Akesa le afafine o Kalepo e fai ma ava a se toa poo se tagata malosi o Iuta e mafai ona ia aea/fasiotia le aai o Kiriata-sapera poo Tiperi. Fai mai le tala, o Otinielu na ia fasia le aai o Tiperi. Ona ave lea i ai e Kalepo lona afafine e fai ma ona toalua e pei ona ia folafola i le amataga. Peita'i, na toe foi ane Akesa ma augani i lona tamā mo nisi meaalofa mo ia ma lona toalua e pei ona taua i le fuaiupu e 15: *Ona fai atu lea o ia ia te ia, Ia e alofa mai ia te au; aua na e avane ia te au le fanua i le itu i toga; ia e foa'i mai foi ma ni vaipuna. Ona avatu ai lea e Kalepo ia te ia o vaipuna o i luga atoa ma vaipuna o i lalo.*

O nisi nei o a'oa'oga o loo mafai ona tatou maua mai lenei tala.

- (1) *O le faamaoni o Kalepo i ana folafolaga ua fai.* O nei aso, ua toatele tagata latou te fai folafolaga ina ia faamalie le mana'o o loo i ai i le taimi lena, ae mulimuli ane ua toe sui foi le tala ma foliga ai ua taufaasese upu na folafola muamua. Peita'i, o le itu taua lea i le tatou faitau. Na taunuu lava folafolaga a Kalepo na faia i le amataga. O loo fesiligia e nisi o le au faitau pe aisea ua faapea ai upu a Kalepo. I lo latou manatu, ua fa'aaoga e Kalepo lona afafine e maua ai lona tauleleia aemaise o le manumalo mo Iuta. Peita'i, o loo mafuli lava le finau a le au suesue o le Tusi Paia, i lo latou faapea mai: o le faiga lea ua faia e Kalepo, o se faiga ina ia fa'aaui ai pea lona gafa i tagata tautaua o le nuu. E le gata i lea, o lea foi ua faalautele ai ma lana pule, ina ua ofoina atu le fanua i lona afafine faatasi ai ma Otinielu.
- (2) *O le lototele o Akesa e faataunuu folafolaga a lona tama ua faia i luma o le nuu.* O le tasi lea mea taua i le faitau. O nei aso, ua tele foi ina tutupu mea faapea, o le fai e matua o le folafolaga ae le taunuu, ona ua te'ena e fanau. Peita'i, o lea lava na talia e Akesa le folafolaga a lona tamā i lona loto fiafia. E le taumate foi ni lagona ootia o Akesa, ona o le mafutaga ua motusia ona o ia folafolaga, peita'i, e leai ma se upu, ae ua talia ma le fiafia.

- (3). *O le mana’o o Akesa i vaipuna, o se mana’o e fa’aleleia ai le fanua ma faaolaina ai lona aiga ma nisi.* I le lomiga faaperetania o loo faaliliuina ai le manao o Akesa e faapea: *She said to him, “Give me a present; since you have set me in the land of the Negeb (fanua i le itu i toga), give me also Gulloth-mayim (vaipuna).” So Caleb gave her Upper Gulloth (vaipuna o i luga) and Lower Gulloth (vaipuna i lalo) - (v.15: NRSV- Bible version).* O le Negeb (Negev) i lona faaliliuina - o le eleele matutu (dry land, desert). O le Gulloth-mayim, o loo faaliliuina o le living water – po le vaipuna e pei ona taua. Afai tatou te fua faalemafau, o le mafuaaga lea o le mana’o o Akesa i ni vaipuna, ina ia faasusu le eleele o le fanua ua tuuina atu e lona tamā ia te ia. O le uiga lea o manatu, o le mana’o o Akesa o se mana’o ua talafeagai ma onomea. Auā e leai se aoga e maua ai le fanua e pei ona ofoina atu e lona tamā, ae le ola ai ni laau toto po o ni lafu manu ona o le leai o se suavai. Afai foi e tupu lona aiga ma toatele, e moomia lava le suavai. O le mana’o la o Akesa, e le’i faia ona o se mana’o tele, e pei ona finauina e nisi o tagata, ae o se mana’o ua faia mo le taimi ma le manuia o lona aiga i le lumana’i.

Tamaiti, o lenei vaitau, e tupu lava le mana’o i taimi uma. Peita’i, ua a’oa’o mai lenei mataupu, ina ia nanau i le mea e lelei ma le mana’o e maua ai le tauleleia ae lē o le mana’o tele ona o le fiafiao i tagata. O nisi o tagata e naunau e faaoo le leaga i nisi. Peita’i, e lē fiafia le Atua i le tamaitiiti e faapena le mana’o o ona loto. Aua tatou te mafaufau e fai se leaga i le isi, ae ia tatou mafaufau e fai se mea lelei e viia ai le Atua. E sili ona taua lou augani i se mea e maua ai se fiafia ma faaolaina ai nisi o loo fia maua le fesoasoani.

GALUEGA FAATINO: FESILI MA TALI

1. Tusi mai igoa o nuu nei sa iloa muamua ai.
Tali: a. Heperona (*Hiriata-arapa*)
e. Tiperi (*Kiriata-sapera*)

2. O ai na ia aea le aai o Tiperi?

Tali: (Otinielu)

3. Faatumu mai avanoa nei:

O Otinielu, o le atalii o Kinasa, o le uso itiiti lea o Kalepo; le tama o Akesa. (*Faamolemole ia fa'aavanoa igoa o loo vase atu i le fuaiupu mo le fanau e tali mai ai*)

4. E tatau le manao o Akesa pe leai? (Ioe pe leai) Aisea?

PESE: *Lou Atua e, ia e fafaga ia te au.....*

A'OA'OGA:

1. Ia faamaoni ia tatou tautinoga ua faia i luma o le Atua.
2. Ia maua le lototele e faataunuu ai folafolaga ua faia.
3. Tatalo i le Atua e fafaga mai lo tatou ola faaleagaga.
4. Ia naunau e fai se mea lelei ae le o se mea e leaga ai le isi uso a tagata.

.....

ASO SA: **22 OKETOPA 2017**

MATAUPU: **O LE OTI O APIMELEKO (Death of Abimelech)**

SINI: Ia a'oa'oina le fanau ina ia malamalama, i le mafuaaga o le oti o Apimeleko.

TUSI FAITAU: Faamasino 9:22-29, 50-56.

FESOASOANI MO FAIAOGA:

O le tulai mai o Apimeleko e fai ma taitai i tagata o Sekema, o se faanoanoaga tele lea i le tala fa'aauau o le taitaiga lelei na faia e lona tamā o Kitiona poo Ierupaala (o le igoa lea na faaigoa ai Kitiona ina ua ia faaumatia tapuaiga ia Paala). E pei ona faitauina, na faasufi e Apimeleko tagata o Sekema e fasioti i lona aiga ma ona uso ina ia avea o ia e fai ma tupu. Peita'i, o ia faiga amioletonu na silafia uma e le Atua. Ua alu aso ua sau aso, ua faatuputeleina faiga faapaupau ma faiga inosia a Apimeleko i luma o le Atua. O le faitauga o lenei aso, o loo manino ai le toatamai o le Atua ia Apimeleko po o le tau'i o lana amioleaga sa fai.

f 23: "ona tuuina atu ai lea e le Atua o le loto leaga (evil spirit) ia Apimekelo ma tagata o Sekema ona faaoleole ai lea o tagata o Sekema ia Apimeleko." Ua faatupu, e le Atua le faitagai i loto o tagata o Sekema ma le loto o Apimeleko. O le mea ua tupu, ua ola fetaulamalamaa'i i latou i se auala e fasioti ai e le isi le isi. Peitai, o le taua ma Tipesa na oti ai Apimeleko. O le maaolo o loo taua, i se isi ona faaupuga, o le maa mamafa lea na lafo ifo e le tasi fafine ma aafia ai le ulu o Apimeleko. O le fuaiupu e 54, o loo augani ai Apimeleko i lana auauna e tutui ia te ia i le pelu. Afai e fesili pe aisea. O le tali, o le vaai faa-Iutaia, o se faalumaina tele lea o soo se taitai poo se tagata taualoa, o le fasioti e se fafine poo se tagata o nuu ese. (mafaufau i le tala ia Saulo ma lona oti - 1 Samuelu 31: 4). O le mafuaaga lea o le augani ane o Apimeleko i lona soātau e tutui ia te ia i lana pelu, ona o le maasiasi i le tala ave o ia na fasioti e le fafine.

O le tala o loo manino ai nisi o a'oa'oga taua mo i tatou.

1) Aua le tausili i le mea e le oo i ai le malosi. O le manao tele o Apimeleko e avea o ia ma tupu i tagata o Sekema, na mafua ai ona ia fasioti i tagata o lona aiga ma ona uso.

(2) E silafia e le Atua mea uma tatou te faia. E pei ona tatou faitauina, o mea uma lava na faia e Apimeleko ma tagata o Sekema na silafia uma e le Atua.

(3) *E le fiafia le Atua i ni faiga piopio ma le amioletonu tatou te faia.*

(4) *E tatau le ta i le tua o le vale. O le tasi lea o fuaitau o loo taua i le tusi o Faataoto. O le upu vale, o loo faaliliuina o le tagata ua le iloa le Atua. O le faasalaga ua oo ia Apimeleko, o le tau i lea o lana agasala na ia faia i lona aiga ma ona uso.*

Tamaiti, o le ta ma le sasa a le Atua, o se a’oaiga alofa lea mo le ua agasala ma tagata uma. O le upu moni, e tuuavanoa le Atua i le tagata, ae afai lava tatou te le lagona le salamō ma saili atu ia te ia mo se faamagaloga o agasala ma mea sese tatou te faia, o le iuga lava lea, o le faalumaina ma le malaia e faavavau.

GALUEGA FA’ATINO:

1. O LE OTI O LE TAUI LEA O LE AGASALA. O le tasi lea o fuaitau e masani ona tatou faalogo i ai. Ae ia fesiligia le vasega po o le a so latou iloa i lea fuaitau faatusatusa i mea ua tutupu i le soifuaga.

PESE: *Pese ma Viiga 222 f.1& f.2*

A’OA’OGA:

1. Aua le manao tele.
2. Ia tatou faaeteete i la tatou amio, aua o loo sisila fofoga o le Atua.
3. E tatau le ta i le tua o le vale.
4. E le fiafia le Atua i ni faiga piopio ma le amioletonu tatou te faia.

.....

ASO SA: 29 OKETOPA 2017

**MATAUPU: SA NATIA AE UA FA’AALIA
(Hidden and revealed)**

SINI: Ia a’oa’oina le fanau ina ia malamalama i le alofa o le Atua ia Isaraelu sa natia ae ua fa’aalia.

TUSI FAITAU: Isaia 45: 1 – 15

FESOASOANI MO FAIAOGA:

O le tala sa faatauina o le tala i le valaauina e le Atua o Kuresa le tupu e fa’aae/faafoi le tafeaga a lona nuu o Isaraelu. O loo fa’aaogaina le upu faauuina e faamatala ai le valaauina o Kuresa. O le upu faauuina sa iloga lona fa’aaogaina i le valaauina o le tupu o Saulo ma le tupu o Tavita. E ui o loo i ai pea le finauga e faapea o Kuresa e le talitonu atoatoa i le Atua, peita’i, ua filifilia lava e le Atua mo lana galuega. O le i ai foi o le faauuga a le Atua, o le faailoga lea o faamanuiaga a le Atua ua ia Kuresa mo le faatinoina o lana galuega. E lua ia galuega ua finagalo le Atua ia Kuresa e fai; (1) ia faasoina Isaraelu mai le nofo pologa i pulega a nuu tuaoi, (2) ia faaoo le malaia/faaumatia nuu ia na latou faapologa Isaraelu. O loo taua i le fuaiupu e 4 le igoa Iakopo, lea na suia ia Isaraelu e pei ona i ai nei. O le toe taua o Iakopo i le fetalaiga a le Alii, o se faamanatu taua foi lea i tagata o Isaraelu lo latou valaauina e fai ma nuu filifilia o le Atua. E le gata i lea ae ua toe faamanatu ai foi ma le feagaiga na osi i le amataga: O AU O LO OUTOU ATUA, O OUTOU O LO’U NUU. Pe afai e faitau ma tulimatai le iuga o le tala tamaiti, na taunuu lava le poloaiga a le Atua ia Kuresa, aua na ia toe faafoi lona nuu i ona elelele ma ona laufanua. O le mataupu o le aso leni, o loo faasino lea i le alofa o le Atua ia Isaraelu sa natia ae ua fa’aalia e ala i le faafoi o le tafeaga. I le talitonuga o nisi o tagata Isaraelu, o le i ai i le tafeaga, o le faailoga lea ua natia po ua le alofa le Atua ia i latou. Peita’i, o le faaaitauli lea sa feagai ma tagata o Isaraelu. Latou te le’i iloa ma malamalama, o le alofa o le Atua, na

mafua ai ona faatafea i nuu tuaoi. O le finagalo o le Atua, ia avea le puleesea ma ala e aoa'iina ai le mafaufau o le tagata ola faafoliga i ona luma. A oo mai aso o le lelei, ua galo le Atua, ae ina ua feagai ma mafatiaga i le tafeaga, o taimi sili ia ona latalata ma moomia ai le fesoasoani o le Atua. Lea na ua fa'aalia lona alofa. Taimi o le tafeaga, sa i ai lava le Atua e faamalosi e ala i le galuega faaperofeta sa faia. O lea foi la ua manino i lenei aso, ua faauuina Kuresa e faaea le pologa o lona nuu.

Tamaiti, e le mafai ona alo le alofa o le Atua ia i tatou. O taimi o faigata, o taimi o le sologa lelei, e alofa pea le Atua ia i tatou. O le faalateleina o le tatou mataupu, o le toe to manatu lea i le alofa o le Atua, na ia natia ai lona mataga ma le inosia ae ua ia fa'aali i le lalolagi ma i tatou uma lona alofa e ala i lona maliu ma lona toe soifua mai i le oti ma le tuugamau.

GALUEGA FAATINO:

1. O le tasi o mataupu silisili o loo mapuepue i le taimi o le tafeaga, o le manatu e faapea: "O taimi o le tiga ma taimi o le lelei, e i ai pea le Atua i le tagata". Ia fesiligia le fanau poo ai e talitonu i lea fuaitau poo ai foi e lē talitonu, e fua i mea o loo tutupu aemaise lava o le motusia o mafutaga ma e e pele i le loto ona o le oti.

PESE: Le alofa o le Atua e ofoofogia.....

A'OA'OGA:

1. E le tuulafoina e le Atua lana tagata sa fai.
2. E faamaoni le Atua i ana folafolaga.
3. Ia tatou tatalo i le Atua e faailoa mai auala o lona a'oa'o mai ia i tatou.

.....

ASO SA: 5 NOVEMA 2016

**MATAUPU: O LENEI ALOFA TUNOA UA TATOU OLA
AI (This Grace in which we stand)**

SINI: Ia a’oa’oina le fanau ina ia malamalama i le Alofa Tunoa o le Atua e ala ia Iesu Keriso, ua faaolaina ai i tatou.

TUSI FAITAU: Roma 5:1 – 11

FESOASOANI MO FAIAOGA:

O le tusi i le Ekalesia i Roma na tusia i le vaiata o le A.D. 56-57, ao i ai le Aposetolo i lana malaga taamilo lona tolu. Ina ua taunuu le Aposetolo o Paulo i Korinito, na ia tusia ai loa le tusi lenei e ave i le au-Faatuatua oi Roma. O le faamoemoe maualuga lava o le Aposetolo ina ia tau atu i le au-Faatuatua oi Roma, e le mafai ona faaolaina se tasi i galuega o le tino. Ae o galuega o le faatuatua e mafai ai ona tauamiotonuia ai le tagata i luma o le Atua. O le Tala Lelei lea o loo tau faapupula atili atu e le Aposetolo i tagata Kerisiano o loo nonofo i totonu o Roma. O le Tala Lelei i le malosi ma le Silisili ese o le Atua ua faaalua i lana faaolataga mo tagata faatuatua uma.

Fuaiupu 1-2. **O le filemu:** I le manatu o le Aposetolo, o le ola agasala, ose mea lea ua fai ma faatupu vevesi i le va o le tagata ma le Atua. O le uiga o le manatu, e mafua ona leaga le va o le tagata ma le Atua, ona o le ola agasala o le tagata. Peita’i, a lagonaina e le tagata lona faatauavaa, ma faamaualalo lona loto i le Atua, ma tautino i le Atua lona ola agasala, atoa ai ma le faatuatua i le Alii o Iesu Keriso, e mafai lava ona tauamiotonuina ai o ia, ma faatupuina ai pea le filemu i o latou agaga.

Fuaiupu 3-8. **O puapuga e tupu mai ai le onosa’i male mautinoa:** E le ose mea faaleaoga i le manatu o le Aposetolo lo tatou fetaiiai ma puapuga o le ola. O le mautinoa, e maua mai tofotofoga, pe afai tatou te taumafai atili e saili se mea ae ua tatou le maua, ona tatou toe to manatu lea i le Alofa Tunoa o le Atua, e tupu ai lo tatou faatuatua ma tatou faamoemoe tasi atu lea ia te Ia mo lana fesoasoani. A leai ni puapuga, e le mafai e le tagata ona faatuatua. Ae a leai se faatuatua, o

le a le mafai ona iloa moni o tatou o tagata Kerisiano, e tusa ma le finagalo o le Atua.

Fuaiupu 9-11. Ta'uamiotonuina i le toto o Iesu Keriso: “a le o i ai foi se faamalagiina o le toto, ua leai foi se faamagaloina.” (**Eperu 9:22**). “aua o le toto, o le mea lava lea e fai a’i le togiola mo le tagata.” (**Levi. 17:11**)

O le faamalagiina la o le toto o Keriso, ua mafai ona tauamiotonuina ai le tagata. Faaopopo i lea, ae ua mafai ai foi ona toe faaleleia le va o le tagata ma le Atua. O le maliu ma le toetu o Iesu Keriso, ua aveeseina ai le toasa o le Atua na i ai tatou, ma ua faatumauina ai le so’otaga i le va o le tagata ma le Atua. E le ona o le amiotonu la o le tagata, ae ona o le Alofa Tunoa o le Atua na ala mai i lona Alo o Iesu Keriso.

Uiga o Upu ma Fuaitau:

- i) ta'uamiotonuina - faatuatuaina, faamoemoeina, talitonu
- ii) Alofa Tunoa - o le alofa o le Atua na ala mai ia Iesu Keriso
- iii) faalematau - tagata agasala, le ava i le Atua, le mafaufau.

GALUEGA FAATINO:

Faatumu avanoa i upu o loo i lalo:-
tauamiotonuina, Keriso, toto, agasala, leleiga, tagata, Aposetolo, Roma, Atua, Alofa Tunoa.

O le tusi a le 1. _____ i le au- Kerisiano oi 2. _____, o lo’o faamamafa atu ai le 3. _____ 4. _____ o le 5. _____, na ala mai ia Iesu 6. _____. O le na faia le 7. _____ i le va o le 8. _____ ma le Atua, e ala i lona 9. _____ na faamalagiina ina ia 10. _____ le tagata ua salamo.

Tali mo fesili:

1. Aposetolo, 2. Roma 3.alofa 4. tunoa
- 5.Atua, 6.Keriso7. leleiga 8. tagata
- 9.toto10.ta'uamiotonuina.

PESE: 360 (Pese ma Viiga).

A'OA'OGA:

1. Faatuatua ma talitonu i le alofa o le Atua ua tatou ola ai.
 2. Faafetai i le Atua i lona Alofa Tunoa ua tauamiotonuina ai i tatou
-

ASO SA: 12 NOVEMA 2017.

MATAUPU: IA FAAOLAINA I ASO UMA
(Saved again and again every new day)

SINI: Ia a'oa'oina le fanau ina ia latou iloa ona fa'aali ma tautau atu i aso uma, o i latou o tagata ua uma ona faaolaina e Iesu Keriso.

TUSI FAITAU: Roma 10:4 – 13

FESOASOANI MO FAIAOGA:

E le i faigofie le galuega a Paulo i le tau faamalamalamaina o le mataupu leni e uiga i le faatuatua, i le au Kerisiano i Roma. Aua foi ua manatu lava le tagata ia o ia ua amiotonu ma ua tauleleia i luma o le Atua. Ua avea foi lo latou naunau, ua fai ma ala ua latou soona folafola ai le Tala Lelei, ma ua see ese ai ma lona uiga moni e pei ona tau faailoa e le Aposetolo.

Ua manatu nisi, o le mea sili ona taua i le olaga faa- Kerisiano, o le mulimuli atu i ai latou o talaiina lea Tala Lelei, ae o le olaga o aso faisoo, e le o atagia ai le ola faapaiaina e pei ona manatu i ai le

Aposetolo. Lea la ua toe faamanatu e le Aposetolo o Paulo ia i latou le uiga moni o le tagata ua faaolaina. E le gata o le tautau atu na maliu Keriso ma toetu, ae o le faatinoga i aso uma, ia atagia ai o i latou o tagata ua uma ona faaolaina e Keriso e ala i lona maliu ma lona toetu.

O le ola faafoliga, o le vaivaiga lea o loo feagai nei ma tagata Kerisiano i Roma, aemaise lava i tagata Iutaia aouliuli. Ua latou fiafia e faitau le tulafono ma a'oa'o le tulafono, ae latou te le o malamalama i le uiga moni o le tulafono, latou te le o malamalama foi i le uiga o le maliu ma le toe tu o Keriso. Lea la ua latou taumafai e toso mai le Atua e fai ma teuteu lumafale mo latou, ae galo ai latou te le o usita'i i le Atua, .ma teena lona finagalo paia.

O le vaai a Paulo, ua sili atu ona tauamiotonuina tagata o nuu ese o e le o ia i latou le tulafono. Ae o tagata Iutaia, le au mapo tulafono, lea ua foliga mai o le a pau atu i le malaia. Peita'i, o lea ua faamanatu atu i ai e le Aposetolo, e mafai lava ona tauamiotonuina i latou, pe afai latou te faatuatua ma talitonu i le maliu ma le toetu o Iesu Keriso. Lea e pei ona i ai upu o loo i le fuaiupu e 9 ma le 10. *“Afai e te tautino i lou gutu i le Alii o Iesu, ma faatuatua i lou loto ua toe faatuina mai o Ia e le Atua nai e ua oti, e faaolaina ai oe; aua o le loto e faatuattua ai, e oo mai ai le amiotonu; a'o le gutu e tautino ai, e oo mai ai le ola”*. O le uiga o lea faaupuga a le Aposetolo, o i latou uma ua iloa na maliu ma toetu Keriso, e tatauona talitonu i ai i o latou loto, ona tautino lea i o latou laugutu, ona faaolaina ai lea o i latou.

GALUEGA FAATINO:(Debate)

Vaevae le vasega i ni vaega se lua, ona fai lea o le itu e ioe i le fesili a o le isi itu e tetee i ai. Faamaumau e lau susuga ni manatu fa'aalia o tamaiti, ona fai ai lea o lau faaiuga talafeagai pe a maea. Tuu i ai se 10 minute mo le faatinoga lea:

Manatu Autu: E mafai ona faaolaina tatou i aso uma.

PESE: Lord I lift your name on High.
Lord I love to sing your praises

I'm so glad you're in my life,
I'm so glad you came to save us

Chorus: You came from heaven to earth
To show the way
From the earth to the cross
My debts to pay,
From the cross to the grave
From the grave to the sky
Lord I lift your Name on high

A'OA'OGA FOU:

1. Fiafia e tautau atu le maliu ma le toetu o Iesu, ma ia atagia i o tatou olaga o aso uma.
2. tatou fiafia e tautau atu le suafa o le Alii, e fiafia foi o ia e tautau o tatou igoa i luma o le Atua.
3. E mafai ona avea i tatou ma tagata ua faaolaina, ina ua tatou talitonu i o tatou loto na maliu ma toe tu Keriso,mo lo tatou faaolataga..

.....

ASO SA: 19 NOVEMA 2017

**MATAUPU: TUU ESE MA ALU ESE I LE FAATUATUA
(Letting go and stepping out is faith)**

SINI: Ia a'oa'oina le fanau ia malamalama, e ao ona tuu ese ma alu ese ma faafitauli o le olaga i le faatuatua ma talitonu ia Iesu Keriso.

TUSI FAITAU: Mataio 22:1 – 14

FESOASOANI MO FAIAOGA:

O lea ua toe fa'aauau fetalaiga poo faataoto a le Alii o Iesu, e tau faapupula ai le malo o le Atua ma lona uiga, e pei ona i ai foi isi faataoto i le mataupu e 13. Ma o le faiga lava lea o a'oa'oga a Iesu, nate fa'aaogaina tala faa-faatusa poo faataoto, e faamalamalama ai lana mataupu ma le uiga o lona Afio mai i le lalolagi.

O le faataoto i le tausamaaga tele poo le aiga tele e pei ona i ai le mataupu o lenei taeao, o loo faatatau tonu lava i le malo o le Atua, ma i latou e ono sao atu i lea malo. O le Atua, o ia lea o le Tupu. O le auvalaaulia poo i latou na tala'iina i ai lenei faamoemoe, o taitai o le lotu Iutaia poo tagata Iutaia foi. Ao tagata o e na toe valaaulia mulumuli, o i latou ia o tagata agasala ma tagata le taualoa i le sosaiete o Iutaia, faatasi ai ma tagata o nuu ese.

O i latou la ia na ave i ai tusi valaaulia mo le aiga tele lenei, ua latou le mafafai ona auai e tusa o le valaaulia. Ae ua latou faamuamua o latou lava tagata ma mea ua latou manatu i ai, ae ua le faatauaina ai ia i latou lo latou valaauina. Ae o le ituiga olaga lea o lea e ola ai le autusiupu male aufaresaio, po o taitai o le lotu Iutaia. I latou ia ua manatu e sao atu i le malo o le Atua ma le ola faavavau, aua o latou lea e a'oa'oina le tulafono. Peita'i o lo latou vaivaiga e pei ona faailoa atu i ai e le Alii, ua latou a'oa'o le tulafono, ae latou te le o olaina le tulafono. Lea e pei ona fetalai foi le Alii, "*Outou Faresaio, ua faamamaina lava e outou le tua o le ipu ma le tanoa, peita'i o totonu o outou ua tutumu i mea ua faoa ma le amio leaga*". (Luka 11:39).

Ua manatu lava taitai nei o le lotu Iutaia, ua lava le faitauina ma le a'oa'oina o le tulafono, e faaolaina ai i latou. E le gata i lea, ae ua latou le iloa ona salamō ma faamaualalo o latou loto i le Atua, ona o a latou agasala. Aua o i latou nei e tumu i le ola fia mamā, ae ua galo ai ia i latou, o lea lava ua latou le taliale finagalo o le Atua. O lea ua ave la latou faamuamua i mea ua manatu i latou ua taua, ae lē iloa o lea latou te lē o taliaina le uiga moni o le Afio mai o Keriso, o ia o le Atua liutino tagata.

Peita'i, fai mai le isi upu, e le oge tagata le Atua. O le manatu faapito lea o le au Faresaio ma le au Tusiupu, na latou manatu ai ua na o i latou e faaolaina, peita'i ua sese i latou i o latou manatu ma lagona. Aua o lea

ua ese tagata ia ua agai i ai le valaau. O lea ua valaaulia tagata na manatu le au Iutaia, e le agavaa i le faaolataga. E lei teenae i latou nei le valaau, ae na latou talia ma le loto fiafia ma le loto faafetai. E ui o i latou o tagata sa le tatau ona auai i le tausamaaga lea, ae o lea ua avea lava i latou ma malo fa'aaloaloga, e ala i le pule ale tupu.

Ao lea lava le ata o le faaolataga a le Atua mo le lalolagi. Sa manatu lava Iutaia poo Isaraelu, o le faaolataga ua na o i latou lava. I lo latou manatu, o i latou o le nuu filifilia o le Atua. Peita'i o o latou manatu, e le o le finagalo lea o le Atua. Aua e le silasila le Atua i le tino, ae silasila i le loto. O le faamuamua o le finagalo Paia o le Atua, o le mea aupito sili lea ona taua. E le aoga le poto e faitau ma aoao le tulafono, ae o le mea sili ona taua, o le ola aii aso uma. E le o le faamuamua o mea e tupu ai le agasala, ae ia faamuamua pea le finagalo o le Atua.

O mea ia sa tatau ona tuu ese ma o ese mai ai le au Tusiupu ma le au Faresaio, ona latou talia lea o le valaau fa'aaloalo mo latou, mai le Atua le Tupu o tupu. E tele mea ua tatou manatu, o mea sili ia ona taua i o tatou olaga, ma ua ave lava i ai la tatou faamuamua i le tele o taimi, ae o mea ia ua tatou pau atu ai i le malaia. O nisi foi o tatou ua manatu, o le alu i le lotu i le Aso Sa, ma fai mea faa-le-lotu, ua lava lea e faaolaina ai i tatou.

Ae aua nei galo, e ese lava le toaga i le lotu ma fai mea fai o le lotu ona o le vaaiaga a tagata, ese lou alu i le lotu ma fai mea fai o le lotu ona o lou talitonu i le alofa le faatuaoia o le Atua. Ua tele suiga o le olaga ua oo mai i Samoa ma ua aafia ai olaga o fanau. E mafua ina ua latou faamuamua mea ia, ae ua galo ai le Atua o le na faapogai i ia manuia. Poo le a lava le tele o uo i luga o le Facebook, ia poo ni numera foi o telefoni a a tatou uo, poo ni imeli foi, e lē taitai ona galo ia i tatou. Ae na o le ono lava mataitusi o le telefoni a le Atua, ae le taitai ona manatua. Afai ete leiloa le numera o le telefoni a le Atua, faamau ane i lou loto ina ia aua nei toe galo, o le **“TATALO.”**

O le faamanatu, tusa lava poo a mea o le olaga ua pele ma taua i ai tatou, ia Aua! Aua! Aua lava nei galo, ia ave pea le faamuamua i le Atua. O a foi mea o faalavelaveina lou ola auauna i le Atua, e mafailava ona tatou o ese mai ai, ma tuu ese, pe a tatou faatuatua ma talitonu i le Alofa tunoa o lo tatou Alii o Iesu Keriso.

GALUEGA FAATINO:

Counselling: *Fai paga le vasega, saunia e lau susuga a le faiaoga ni faafitauli masani o le olaga, e faamatala i tamaiti. Ia tofu lava le paga ma le faafitauli. Ona auauai lea o paga i luga e faatino le counselling.*

mf:Faaapea o au lea e i ai lou faafitauli ogaoga, ona ou alu atu lea i lau susuga mo se fesoasoani i lo'u faafitauli. O lau susuga la o le counsellor lea o le a e fautuaina au mo se fofo o lo'u faafitauli.

A'OA'OGA FOU:

1. Sola i le Atua e te ola ai.
2. Ave i le Atua o tatou faafitauli.
3. Alu ese ma faafitauli o le olaga e ala i lou faatuatua i le Atua.

.....

ASO SA: 26 NOVEMA 2017

**MATAUPU: UA LAPATAIA I TATOOU
(You've been summonsed)**

SINI: Ia a'oa'oina le fanau ina ia malamalama i le lapataiga ua uma ona tau mai e Iesu ina ia usitaia.

TUSI FAITAU: Mataio 24: 15 – 28

FESOASOANI MO FAIAOGA:

O le tele lava o a'oa'oga a le Alii o Iesu, e ala i faataoto ma isi ana a'oa'oga, e talanoa lava Iesu i lona alu ese ma lona toe Afio mai i lona mamalu, pe a oo i le faatoga o tausaga, o le siitia o lona malo, ma le aso

o le faamasinoga. Ma o ia a'oa'oga a le Alii o Iesu, e faafeso'ota'i lava e lona auso'o i le faatafunaina o le malumalu i Ierusalem. Peita'i, ina ua talanoa atu Iesu iai latou i le faatafunaina o le malumalu, na vave lava foi ona faafeso'ota'i e le auso'o i le Afio mai o le Mesia, ma le fa'aatoaina o tausaga poo le iuga o le lalolagi. O le ala lea na latou fesiligia ai le Alii, poo a ni faailoilo e iloa ai o le a oo mai lea aso. (Mataio 24:1-3)

Ae o lea ua faamalalalama ma faamanino atu e Iesu i lona auso'o, e le feso'ota'i le faatafunaina o le malumalu, ma le toe afio mai o le Mesia, atoa ai ma le iuga o mea uma. E lē tatau ona o latou faalogo i tala felaua'i ma tala sese o loo fai e tagata i lea taimi ma lea taimi, ma faapea mai ai a mea o lea ua toe Afio mai le Mesia. Aua o le a tutu mai perofeta pepelo ma latou taumafai e faasese i tagata ina ia mulimuli atu ia i latou. Aua foi nei o latou manatu a tutupu tauama misa, o mafuie ma lologa ma isi mea faapena, ona faapea lea ua oo mai le iuga o le lalolagi. (ff 4-8)

E le mafai ona oo mai le gataaga o le lalolagi, seia vagana ua so'o le lalolagi i le Tala Lelei o le malo o le Atua. E sauaina tagata o le Atua ma faaseseina i latou seia oo ina fasiotia ona o le Atua ma lana Tala Lelei. Ae ua na o i latou oe tumau i le faatuatua ma alolofa moni i le Atua, e mafai ona faasaoina. E tusa lava pe oo atu le sauaina o i latou i le oti, e tumau pea lo latou talitonu i le Atua, ma e avanoa foi le malo o le Atua mo i latou ia e faavavau. (ff9-14)

O lea aso, e sosola ai tagata i luga o mauga ma luga o fale, ma e le toe mafai ona toe foi ifo e ave a latou mea totino. E sili atu ona faigata ona latou sosola, pea oo mai puapuaga i le tau malulu, aua e tuai ai la latou tamomoe. E faapena foi pe a oo mai ia puapuaga i le sapatu, ona e saisaitia i latou i tulafono faa-lutaia e sa ai ona soli le sapatu. E sili ona mafatia fafine ona o le alofa faatina i fanau. Aua o le a matua sili ona matautia sauaga ma puapuaga o le a oo i ai latou, ma e lei tupu muamua ia ituaiga puapuaga. Peita'i, a le faapuupuua e le Atua lea aso, e leai lava se tasi e faasaoina ai. O le matautia o lea aso, e faaluaina le malaia na oo ia Anetioka Epifane ina ua ia ave le puua ma osi ai le taulaga i le malumalu i Ierusalem, lea na susunuina atoa ai le aai ma fasiotia ai ma lea tupu. (ff15-22)

O lea aso o le a tulai mai ai perofeta pepelo ma taumafai e faasese i tagata o le Atua, ma latou faapea mai o loo i fea le Mesia. Latou te faia foi vavega ma tau ai le suafa o le Alii ina ia faasese ai i tagata. Peitai ua faamanino atu e Iesu i lona auso'o, ina ia aua nei faaseseina i latou e se tasi, pe faalogo foi i nisi aoaoga sese, e ese mai i le mea ua uma ona a'oa'oina ai i latou. Aua o le aso o le Alii poo le toe Afio mai o le Mesia, e pei o le emo o le uila lona oo mai. E le mafai ona iloa e se tasi. O le lapataiga mo le auso'o, o le lapataiga lava lea mo tagata faatuatua uma e aofia ai ma tatou. Ua toatele tupulaga ma fanau a le Ekalesia ua liliu atu i isi tala'iga ona faimai i latou o iina o loo maua ai Keriso. O le ala lea o lo latou faimai, ana le alu lava i le Ekalesia lea e na te le maua Keriso. O nisi foi fanau ua solomuli lo latou ola auauna atu i le Alii, ona o le feilafi ma le matagofie o faatosina a Satani. Ao nisi foi, ua solomuli le ola auauna, ona ua fefe e tautua le lotu, ma ua latou tuuaia ai le faimea so'o o le Ekalesia. Ae o lea ua faamanino mai lava e le Alii e ala i le mataupu o lenei aso, O le tumau i le Alii seia oo lava i le iuga, o ia lena e mautinoa le avanoa o le ola e faavavau mo ia. O ia foi lena na te molimauina manuia o le Atua i lona olaga. Manatua o le afio faalua mai o le Alii, e le iloa e se tasi e oo lava ia Iesu, seia vagana le Atua.

Uiga o Upu ma Fuaitau:

- i) tau maalili - o le tau malulu poo le winter.
- ii) sapati - o le vaitau lea e taua o le vaitau malolo, lea e i ai le Aso Sa e malolo ai tagata mai i galuega ma feau o le vaiaso. Ae e i ai foi le SapatiFaaletausaga (Sabbath year), o tausaga ia e fitu i le tu faa-Iutaia, e faamalolo ai fanua ma pologa mai i le galueaina ma le faafaigaluegaina.

GALUEGA FAATINO: PASO

Lio mai upu o loo taua i lalo

K	M	A	L	U	M	A	L	U	F
E	S	A	U	V	G	T	I	N	O
R	I	I	L	A	S	U	U	A	L
I	L	O	A	I	N	A	A	I	E
S	A	T	U	I	M	V	M	A	P
O	A	O	A	U	E	K	O	L	E
G	R	A	T	E	F	O	R	E	P

- | | | |
|-------------|-------------|-----------|
| 1. Keriso | 6. Pepelo | 11. Tumau |
| 2. Perofeta | 7. malumalu | 12. Alii |
| 3. Iloaina | 8. Atua | 13. Tino |
| 4. Roma | 9. Aoa | 14. Liua |
| 5. Taua | 10. Gataaga | 15. Unaia |

PESE: Faalogo ma Usita'i.

A'OA'OGA:

1. 'Aua le faalogo i a'oa'oga sese.
 2. Tumau i le Atua i aso uma o lou ola e te manuia ai.
-

ASO SA: 3 TESEMA 2017

MATAUPU: TIMU O FAAMANUIAGA
(Blessed rain)

SINI: Ia malamalama tamaiti i le taua ma le aoga o le timu i o tatou olaga.

TUSI FAITAU: Kenese 9: 8 – 17

FESOASOANI MO FAIAOGA:

O le vaega leni o le tusi sa tatou faitauina, o le uma ai o le lolo, ona fetalai lea o le Atua ia Noa ma lana fanau, ma faailoa atu ai lona finagalo ma le faatumauina o lana feagaiga ia Noa ma lana fanau. O le feagaiga, e le toe i ai se lolo i le lalolagi, a’o le faailoga o le feagaiga o le nuanua lea. O le nuanua e masani ona vaaia i le lagi pe a timu. E fitu lanu o loo i ai i le nuanua. (i) lanu mumu (red) (ii) lanu moli (orange) (iii) lanu samasama (yellow) (iv) lanumeamata (green) (v) lanu moana (blue) (vi) lanu moana malosi toetiiti lava lanu viole (indigo) (vii) lanu viole (violet). O le numera fitu (7) i le gagana Eperu o le numera a le Atua, po o le numera atoa, o lona uiga o le fitu o lanu o loo i le nuanua, o le faailoga o le atoatoa o le feagaiga a le Atua ma lana auaua o Noa. Ae po o le a le feso’otaiga o le nuanua ma le ulutala o le tatou mataupu? “Timu o Faamanuiaga.”

Na o se toe fia tepa i tua i le tala i le amataga o le lolo. Taoto ia le aotelega, a o le mafuaaga o le lolo o timuga. Na mafua ai ona tatala punavai o loo i atumauga ma tafe ifo ma lofia uma ai le lalolagi. A o le lolo na faapogai ina ua silasila mai le Atua i le ola agasala o le lalolagi sa i ai muamua. A fua la i le tala, ua na o Noa ma lona aiga na faasaoina. O le timu o se tasi o vaega o le foafoaga na faia e le Atua, e ui ina ua sailiili e saienitisi (scientist) ma latou faamauina ai le taamilosaga o le vai (water cycle) lea e mafua ai foi le timu.

A o le mataupu “Timu o Faamanuiga” fai mai ina ua to’a le va’a o Noa ma lona aiga ma meaola uma i luga o mauga o Ararata, o le faailoga na iloa ai e Noa, ua matu le vai o le lau olive na sau ma le lupe, o le faailoga o le ola fou. Na mavae le lolo ae ua avea ma ala ua tutupu lauolaola ma lausiusi ai laau o le faamoemoe lea mo le ola lelei o manu ma tagata.

Tamaiti, e tele aoga o le timu ia i tatou. E maua ai vai mo le fofoga taumafa, e maua ai vai mo le ola lelei o manu ma faatoaga. E maua ai vai e taele ma faamalu ai o tatou tino pe a oo ina vevela le la. Afai o le timu na mafua ai ona lofia le lalolagi muamua i le lolo ma faatamaia ai le lalolagi sa i ai, lea ua fai mai le mataupu o le Timu o Faamanuiaga ina ua saunia e le Atua le nuanua o le faailoga o lana feagaiga, e le toe i ai se lolo i le lalolagi.

O si o tatou atunuu e faalagolago lo tatou tamaoaiga i faatoaga ma mea fafaga, e manaomia tele ai le timu mo le ola lelei o faatoaga. Ua tatou i ai foi i vaitau o timuga, e le faapea a timu o faamanuiaga ona e soona saoloto ai lea e te alu i le timu. Leai, e ma'i ai oe. Ae ia fa'aoga tatau le timu mo se manuia o oe ma lou aiga. E le timuga ai pea aso uma, e i ai foi le vaitau e mamago ai laau ona o le malosi o le la ma oo ai ina utiuti le suavai e manaomia tele e tagata. O le faamanatu foi lea mo le tatou vasega ia nofo sauniuni i taimi e timu ai ma taimi e la ai. O le timu ua faatusaina ai e nisi faamanuiaga.

GALUEGA FAATINO:

Tusi mai ni a outou solo, tai 3 fuaiupu, 4 laina i le fuaiupu i le taua o le timu

PESE: 115 (Pese maViiga)

A'OA'OGA:

1. Ia tatou manatua a tatou feagaiga ua uma ona fai ma le Atua.
2. E tele aoga o le timu i le soifuaga o le tagata.
3. Aua le ola agasala ma le tiga o le finagalo o le Atua.

.....

ASO SA: 10 TESEMA 2017

MATAUPU: O AU FILIFILIGA (Your choices)

SINI: Ia a’oa’o le fanau ia malamalama i le taua o le faia o filifiliga sa’o. Auā o lau filifiliga e te manuia ai, o lau filifiliga foi e te malaia ai.

TUSI FAITAU: Teuterenome 28: 1 – 6, 15 – 19

FESOASOANI MO FAIAOGA:

E lua ni vaega taua o loo aumai ai i le tusi faitau o lenei Aso Sa. Vaega muamua, o le fuaiupu muamua e oo i le fuaiupu e ono, o loo faamatala mai ai e le tusitala o le manuia o le tagata e faalogo, usita’i ma faia le finagalo o le Atua ma le fuaiupu e 15 e oo i le fuaiupu e 19, o loo faamatala mai ai le malaia o le tagata e le faalogo ma le usita’i i le finagalo o le Atua.

O upu nei, o upu a Mose na se’i toe faamanatu atu ai i le nuu le finagalo o le Atua mo i latou a o lei ulufale atu ma nonofo i le nuu na folafolaina e le Atua mo i latou. Ina ia tu’utasi lo latou talitonuga i lo latou Atua o le na latou osi feagaiga. Silafia lelei e Mose le vaivaiga lea o le nuu o Isaraelu, o le faigofie ona galo ia i latou o le alofa lavea’i o le Atua.

O le faamanatu lea mo tupulaga fou o lea o le a sauni e ulufale i le nuu folafolaina, ina ia aua nei faapei o o latou tuua, o le fulitua so’o i le Atua soifua. Auā o le ala tonu lava lena na mafua ai ona leai se isi o i latou e faaooina i Kanana. O le talitonuga lea faa feagaiga tuai, a e faalogo ma usita’i i le finagalo o le Atua e manuia lou olaga ae a le faalogo ma usita’i i le Atua na o le malaia e te oo i ai.

O le faamanatu ma le feau o loo momoli mai i le autu o lenei aso. Filifili faatasi ma le Atua e te manuia ai. E tele ma anoanoa’i filifiliga eseese o loo feagai ma le fanau i nei aso. Ae so o se filifiliga lava e lua itu taua e ao ina e vaavaai toto’a i ai. Muamua, o le itu lelei ma lona lua, o le itu e leaga ai. E lē mafai a ona o eseese le lua lea, e ao ai ina matuā filifili toto’a.

O le fai o filifiliga sa’o ma le amiotonu, e le mafai ona maua pe afai tatou te le faalagolago ma faamoemoe i le fesoasoani mai o le Agaga Paia o le Atua. Tatou saili ia te Ia i le tatalo, o Ia e faasino mai auala tatou te le iloa muamua, a o ala e tau atu ai i le manuia.

Ua tatou i ai foi i le vaitau ua taua o vaitau o aso fiafia. E faigofie ai lava ona faaseseina ai i tatou ma faaletonu ai a tatou filifiliga fai. Afai o loo fesouaina o tatou mafaufau po o fea le mea tonu e ao ina tatou faia. Ua na o le mafuta i le Atua i le tatalo e maua ai le tali o o tatou faafitauli.

O lau filifiliga sa'o ma le tonu, o lou toaga i le aoga, ma le aoga Aso Sa, toaga i le lotu ma fai amioga fa'aaloalo. O nisi fanau ua filifili e inu le ava malosi, ulaula tapaa, ae le'i taitai le olaga. Ia ma le tele lava o nisi mea o loo filifili ai, po o le telefoni feavea'i, o ni seevae fou taugata o mea ia a oo ina tatou faamamafa ona oo ai lea i le isi vaivaiga o le matamata ai i ata le talafeagai, po o le gaioi o le ato tupe a matua ma isi tagata.

O le ala lea o le fai atu ia filifili faatasi ma le Atua, o Ia e maua ai le filemu ma le manuia, ma mamao ese ai tatou mai le tele o faaosoosoga e oo atu ai i nisi tulaga e pei o le pule i le ola ma le malaia.

Ia manatua e faamanuia le Atua i le tagata e faalogo ma usita'i i lona finagalo ae e malaia le tagata e filifili e fai mea leaga ma mea sese.

PESE: Ua ou filifili e mulimuli ia Iesu

GALUEGA FAATINO:

Tusi mai i se parakalafa, e faamatala mai ai lau filifiliga mo le lumanai. Tusi mai ai po o le a le mafuaaga ua e filifilia ai lea filifiliga. Taitoatasi ma faitau mai i luma o le vasega.

A'OA'OGA:

1. E taua le fai o le filifiliga tonu ma le sa'o, aua o le fatu lea ma le faamoemoe o le manuia o lou olaga i le lumanai.
2. Filifili faatasi ma le Atua e ala i lou toaga e tatalo ma savali i ona ala, e te manuia ai.
3. Ia aua nei galo, e lua lava itu e te filifili i ai, ae filifili i le lelei, e manuia lou olaga ae a e filifili i le leaga na o le malaia e oo mai ai. .

.....

ASO SA: 17 TESEMA 2017

**MATAUPU: O LE FINAU A APERAAMO I LE ATUA
(Abraham argues with God)**

SINI: Ia a’oa’oina le vasega ina ia malamalama, o le faatuatua o Aperaamo na toe sui ai le finagalo o le Atua.

TUSI FAITAU: Kenese 18: 16 – 33

FESOASOANI MO FAIAOGA:

Ua manino ma ua tatou iloa lelei, e leai lava se tagata e mafai ona fai se finauga ma le finagalo Paia o le Atua. Peita’i, a tatou vaavaai ia Aperaamo o ia ua faalupe o le tamā o le au faatuatua. O loo manino ma malamalama le tala sa faitauina i le feiloaiga a Aperaamo ma agelu a le Atua o e na auina mai e le Atua e faaoo lona finagalo i aai o Sotoma ma Komoro.

O le ala lea na faailoa ai e le Atua lona finagalo i lana auauna o Aperaamo, o le faailoga o le so’otaga vavalalata o Ia ma lana auauna. A faitau manino i ai, e maofa le loto i le tuualalo a le tagata faatuatua, o le tagata na te iloa lelei lona Atua.

A tuu i se isi itu, o i ua tatou iloa ai le tula’i mai o Aperaamo faata’ita’i i totonu o lona aiga. Na iloa loa e Aperaamo le toasa o le Atua ia Sotoma ma Komoro, fai mai le tala ua tu i luma o le Alii. Ua tu i le va o tagata ma le Atua, ua le ese ai ma se galuega a se Perofeta. Iloa lelei e Aperaamo o loo i ai Lota ma lona aiga, o le atalii o lona uso. O le alofa mafanafana na ia taumafai ai ina ia suia le finagalo o lona Atua.

O aai o Sotoma ma Komoro, o aai laugatasi ma le lafulemu, aai ia lea sa tusi lima i ai Lota e fia nofo ai ina ua fai atu Aperaamo e filifili muamua i se mea e fia nofo ai. Ae peita’i o le ola agasala o tagata na afua ai ona toasa le finagalo o le Atua.

Na amata mai lava le talosaga a Aperaaamo i le 50 tagata amiotonu, faasolo ifo ai i le 45, 30, 20 seia oo a i le 10. Faauta ile tele o le tuuavanoa o le alofa o lo tatou Atua. Fetalai le Atua ia Aperaaamo afai o i ai se toa sefulu ou te le faaumatia lava.

Tamaiti, e tele luitau o le olaga lenei tatou te fetai'a'i pea i lea aso ma lea aso. Ma o nei luitau poo faafitauli ua tatou saili solo aimo se fofo. O nisi taimi ua tatou manatu ai ua le alofa mai le Atua po o se isi faaupuga, ua le tali mai le Atua ia tatou tatalo. O le taua o le faamanatu mai o lenei tala ia i tatou le fanau. Ia mauaa lou talitonuga ma lou faatuatua i le Atua. O le faatuatua faamaoni o Aperaaamo i le Atua natali leleia ai lana finauga. E silasila le Atua i le mana'o o le tamaitiiti e talitonu ma faatuatua ia te Ia. E tali foi le Atua i le tatalo a le tagata faatuatua ua finau atu e fia maua ona manuia.

GALUEGA FAATINO:

Vaelua le vasega ona fai lea o se finauga (debate) E uiga i le mataupu e iloa ai ua malamalama lelei tamaiti i le mataupu.

PESE: 122 (Pese ma Viiga)

A'OA'OGA:

1. Ia tumau, talitonu ma faatuatua faamaoni i le Atua e manuia ai lou olaga.
2. Faamasani i lou Atua e ala i lou toaga e faitau le Tusi Paia ma tatalo ia te Ia i aso uma.
3. Finau e tusa ma lou faatuatua i le Atua, ae aua le finau vale.

.....

IA MANUIA LE KERISIMASI MA LE TAUSAGA FOU 2018